

ASO LUA, 15 FEPUARI 2022

Na toe faaauau Taulumaga a le Fono Aoao Faitulafono i le itula e 2:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o le Ofisa o Tiute 2022.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

E i ai le manatu ua maua se faasiligamalosai mai le tatou malologa, tali le sua i le paia o le tatou Maota, malo le onosai mo le faaauauina o le tatou galuega.

E faataatiaese a tatou Taulumaga mo le tatou malologa o le aoauli ua maea saunoa sui usufono mamalu sa fia saunoa i le Tulafono Tau Faaofi. O le avanoa leni mo lau Afioga i le Minisita o Tiute ma Tupe Maua e te saunoa e talifuaitau i saunoaga a sui usufono mamalu sa saunoa i le taeao. Lau Afioga i le Minisita.

Afioga Masinalupe Makesi Masinalupe (Lefaga ma Faleaseela): Lau Afioga i le Fofoga Fetalai, a o le i saunoa le Minisita pe maua se avanoa...

FOFOGA FETALAI: E i ai se mea o tulai mai ai lau Afioga i le sui usufono mamalu o Lefaga ma Faleaseela.

Afioga Masinalupe Makesi Masinalupe: Lau Afioga o le ala foi lea o le tulai vaeatu ou paia. Faafetai mo le avanoa, faafetai o lea ua saoialo ma palegaauau, ua tali le sua i le Afioga i le Tamaitai Palemia, lea foi ua tali le sua i Afioga i Minisita o le Kapeneta, ae tainane foi le lavalao o le Palemene i leni ituaso.

E i ai lava le talitonuga i leni foi ituaso, o tatou ua filifilia mai tatou itumalo tatou te omai e tausi le fealofani ma lufilufi le tamaoaiga o le atunuu ina ia tulaga lelei. Ua tatou omai foi, o la e tapuaia o tatou faiva e le atunuu, aemaise o itumalo o tatou omai ai. Peitai, e i ai le talitonuga o le upu faa-Samoa, a manua lava le vae e logo lava le tino atoa. O le itula ua fano lea sa i ai nai lafoga o lea ou te fia manao e aveese mai tatou faamaumauga, ona e

foliga mai e le taugamalie i le faalogo aemaise foi o le faafogoga. Ua tatou omai foi i le Maota lenei, e le sailia ai se fia tama leaga o se isi, e leai foi se isi e fia ulavale ai i i, o la e i ai le mea e agai i ai.

Ae ou te faatu le lafo, *E aveese mai upu a le sui usufono lea. O le fesili e faapea; o ai oe?*

O le uiga o lau tala, a fesili loa i le fesili lea, o le tele ia o lona lautele. Ia pei o lau faatu lea i le tulaga lea mo le sologa lelei o le tatou galuega, aemaise foi o faamaumauga a le Ofisa o le Fono. Ma le faaaloalo lava.

FOFOGA FETALAI: Ia, e faamalulu atu i lau Afioga i le Minisita Lagolago, o lea foi ua faatu mai le lafo. O ai e faaluaina le lafo?

Faaluaina e le sui usufono mo Gagai fomauga 2.

Na faamaonia le lafo ma tulai ai faamaumauga o le saunoaga a le sui usufono mo Vaimauga 1 ua aveese mai faamaumauga a le Palemene.

[Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Vaimauga 1: “*O ai oe?*”].

FOFOGA FETALAI: Ia, o upu lava, o le puipuiga o le mamalu o le tatou Maota.

Afioga Sulamanaia Fetaiai Tauiliili Tuivasa: Ioe, lau Afioga i le Fofoga Fetalai.

FOFOGA FETALAI: E leai se avanoa e toe tuuina atu i lau Afioga ua uma lou avanoa i le Tulafono.

Afioga Sulamanaia Fetaiai Tauiliili Tuivasa: O se vaega e taua lava i lou sui usufono leaga o lea ua faaluaina ma aveese mea sa ou tautala ai. Pe maua se avanoa i lau Afioga.

FOFOGA FETALAI: Ia, ae i ai foi le manatu lau Afioga i le sui usufono mamalu, a tatou fefaloai loa le afa, ia ua umi ai lava. Ae ou te talitonu foi o nei foi upu, o upu lava e manatu ina ia puipuia ai le mamalu o le tatou Palemene. Ia, ona e ese foi e na faia le upu, ese foi le faafogafoga a le Palemene.

O le mea lea, ou te faamalulu i le sui usufono mamalu i le tulaga lea, ona i le faalogo foi a le Nofoa, e fai si malosi tele o le upu. Ia te au foi ia, o le ava atu lava ma le mafaufau i le mamalu o le tatou Palemene lea e mafua ai. Ua

i ai le manatu o lea ua tuueseina, ia e leai foi se mea o le a afaina ai le saunoaga atoa ma le sao o le sui usufono mamalu ua uma ona tuuina mai i le Palemene.

Lau Afioga i le Minisita, ia o lou taimi lenei o lea ua tuuina atu ma le agaga faaaloalo.

Afioga Hon TUALA TEVAGA IOSEFO PONIFASIO: Faafetai i lau Afioga i le Fofoga Fetalai. O au lava lenei o se auauna, o taimi foi ua tuanai pei ona tulai mai le tulaga o i ai, lau Afioga i le Fofoga Fetalai, o le a ou le toe ta i tua. E lagona lava le mafanafana pei ona e mua foi i lo tatou Matai i le lagi i le taeao analeila, ia, e talitonu o lo o tumau pea lana taitaiga i le tatou Palemene i le aso. Ua uma foi ona avatu se upu malu i le uso, vaeatu ou paia lau Afioga i le sui usufono. Ia, ua tuanai na futia.

Masalo o lea o le a ou talanoa sao loa i le tulaga o le Tulafono pei ona tulei saunoa ai foi nisi o sui usufono. A o faagasolo saunoaga a sui usufono mamalu, sa ou nofo lava ma ou mafaufau i lau folasaga sa tuuina atu. E i ai lou talitonuga sa faafofoga le Palemene i se folasaga po o se manatu foi sa tuuina atu e agai i le mafuaaga ua ala ai ona faatulai mai lenei Tulafono Tau Faaofi mo le soalaupulega o le tatou Palemene. O le agaga foi na tuuina atu ai le folasaga, e manino lelei le tulaga lea. E leai se agaga e tusitusilima pe taulagalaga foi i ni mea na faaletonu sa i ai, po o taumafai foi lenei Itu e tau faasino ni tulaga e ono tulai mai ai se vevesi i o tatou lagona. O le sini autu lea na matua manino lava, ina ia faasao se mea ua faaletonu, pei foi ona i ai saunoaga foi ua mavae i totonu o le tatou Palemene, ina ua tulai mai le tatou Malo fou. Sa outou faamanuia ma outou saunoa mai e faapea, ia o le Malo lena, a i ai ni mea o faaletonu, faasaosao. Ia o lea foi sa tatou tofua saunoa uma ai lava. O le agaga lena, ina ia tatou see ese mai se lagona o le tusitusilima.

E mafua lava lenei mataupu pei ona ou taua, ina ua fono i se taimi muamua ua valaauina le Komiti Faafoe lenei, sa ou i ai, o lou tagata foi e fou. Ae ina ua feiloai le Komiti, sa faapena ona susu uma mai alii foi ma tamaitai o Ofisa Sili o Pulega o Matagaluega, ia e fai lava si toatele foi o matou sa i ai. O se uiga ese foi le tulai mai o lea Faalapotopotoga i lea aso. O ina sa fesiligia ai le tulaga o faiga faavae aemaise foi o Tulafono. Ia o aga lava o le fia malamalama. Ae peitai, na tulai mai ai le tulaga lea, ua leai se isi e mafai ona tali, o lea sa talosaga ai loa le afioga po o le susuga i le Loia Sili, se i vaai if oi le Tulafono. Ia e pei la o le tulaga lena o lea na amatamea le tamaitai Loia Sili, o ia lea na fautuaina le Kapeneta i le tulaga po o le status o lo o i ai le tatou Tulafono o Tiute 2014 o lo o i ai nei.

E ao ona ou toe foi i tua i le Tulafono sa i ai, o le Tulafono lea o Tiute 1977. O le Tulafono lea i lau matau, sa tele lava lona atoatoa, sa i ai foi i totonu o lea Tulafono vaega foi sa taua ai tulaga o Komiti Faafoe ma tulaga faapenei. Ae peitai ina ua tulai mai le suiga lea i le 2014, o i ina lea na faapau ese ai,

pe na le toe faataua ai loa le vaega lea o lo o i ai oloa po o duty concessions, o lo o i ai le tuusaunoaina o oloa, o le vaega lea o le Tulafono, o le vaega lea o le 163A o le Tulafono 1977. O lona uiga, ina ua tulai mai le Tulafono 2014, e le o toe i ai le agavaa lea o le duty concessions po o ni oloa o lo o mafai ona ave i ai le tuusaunoaina.

Mo le silafia, sa faapena ona faaauau pea le Komiti lea ua taua o le Komiti Faafoe o Tupe Faafaigaluega a le tatou Malo, sa faaauau lava latou, e pei lava e le i suia le Tulafono. Sa faapena foi ona tauave pea e latou Tulafono Faatonutonu i le 2010, ia, ma faapena lava ona fai faaiuga nei i luga o Tulafono Faatonutonu. Ae ao ona faamanino i lona taimi, ua leai se malosiaga i lalo o le Tulafono Autu. Toe faaopoopo atu i ai, e le i i ai foi se tulaga foi lea o se vaega e faasao ai, a transitional provision e faasao ai nisi o vaega o le Tulafono tuai ina ia mafai ai ona aumai pea lea malosiaga i totonu o le Tulafono 2014, Tulafono fou.

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Ia, se i onosai mai lava lau Afioga i le Minisita se i tuu atu le avanoa i le sui usufono mo Faleata 3.

Tofa Lealailepule Rimoni Aiafi: A tagai lau Afioga i le saunoaga a le Afioga i le Minisita, o le vaega tonu lea na ou tulai atu ai analeila. A tagai le Afioga i le Minisita i le Vaega 344 o le Tulafono Tumau, o lona e i ai i ina le savings and transitional i le vaega o le Tulafono lona sa allow ai i ina, faataga ai i ina e faaoga pea Tulafono Faatonutonu mai lava i le 1977, pei o le Tulafono Faatonutonu lona e i lalo o le turisi ma le manufacturing. Lona uiga o lea sa i ai lava i totonu i i le vaega lea.

O lea ua manaia le agaga lea ua i ai ina ia fai se vaega faapitoa i totonu o le Principal Act. A o lea ou te le iloa ne i te i ua sese lau faitau, a o lea ou te faitau atu, o lona e i lalo o le Vaega 344 o le Principal Act lona sa i ai i ina le savings and transitional provision o le Tulafono. Ma le faaaloalo lava.

FOFOGA FETALAI: O lea ua maua atu le agaga o le fesili. O le Tulafono Autu lea ua e talanoa mai ai ae le o le Tulafono Tumau pei ona e saunoa mai ai i le amataga. Ia, e avatu foi le fesoasoani a le Nofoa. Afai o lea ua saunoa manino le Minisita o lea sa fautuaina e le Loia Sili, ia o le tiute lea o le Kapeneta e silasila i tulaga ia, pei ona faatulai mai ai i so o se faigamalo lava, o le tiute lava lea o le Kapeneta o le faatulaga o Tulafono i lalo o le fautuaga a le Loia Sili. Ia ona tuuina mai loa lea iinei i le tatou palemene tatou te talanoaina. A o le tatou interpret ina o le Tulafono, o le mea lona o le mea e patino lava a le Faamasinoga. O le mea lea, ia, tatou malilie o lea ua see le sa o le Minisita ma le faigamalo aemaise o le Kapeneta, lea e i ai suiga ia pei ona faaalua manino e le Minisita. A o le tatou faaliliuina,

e le o se tiute lena o le Palemene, o le tiute lena o le faamasinoga. O le mea lea ou te fesoasoani atu ai i sui usufono mamalu ina ia faafaigofie le tatou mataupu, o lea ua saunoa manino le Minisita, ua manino lava matafaioi a le tafatolu o tatou faigamalo. O le mea lea, saunoa lau Afioga i le Minisita.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai mo le faasaoina o le taimi o le Minisita, pe maua se avanoa...

FOFOGA FETALAI: Ia se i onosai mai lava lau Afioga i le Minisita se i tulai mai le Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Faafetai. O le fesili; o lea e tuuina atu faafesili. Faafetai i lau Afioga, aua pei o le mafuaaga lea o le tele o finagalo sa faaalua i le taeao ona o le eseese, e pei e tau eseese le faitauga foi lea ma le faauigaina. A o lau lava fesili; o le Tulafono Autu lea o Tiute 1977, lea sa fausiaina ai ma faamaonia Tulafono Faatonutonu lea sa faatu ai ma faavae ai investment committee ma faagasolo mai ai lava seia au mai i le 2014 ina ua pasia le Tulafono Autu fou e soloia ai le Tulafono Autu o le 1977. A o lea la e mafua ai lau fesili i le Fuaiupu 334(3) o le Tulafono lea o Tiute 2014, o lena o lo o faapea mai; e tumau pea le faaaogaina o Tulafono Faatonutonu sa pasia i lalo o le Tulafono Autu 1977, seia vagana ai ua soloia i se isi Tulafono. E le afaina le soloia foi o le Tulafono Autu, ae e faaauau pea lo latou faamalosi ma le faaaogaina.

FOFOGA FETALAI: Ia, o lea ua manino atu... ia...

Tofa Hon Lauofo Fonotoe Nuafesili Pierre Lauofo: O lea la sa ou fesili ai, ma le isi mea lea puupuu lava laitiiti ua maea. Lea na ou fesili ananafi i le tamaitai Pule, o i ai se fuafuaga a o se faamoemoe o le Matagaluega e soloia Tulafono Faatonutonu ia lea la o lo o sau ai lava e oo mai i le taimi nei, a o lana saunoaga manino, e leai. E leai se fuafuaga o i ai e soloia. O lona uiga la, e pei la o lau ia faitau ma lau tilotilo atu i ai i le mataupu, o lea lava la e leai se afaina o le tulaga o lo o i ai, o lea lava e sosolo mai lava, e oo foi la i le tatou tusi lea o mea o Tulafono Faatonutonu, le lisi o Tulafono Faatonutonu o lea lava o lo o faamalosi i le taimi nei, a o lea foi e sau ai i le Tulafono Faatonutonu lea e le o faapea ua soloia. O le fesili lena. Faafetai lava.

FOFOGA FETALAI: Malie lau Afioga i le Sui Taitai o lea ua maua lou finagalo, ae taatia mai o le a saunoa atu le Afioga i le Minisita. Lau Afioga i le Minisita.

Afioga Hon TUALA TEVAGA IOSEFO PONIFASIO: Ia, faafetai. Sa i ai le tulaga tatou te le felafoai tele i le tulaga o auiliiliga o upu pei ona e saunoa ai le sui usufono mamalu i se taimi o ananei i le taeao. E le i i ai foi se tulaga tatou te finau i luga o Tulafono, ona ua ala ai ona tatou agai i le Tulafono lea, ona o auiliiliga ma fautuaga na tuuina mai e le Loia Sili. Ma o lea foi ou te maua nisi o saunoaga, e tasi lava le Loia Sili, ioe. O lea foi o lo o i ai malosiaga o le Loia Sili e fautuaina ai le Malo.

Ia pei o le ala lea na afua ai le tulaga lea, ae ou te fia talanoa i le 344, leaga o lea ua e saunoa ma e faapea o lea lava o lo o i ai le malosiaga i totonu o le 344. Ia o i ina la e maueseese ai Ape ma Tutuila ona ne i te i ua tatou finau...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e leai se agaga e faalavelave ne i te i ua ma fesetai, e le o le 344, o le 334. Mo le silafia ne i te i ua...

FOFOGA FETALAI: Ia, o le 334 lau Afioga i le Minisita.

Afioga Hon TUALA TEVAGA IOSEFO PONIFASIO: Ia o le 334. Mo le silafia foi e lau Afioga, e foliga mai ona na agai mai lava le faigamalo ma faatino faaiuga i luga o Tulafono Faatonutonu nei. I le Tulafono Faatonutonu 2010, o lea foi na toe faasino i ai le Tulafono lea agai i le Vaega lea 163A i lalo o le Tulafono o Tiute 1977. Ae pei ona ou taua, o le Tulafono lena ua leva ona pe, se i tulou, ua le o toe faaaogaina, a o lea ua oo mai i le toe iloilogia ma le pasia o Tulafono Faatonutonu 2010, a o lea e refer le Tulafono lea i le Tulafono lea Vaega 163 ae le o i ai se Tulafono faapena, e le o i ai foi i totonu o le 2014. O lona uiga, a faapea e le o i ai, sa tatau lava ona faapea o se intention lea po o le tulaga lea sa tatau ona fai, sa tatau lava ona toe tuu se Tulafono e tai tutusa faapea i totonu o le 2014 e mafai ai ona faaaau le malosiaga faaletulafono autu. Ia, pei o le tulaga lena, e le o i ai se agaga e finau. A tatou oo loa i le tulaga lena, e le aoga ona tatou tuulaloina le fautuaga mai le Ofisa o le Tiute ma ua talia foi e le Matagaluega. Sa i ai foi le fesootaiga ma... e le o ni finauga, ae sa faapea ona matou felafolafoai ma fetuutuunai foi ma le Matagaluega, ia o lea lava ua i ai le autasiga, e talia le fautuaga a le tamaitai Loia Sili. O i ina foi o lo o i ai le agaga o le Kapeneta ina ia faamautu le tulaga lea.

O le isi mea e fia faailoa atu, o le faatuina lea o le Komiti Faafoe i lalo o se Tulafono. O le matou matau, sa i ai i lalo o le Tulafono 1977, ae oo mai i le 2014, sa faapea ona faaaau le Komiti Faafoe. Ae pei foi ona ou tau atua, e le o i ai se tulaga faapea i le faaaauina o lea Komiti. O lona uiga, sa faaaau mai lava le Komiti lea e pei lava o le mea foi lele, a o la e ua i ai Tulafono Faatonutonu, ia tatou alu ai i lena. Mo le silafia, o le Tulafono Faatonutonu 2010, e le o i ai se vaega faapea i so o se Tulafono. E oo foi i le Tulafono Faatonutonu o faapea mai ai, there shall be an Investment Committee or

there must be an Investment Committee. O lea sa ou vaavaai po o i ai se Tulafono o i ai se provision po o se vaega faapena. Na o le pau lava le mea lea e mafai ona ou taua atua i lalo o le Tulafono Faatonutonu 2010, o lo o i ai le upu lea Investment Committee i luma lava i le mea lea o lo o i ai le faauigaga o upu po o le interpretation. Pau lava lena o le mea i le Tulafono Faatonutonu lea o lo o refer i le mea tau Investment Committee. O le isi vaega atoa lava o le Tulafono Faatonutonu lena, o lo o talanoa mai i le tulaga o oloa ma isi tulaga faapena. O le mea lena e i ai foi le faaeteetega, e foliga mai e leai se mea o faavae ai lenei Komiti. Ia pei o le isi lena agaga ua ala ai ona aumai le Tulafono mo le silafia e le Palemene e tataua ona faamautu se faavae e fausia ai pe faatu ai lenei Komiti Faafae. O le uiga lena o le isi vaega ua ala ai ona aumai le tulaga lea.

O le isi vaega taua ua ala ai ona aumai le tatou Tulafono i le aso, ia, a faapea o a ni tulaga na i ai faaiuga sa fai, ia ma te le o popole po o a ni faaiuga sa fai, e le o se taimi lena o matou, o matou lea faatoa omai, e le i i ai ni matou faaiuga ua fai i le taimi lenei ona o le tulaga lea. Ae o moomooga ma tulaga foi o lo o i ai le tofa ma le faautaga i le Tamaitai Palemia ma le Kapeneta, tau lava ina ia faasao ma faamautu lelei, faavae lelei ona tatou agai loa lea i luma. O nisi mea e mulimuli mai, ia o le tapena lea o Tulafono Faatonutonu e faasaosao ai nisi mea ma faaleleia ai isi mea. O lea ua aumai uma lava a outou tuualalo, o lea ua faamaumau, ia o le agaga lena. O le a fausia ni Tulafono Faatonutonu ina ia mafai ona tapena lelei ma tuu ai i totonu a outou timaiga ua aumai.

Tofa Lealailepule Rimoni Aiafi: Lau Afioga i le Fofoga Fetalai, e faamalulu atu lava i lau Afioga i le Fofoga Fetalai...

FOFOGA FETALAI: Se i onosai mai lau Afioga i le Minisita se i tuu atu le avanoa i le sui usufono mo Faleata 3. Saunoa mai lau Afioga.

Tofa Lealailepule Rimoni Aiafi: O le upu lava lea ou te tulituliloa lea ua toe saunoa i ai le Afioga i le Minisita, faasao, faasao. E le o afaina le faamautu, pe afai e faamautu i totonu o le Principal Act. A o le upu lea o le faasao, lona uiga a faasao, sa sese. I lou talitonuga, e le i sese leaga o lea sa i ai lava le avanoa i lalo o le Tulafono Faatonutonu lea e saunoa i ai e faaauau ai mea ia. O lona uiga la i lou talitonuga o le faamautu, a o le faasao, e le taliaina. Ma le faaaloalo lava.

FOFOGA FETALAI: Ia, se i tulai mai lau Afioga i le Tamaitai Palemia.

Afioga Hon Fiamē Naomi Mataafa: Lau Afioga, o lea lava e faaauau pea le alo atu o le Minisita e talifuitau foi i saunoaga ma felafolafoaiga i luga o le tatou Tulafono. Ae ua ou manatu i le tulaga faa-Taitai o le Maota, e i ai

lava le mea lea ou te le iloa pe maua mai e lau Afioga i le Fofoga Fetalai, po o le a le sao. O lea e maua, a i ai Tulafono Faatonutonu, e mafai lava ona folau ma fai le galuega. A o lea e i ai se manatu, o Tulafono Faatonutonu e faavae i luga o le Tulafono Autu. O lea la e saunoa le Minisita e le i ai mea ia i totonu o le Tulafono Autu. O fea la le Tulafono e malosi? O lona uiga a tauave le mau lea e aumai e le Itu Agai e taatia le Tulafono Autu ae fai le Tulafono Faatonutonu.

O si matou vaivaiga lau Afioga i le Fofoga Fetalai, ua fai foi sina umi o i le Maota, e leai se mea faapena. O le faaopoopo atu o le galuega a le Tulafono Faatonutonu ina ia atoatoa se mea ua muai faavae i totonu o le Tulafono Faavae, ae aumai pea lava le mau lea. Ma i lou tulaga faa-Taitai, e le tatau ona alu loa le mataupu lea, e tatau ona taatia i le agatonu. Faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o se avanoa faamolemole...

FOFOGA FETALAI: Faafetai i lau Afioga i le Tamaitai Palemia, o lea ua... Ia se i onosai mai lava le Sui Taitai se i avatu pea se fesoasoani a le Nofoa, ae i ai lava le manatu o le Nofoa i le tulaga lea o le tatou galuega. E pei foi ona tatou tatou talatalanoa ma tatou faasoa foi i le aso ananafi, o le uiga lena e pei ona saunoa le Afioga i le Palemia. O le taumafaiga o le tatou Malo ua i ai nei ina ia faaatoatoa le tulaga o i ai, lea e pei ona fautuaina e le Loia Sili. E manatu foi, e vaai lava ma le alofa atu i lena foi Itu ina ne i fai se tatou fefinuaiga, ae leaga o lea ua saunoa manino le tatou Malo ma le tulaga o i ai.

Ia, o le agaga lena o lea e fia avatu ina ia tatou manino. A o le saunoaga lena a le Palemia, e le mafai ona i ai se malosiaga o se Tulafono Faatonutonu pe a leai se Tulafono Autu. O le sao lena o le mea, o lena foi tou te silafia. A ua i ai le manatu, ia, o lea ua saunoa manino le Minisita, ia, i lalo o le fautuaga a le Loia Sili ma ua pasia foi e le Kapeneta. O le tulaga lena o lea ua manino. Ia vagana se isi mea lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leai pei o lea sa ou faanoi atu i sina mataupu lava lea ou te fia oo i ai. O la e saolele le saunoaga a le Palemia, e leai se mea o sese. A foi o le mea lena lea foi na i ai i lau folasaga i le taeao, e manaomia Tulafono Autu e fausia ai Tulafono Faatonutonu. A o lea o lau fesili i le Afioga i le Sui Palemia, le Afioga i le Minisita o Tiute, ona o lea e i ai le fuaiupu lea e i le Tulafono Autu 2014, le Tulafono fou lea e soloia ai le Tulafono 1977, e mafai ai ona faaauau pea Tulafono Faatonutonu sa pasia i lalo o le Tulafono 1977. O lea la ou te fesili atu ai, o lea foi sa tali mai le Tamaitai Pule ananafi, e le soloia Tulafono Faatonutonu na. A o lea la e aumai i totonu o le Tulafono

lea, faafetai i lau Afioga i le Minisita o lea e i ai le provision foi lea e mafai ai...

FOFOGA FETALAI: Ia, o lea ua maua lou finagalo lau Afioga i le Sui Taitai. O lea ua maua, o lea ua lagona foi e le Nofoa le mea lea e te saunoa mai ai, a e lailoa lava, o lea foi ua manino. Ae manatu, o lea foi ua maea ona tali mai le Afioga i le Minisita i le tulaga lea. Ou te iloa ua malamalama le tulaga lea pei ona saunoa mai le Minisita.

Se i saunoa mai lau Afioga i le Minisita po o le sao lea o lea ua uma ona e tali i le tulaga lea.

Tofa Lagaia Tiatuu Tufuga (Palauli): Lau Afioga pe i ai se avanoa faamolemole, ona o lena na e saunoa mai e i ai lou avanoa. Faafetai.

FOFOGA FETALAI: Onosai mai lava se i faamaea le fesili a le Sui Taitai lea ona...

Afioga Hon TUALA TEVAGA IOSEFO PONIFASIO: Ia, masalo ua manino lea tulaga. Po o fea lava ta te fetamiai ai, ae faamalie atu i lau Afioga i le Sui Taitai, e le o i ai se vaega o le Tulafono i lalo o le Tulafono 2014. O le vaega lea e te saunoa ai, o lo o i ai faafesili, ae lelei o lea ua e aumaia, o le mataupu tonu lava lena i mea e tau o statue interpretation. O lea foi e i ai le matou talitonuga, o lea matou te tauavea le talitonuga o le Loia Sili, ona o i ina lea e ave i ai le faatuatuaga o le Kapeneta, a o lea foi ou te vaai atu au ia, o la e sao le loia sili. A faapea la o lea e te aumai le tulaga lea tau lava ina ia faanunumi ai le tatou fesilafaiga i le aso. E faamalulua atu, e alu le aso lenei o ta vevesi, ae taatia o lea ua i i, le finagalo o le loia sili ma le tatou faamasinoga.

Tofa Hon Laufo Fonotoe Nuafesili Pierre Laufo: E faamalulu atu...

FOFOGA FETALAI: Ia malie lau susuga i le Sui Taitai, o lea o le a avatu le faaiuga a le Nofoa.

Tofa Hon Laufo Fonotoe Nuafesili Pierre Laufo: E faamalulu atu se e leaga o le upu lea ua aumai, faanunumi, e leai ma se agaga e faanunumi se mea. O le agaga, faamalamalama, faamanino, ae leai se faanunumi.

FOFOGA FETALAI: O lea ua tali manino le Minisita, ma o le tali foi lena. E pei ona ou fai atu, e le o se faamasinoga le mea lenei ua tatou talanoa faale-tulafono. Ae ia outou malilie, o lea ua aumai le alafua ua faataatia e le Malo, o lea foi ua uma ona tali manino, o le a se isi mea a tatou toe agai i ai. O lea e faamalulu atu i lau Afioga i le Sui Taitai ma le tulaga lea, o lea ua

manino saunoaga, ma e le toe solomuli foi i tua le saunoaga a le Minisita o lea ua faaauau.

Tulai mai le sui usufono mo Sagaga Nu 2.

Susuga MAULOLO TAVITA AMOSA: E faafetai mo le avanoa. E le toe taiaina i se lagona ia le finagalo o le Malo ua faaalua. Ae pei o lou tulai atu, o upu masani a le atunuu e tutupu matagi i liu o vaa. Ou te tautala i le tulaga mo le agai i luma, mo le puipuia o le faatuatua ma le faamamaluina o faaiuga fai a se Malo, i le agai lea i luma, ina ia i ai se auala e laveaina ai le mataupu lenei.

FOFOGA FETALAI: Ia onosai mai le sui mamalu se i tulai mai le Palemia.

Afioga Hon Fiamē Naomi Mataafa: Lau Afioga i le Fofoga Fetalai, o se mea e fia faasao. Ua fai soo le lafoga lea, o le puipuia o le mamalu o faaiuga fai. O le a ea se manatu o le Maota i le mea lea e taumafai atu, o le faamamalu o faaiuga ua uma ona fai. O matou fai atu ea e leaga, sa le tataua ona fai. Ua e vaai i ai i aiaiga na e aumai i le Tulafono, faamamalu faaiuga ua uma ona fai, e ui o la e i ai faaletonu o le Tulafono. A o le fai mai soo o le faapea e puipui le mamalu, oi o le manatu o oe e le o faamamalu e matou ia faaiuga fai. E ma e le aumaia se mamalu i totonu o le Maota lenei, e leai se upu a le Minisita po o i matou, e fai atu ai ni lafoga, e faapea sa faaletonu le Faigamalo talu ai, e na o le Tulafono, po o se lape, po o se faaletonu, a o le mea ua uma ona fai, ua alu. O ai lea e laga maia? E laga mai i outou. A o fai atu se upu a le Malo? E leai, e pau le upu a le Malo lea e fai atu, e faamaoopopo mai le Tulafono, savavali i luga o le Tulafono.

FOFOGA FETALAI: Ou te lagona o lea ua manino lau Afioga i le sui usufono mamalu, e leaga o lea foi sa e saunoa ananafi i le mea lava lea. Ou te talitonu foi o lea ua saunoa manino le Palemia, ina ia faamama a tatou saunoaga, e pei o le a afaina ai le Palemene i le tulaga lea. E le o i ai lava se tulaga faapena, ma le isi mea, e le i saunoa lau susuga i le sui usufono. O lea ou te puipui ma ou faasoa atu ia te outou i le alofa atu. Ae tatou lagona uma le taua o tatou i le tatou valaauina, o lea e faafogafoga mai o tatou itumalo. O le mea lea, ua saunoa manino le Palemia, e le o i ai se agaga faapea ua faaleaga se a, e pau lava le mea o le poupu faaleleia atili. O le taua lena, ma o le taofi foi o le Nofoa, e le o i ai se tulaga tou te toe fefinau, leaga o lea o le a tatou fefinau i faaupuga o le Tulafono. A o lea ua folasia i malae le finagalo o le Minisita, o le finagalo lava lena o le Faigamalo. Tulai mai lau Afioga i le Minisita e faaauau lau saunoaga.

Afioga Peseta Vaifou Tevagaena: Lau Afioga i le Fofoga Fetalai, sa tuu atu lava le avanoa se i maea, ona o lea sa aafia i lau lauga analeila.

FOFOGA FETALAI: Saunoa mai le sui usufono o Faasaleleaga 5.

Afioga Peseta Vaifou Tevagaena: E le o se faafinauga, ae na o le fia faaopoopo atu i le saunoaga a le Minisita, ona o le tulaga tonu lava lea na ou avatua. O lea ua taumafai nei e toe faatonutonufolau ia le Tulafono. Ae o le taua ia o le vaega lea na ou avatua o se tuualalo, e tuu i ai ona atoa lea i ai o teuteuga nei. Ona o le mea lea e taoto ai le Tulafono, e le o i ai se limit, e le o limit le incentive. O lea lava e tuusaunoa le incentive i Kamupani. E tataua ona i ai se taimi e faatapulaa ai le agavaa o talosaga a i latou, pe 10 tausaga pe 20 tausaga e mafai ona tuuina atu ai le incentive i le Kamupani, e leaga o lea sa ou avatua.

FOFOGA FETALAI: Malie le sui usufono, ou te iloa o lea e le i oo i ai le saunoaga a le Minisita, e le i maea le saunoaga. Ae onosai mai, o lea ua faasolosolo atu le saunoaga a le Minisita i mataupu sa outou laga.

Ia tulai mai lau Afioga i le Minisita.

Afioga Hon TUALA TEVAGA IOSEFO PONIFASIO: Se i ou agai muamua lava i le faatulai mai foi o le sui usufono lea. O le tulaga e i ai le limiti o incentives po o le tulaga lea ua e saunoa ai. O le mea tonu lava lena e nafa ma le Komiti Faafae. O lea foi na faailoa atu le tulaga o lo o i ai ia Tulafono Faatonutonu o i ina e tapena ai le fuafua lelei a le Komiti Faafae, o sui o le atunuu o lo o i totonu, o tagata atamamai foi, e latou te iloa foi fuafua. A uma le aso o le a se fiangalo o le Palemene pasia le tatou Tulafono, o le a agai loa le Kapeneta ma le Faigamalo i teuteuga ia ua outou timai mai ai, o i ina o le a ave i ai le fai mea lelei, fuafua lelei, o le a tapena mai foi Ofisa Sili o Pulega o Matagaluega, ina ia teuteu lelei tatou Tulafono Faatonutonu, aua le faatautaia o le tatou Malo, aemaise foi tulaga o tiute ma mea faapena. O le a faamauiina fautuaga, aua foi ne i tatala tele. E tele lava fautuaga lelei ua aumai, e pei o le sui usufono o Anoamaa, e toatele lava sui usufono sa saunoa i le aso, ma aumai le tuualalo lea ua 5 au laupepa ia i ou luma, ou te le fia talanoa ai, ona e ese le taua, ae na o lou faafetai. Ou te faafetai i tulaga uma lava, e pau lava se faaletonu lea sa feteenai ai, o lea ua saunoa le Palemia, ua faapena foi ona saunoa le Fofoga Fetalai, o le a ou le toe agai i ai.

O se tala lea ma le faaaloalo lava, Ae tatou galulue pea, e pei lava ona fai atu i le amataga, ia tatou galulue faatasi, ia ta fesilafai, tatou agai i luma, ae aua tatou te tusitusilima. Ma le ava ma le faafetai, o le tala puupuu lea. Soifua.

FOFOGA FETALAI: Faafetai i lau Afioga i le Minisita. Atonu o lea ua faafogafoga atu ma le totoa le paia o le Maota i lau saunoaga ma lau talifuaitau i saunoaga a sui usufono e uiga i le Tulafono Tau Faaofi. O lea foi ua aumai ma le saunoaga, o lea lava ua faamaumau uma fautuaga a sui usufono uma a lea Itu o le Maota. Out e talitonu o lea o le a silasila i ai lau Afioga i le Minisita ma le Matagaluega aemaise o le Kapeneta, aua lava le agai i luma o le tatou atunuu. Malo faafetai i lau afioga i le Minisita mo lau saunoaga.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Ofisa o Tiute 2022 i lona faitauina faalua.

TULAFONO TAU FAAOFI O TEUTEUGA O LE TULAFONO O LE OFISA O TIUTE 2022 – iloiloga auiliili

FOFOGA FETALAI: E talu ai ua ou taulimaina le Tusi Faamaonia i le Tulaga Faanatinati, ua maea ona sainia e le Taitai o le Maota, o lea o le a sagai atu ai loa le Fono Aoao mo le iloiloga auiliili o le Tulafono Tau Faaofi. E tusa ai ma Tulafono Tumau e amata le iloiloga auiliili i le fuaiupu 2.

FUAIUPU 2: Ua faaofiina le fuaiupu 127A fou.

Faamaonia.

FUAIUPU 3: Aiaiga faasaoina ma aiaiga tau soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga

IGOA: Teuteuga o le Tulafono o le Ofisa o Tiute 2022.

Faamaonia.

Na faagasolo le Tulafono Tau Faaofi o Teuteuga o le Tulafono o le Ofisa o Tiute 2022, e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O LE
OFISA O TIUTE 2022 – faitauga faatolu**

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ofisa o Tiute 2022 i lona faitauga faatolu.*

Faaluaina e le Minisita o Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.

**TULAFONO TAU FAAOFI O TEUTUEGA O LE TULAFONO O
LAFOGA O TUPE MAUA 2021 – faitauga faalua.**

FOFOGA FETALAI: Mo le silafia e le Maota, o le Tulafono Tau Faaofi lenei, sa faatinoina lona faitauga muamua i le aso 14 Tesema 2021. Ou te tapa lau Afioga i le Minisita o Tiute ma Tupe Maua.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2021 i lona faitauga faalua, ma ou te fia tautala faamalamalama i ai.*

Faaluaina e le Minisita o Faatoaga ma Faigafaiva.

FOFOGA FETALAI: O le avanoa lenei lau afioga i le Minisita e te saunoa faamalamalama ai.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai, ua maea ona e tafili le agavao faale-Agaga ma e faalele i le lagi, se i toto se fuifui o manu a o folau le Fonousu a le Palemene o Samoa, i lana Fonotaga i lenei itula o le aso.

Ou te manatu o le a fata ia i mauga o ao ma mapu ane i Maota o Tiafau ou sa ma ou mamalu Samoa. Aua o mamalu ua taoto a fefalagai ona faigata lea. Ae le i faasagi i le lagi se lagona ma sufi manatu, e uiga i lenei Tulafono ma ona mafuaaga. E i ai le manatu, e sii lava ma le popoe i le Maota o Samoa, aua e ae liva lava foe o le tautai tulimafua, ae faalepa ma le faaeteete. Aua e fai foi o le galufati ae muliauma ne i ou ta gagau le manu, ae faasiu lava le mata i le galu o lo o faamalumalu mai.

Ou te toe faatulou atu ai i le paia o le Maota, i le afio o lau Afioga i le Fofoga Fetalai, afio lau Afioga i le Tamaitai Palemia, Minisita o le Kapeneta, Minisita Lagolago ae tainane sui usufono mamalu uma o le Palemene o Samoa. Ae ou te ta le liu ae popoe, aua le tapuaiga a lau Afioga i Le Ao Mamalu o le Malo, le Sui Ao, le Faamasino sili faapea le vasega o le Ofisa sili ma Faatonu o Pulega taitasi a si o tatou Malo, ua mafai ona faatasi mai i lenei itula.

Lau Afioga i le Fofoga Fetalai, ina ne i ou tofusua ma ou popona i ia o le moana uli, ae faatuatuanai ai figota o le aloalo. Aua o i na taoto ai le mataiai o Samoa na tali ai le manao ma le galala o Samoa, e ala i lana filifiliga ua mafua ai ona maua se Malo e taitaiina Samoa i lenei vaitau. Tulouna la le afifio o Tupu ma Tamalii, Aiga ma latou Tama, Tama foi ma o latou Aiga, Ituau ma Alataua, Aiga i le Tai ma le Vaa o Fonoti. E tainane foi le pona o fue lafo ma le fue lavelave o Samoa e tausia tapaa ma aiga, faletua ma tausi ma le malosia o afioaga ma nuu.

Ae muliai se faatalofa ma se faafeiloai ma ou faatulou i Susuga i faafeagaiga i totonu o fata e fia i totonu o Samoa ma atunuu i fafo. Aua o tiamalie ia o le Talalelei latou te asia matamatagi e fa, e vivili tau i le lagi aua le upu folafola a le Atua. Aua o le upu moni, e eseese faiva e le tutusa foi valaauina. E matou te fagota i upufai o Malo aua Samoa ma atinae, a o outou faiva e ta le salefu ma feula le magalafu, ina ia mutele le Tala Lelei i agaga o tagata Samoa. O outou o foliga o le Atua i Samoa, o la outou matafaioi ua atagia ai lo tatou faavae, e faavae i le Atua Samoa. Faamalo le tatalo, malo le galulue.

Lau Afioga i le fofoga Fetalai, ua ou tulai atu ma le ava ma le migao tele e tatau ai, e tuuina atu le Tulafono Tau Faaofi o Teuteuga o Tulafono o Lafoga o Tupe Maua 2021 mo lona faitauga faalua.

E manatu o lenei Tulafono, o se taimi muamua lenei, ua susue fuefue ai le tai o Samoa, e ala i le tagofia o mataupu sa, po o mataupu sa tapu i lalo o le faavae. Aua o le faavae o Samoa ua uma ona faataoto e o tatou tuua ua mavae. E leai la se poto po o se vave na te faaopoopo pe toese se mataitusi o le Faavae vagana ai ni teuteuga ua alagata ona fai.

Ua tatou poto ai i lenei itula ona o le tofa na ae i le tatou Faigamalo ua tuuina, ina ia faamalosi le totogiina o lafoga a faifeau tausinau, mai o latou alofa po o faigataulaga a tagata lotu. O lea na suia ai le Tulafono o Tupe Maua ina ia mafai ai ona aoina lafoga a faifeau tausinau mai o latou alofa.

O se tofa na faigata ona taliagofie e nisi o le mamalu o le atunuu, faapea foi nisi o Ekalesia, ma se toalaiti sa faapena ona i totonu o le Palemene i lenei foi vaitaimi. O i latou nei na tulai e tau faailo ia Samoa, ua maea ona momoli le taulaga a Samoa i le Atua. Ua ou faapea atu, o Samoa e faavae i le Atua, o lea na ave ai le faaaloalo i le Auositalaga e tuusaunoaina ai a latou lafoga. Ma e le i aafia se lafoga a faifeau i lalo o se tatou Tulafono Faavae, po o nisi lava Tulafono o Tupe Maua talu mai lona faavaeina i lona tutoatasi 1962.

Lau Afioga i le Fofoga Fetalai, o le suiga ua fuafuaina, e patino tonu lea i le Tulafono o Tupe Maua 2012, o le Tulafono Autu foi lea. O lea sa faia ai se Teuteuga i le 2017 ma faapea ona faamamaluina ai le Tulafono i luga o tupe maua a faifeau tausinu, po o Minister of Religion. O lenei teuteuga na amata faamalosi ma faamamaluina mai le aso 1 Ianuari 2018. Mo le silafia, o nisi o faifeau faauuina, o lo o galulue ma faiaoga faafaiaoga ma tautua i totonu o Ofisa o Ekalesia. Ua leva ona faaee ma totogi a latou lafoga, ae ua na o faifeau tausinu sa tuusaunoaina mai lafoga, lea sa faatino ai le suiga o Tulafono o Tupe Maua 2017, na faaee ai loa le lafoga i luga o latou tupe maua mai o latou alofa, ona o le latou tiute fai pea, o le tausiana o loto ma agaga faakerisiano o ekalesia, o nuu ua latou faanofosea ai aemaise o nuu sa osi feagaiga ai ona o le galuega a le Atua.

Mo le silafia e tele luitau mo le faatinoga ma le faamamaluina o lenei Tulafono, e talu mai ona faamamaluina lona malosiaga aemaise faigata sa i ai, o le aoina lea o lafoga. Implementation and enforcement difficulties.

Muamua, sa feagai le Malo talu ai ma nisi o finagalo faaalua, e faapea ekalesia sa tetee i le faatuina o lenei Tulafono, i lona malosiaga e faamalosi ai le totogiina o lafoga a faifeau tausinu.

Lona lua, e pei ona outou silafia, sa tulai mai faamasinoga sa faapena ona molia ma faatulai ai le toatele o susuga i faafeagaiga, i le faamasinoga faasolitulafono a Samoa. Na manino lava i le faaiuga a le Faamasinoga, le le manino o suiga po o teuteuga foi sa faia i lenei Tulafono, na mafua ai ona faaleaogaina uma moliaga a le Malo sa faasaga i faifeau i lalo o lenei Tulafono. Ina ua maea le suiga po o le teuteuga fou o le Tulafono, sa le mafai e le Matagaluega o Tiute ma Tupe Maua ona faaauuina ma faatino le faamalosiga, le enforcement, le aoina o nei lafoga mai faifeau tausinu. O lea ua savali le 5 nei o tausaga ae ua na o le \$476,0001.09 le tupe ua mafai ona aoina i totonu o le 5 tausaga. Sa faatino foi e lo tatou Malo talu ai i lalo o le malosiaga faale-tulafono o lo o i le Matagaluega o Tiute ma Tupe Maua, gaoioiga o le aveesea pe toesea mai ai tupe mai teugatupe a faifeau taitoatasi, mai a latou tupe teu i totonu o Faletupe.

A fua i ai i le tele o taimi o le Matagaluega e faapea foi ma Konesale faapitoa na auina mai i fafo na te tapenaina lenei Tulafono, faapea ma ni tupe na faaalu ai ae ua le mafai ona faatino le malosiaga o le Tulafono e le Matagaluega, ona sili ai lea o le uiga, ae o le a lava se mafuaaga tataua na faaee ai lenei lafoga i luga o alofa o faifeau.

O le upu lava a le Tusi, ia ave mea a Kaisara ia Kaisara, mea a le Atua i le Atua. Ave le tupe ia Kaisara, ae ave lou loto i le Atua. Ae peitai ina ua tulai mai le tatou Faigamalo fou, ua finagalo le Malo e toe iloilo lenei manaoga o le Tulafono, ina ia toe tuusaunoa tupe maua a faifeau tausinu mai lafoga i luga o a latou tupe maua, ona e talitonu le Malo e le i lava liliu le tofa na faavae ai le faaee o lafoga i luga o tupe maua a faifeau tausinu. Ua avea se fautuaga a se Konesale mai fafo, o ia na faufautua na faapea mai, e tataua ona

totogi lafoga faifeau, ua faatino ai lenei Tulafono. A o le fesili, o fea le tofa mau, le tofa loloto ma le faautaga saili e fetuutuunai ai pe tatau ona fai pe leai? Ae o le pine, o Samoa e ese mai lava Samoa mai atunuu uma o le lalolagi, o lona faavae o le Atua, se i o tatou fesili ane lava pe aisea, na le totogi lafoga ai faifeau, ina ua tutoatasi Samoa ma faavae mai Samoa i le Atua? Ae silafia foi, i lona vaiatai ua silafia e o tatou tuua, le tulafono i le lalolagi atoa, e oo ia Iesu, na totogi lafoga foi Iesu. O lea sa silafia e tatou tuua, ae peitai fai mai latou, e le totogi lafoga faifeau. Aisea? O le tali, e le o le pine ea lona o le tatou mau faaaloalo, amanaia lo tatou faamemelo ma faaeteete ma alolofa i auauna a le Atua, o lo o faamoemoe i ai le atunuu ia latou tatalo aua se manuia o Samoa. O le pine lea e lagolago ai le mau o foliga vaaia ia o Samoa e faavae i le Atua.

Le tatou Faigamalo, ou te faamalulu atu ona o le le iloa tautala, ae ua tatou tagofia le afi, ua tatou tagofia le mea aasa, ne i mu si o ta lima ona tatou toe tauapaapa lea i le iofi ae ua tuai. E manatu lo tatou Malo, e tele nisi auala e maua ai tupe faaopopo ma tupe fou a lo tatou Malo, aemaise le aoina o tupe tuua ua faatuputupulaia ae leai ni mafuaaga tatau. E tele foi lafoga tuua a le mamalu o le atunuu e le o totogiina. O le anava tauave a le Vaega Faaupufai o le Faatuatua i le Atua Samoa ua Tasi na folafolaina, a tulai mai, latou te toe faasolomuli le Tulafono lea. O le tulafono lea ua totogi lafoga ai faifeau tausuu, o lea ua faatino.

Ina ua tulai mai le Faigamalo fou, sa toe faia loa se iloilo ma le faatalatalanoaga ma Faauluuluga o vasega o Ekalesia, sa faapena foi ona auai atu ai le Matagaluga o Tiute ma Tupe Maua, e faapena lou tagata. Ua lagolago foi ekalesia i le finagalo o le Malo, ia suia le Tulafono, ia soloia ai le totogi lafoga o faifeau tausuu.

E talitonu le Malo i le afioga i le Palemia ma le Kapeneta, ua tele ma anoanoai sao o ekalesia i lo tatou Malo, ma ou te le tau tolaulauina atu ua outou silafia, o aoga o le tulaga i le soifua maloloina, ae a le aoina o le itu faale-agaga? O i latou o lo o latou taofimau agaga o tagata i totonu o nuu ma afioaga, o lo o fesoasoani i le tofa ma le faautaga a alii ma faipule.

Lau Afioaga i le Fofoga Fetalai, o suiga nei o le Tulafono Tau Faaofi o Teuteuga o le Tulafono o Lafoga ma Tupe Maua 2020/2021. I lona vaega muamua, o le Igoa Puupuu o lenei Teuteuga, o le a faaigoaina o le Tulafono o Teuteuga o Tupe Maua 2020/2021.

O le Vaega 2, ina ia soloia le faaupuga faifeau tausuu, po o Minister of Religion mai lenei vaega o lo o i ai le faauigaina o upu.

O le Vaega 3 i lalo o le Vaega 61(1) o le Tulafono Autu, ia soloia le parakalafa (g)

O le Vaega 4, ia soloia le parakalafa (10) ma le (11) o lo o i lalo o le Vaega 61 o le Tulafono Autu.

O le Vaega 5, ia soloia le parakalafa (3) i le lalo o le Vaega 93 o le Tulafono Autu.

O le Vaega 6, ia soloia i lona atoaga le Vaega 93 A i le Tulafono Autu.

O le Vaega 7, ia toe tuuina ai totonu o le parakalafa (1) i lalo o le faamatalaga po o le Schedule Vaega A po o le (1) ina ia tuusaunoaina ai tupe maua a faifeau tausinuu mai lafoga.

Lau Afioga i le Fofoga Fetalai, o suiga na ua fuafuaina ma mafuaaga ua alagata ai le faiga o nei suiga i le Tulafono o Tupe Maua. E avatu malu i puega i outou finagalo i se upu foi ua paopapa i sa outou faafofogaaga, e potu lava le tautai ae le atoa i'a i le liu o lona vaa. A o le upu a le Tusi, "O le potu o le tagata, o le vale lea i luma o le Atua." Tatou tuu i le Atua o Ia na te faamalamalamaina si o tatou le maotonu, o Ia e fesoasoani i so tatou vaivai, o Ia foi e faamagalalo i so tatou sese.

Lau Afioga i le Fofoga Fetalai, ia maua lau tofa, faalototeleina pea lau Afioga e le Atua aua le tofia o lau Afioga i ou tiute fai aua le Fono a Samoa.

Faamanuia le Atua i lau Afioga i le Tamaitai Palemia, lau Kapeneta ma le mamalu o le Palemene uma o Samoa. Soifua.

FOFOGA FETALAI: Ua faamalo faafetai saunoa i lau Afioga i le Minisita o Tiute ma Tupe Maua. Ou te talitonu foi o lea ua manino i le faafogaafoga a le Maota le faavae ma le autu foi o le faamoemoe aua foi le suiga o le Tulafono e pei ona folasia. O le mea lea, ia malo lava faafetai, malo tapena, faafetai foi mo le saunoaga malamalama, o lea ua manino mea uma.

O le taimi leni le paia o le Maota, ia, o le avanoa leni e tuuina atu mo sui usufono mamalu foi e fia sausaunoa i le Tulafono ua i lumamea. Ia, o lea ua matau atu e pei lava ua malilie atoa le Maota i le Tulafono.

Tofa Ale Vena Ale: Lau Afioga i le Fofoga Fetalai...

FOFOGA FETALAI: Oi, ia faafetai o lea ua tulai mai le sui usufono o Faleata 4. Ia, saunoa mai lau Tofa Ale.

Tofa ALE VENA ALE: Faafetai i lau Afioga i le Fofoga Fetalai mo le avanoa ua maua e leni sui usufono aua le tatou Tulafono. Ma o lea ua manino le folasaga a le Afioga i le Minisita, aua le tatou Tulafono. Ma e tasi leni Tulafono na matua laualuga ai le feteenaiga o finagalo o le atunuu, o lafoga ia a faifeau. Ma e tasi lea campaign malosi lava na pau ai le faigamalo lea a tatou na i ai nei, o lafoga ia a faifeau. A la lea ua tau le mea lea na fai? Lea ua tulai mai lea ua outou folafola e aveese lafoga a faifeau, lea ua aumai i le Palemene i le taeao leni? Ia o le a la le isi mea e fai ae le tatou ioe loa e aveese? Talia le Tulafono lea ua aumai e le Minisita. Ioe. A o le a le mea e tau ina aveese ai na o lafoga a faifeau tausinuu? Aveese uma lafoga a faifeau. Ioe. Afai loa ua tatou o e tausi le galuega a le Atua, o a uma mea ua tatou foai mo le galuega a le Atua ma faifeau, aua nei tax ina, vaai nisi mea e maua

ai tupe a le Malo e atiae ai lo tatou atunuu, a o faifeau, tuusaunoa aua ne i toe tax ina faifeau.

Ua ou tulai atu ai ma le faaaloalo tele lau Afioga i le Fofoga Fetalai o le Tulafono ua aumai e le Afioga i le Minisita, ua talia e lenei itumalo. Soifua ma ia manuia. Faafetai.

FOFOGA FETALAI: Malo faafetai, faafetai mo le saunoaga a le sui usufono mamalu le alii matua lau Fetalai Ale o Faleata 4, malo le fesoasoani foi i le tatou Tulafono ua malamalamagia lou finagalo.

Ia, e matau atu o lea ua tulai mai se tasi foi o sui usufono matua o le Maota lau Fetalai Hon Tuuu, le sui usufono mamalu mo Siumu, Tuuu Anasii Leota.

Tofa Hon TUUU ANASII LEOTA: Faafetai i lau Afioga i le Fofoga Fetalai mo le avanoa. Faafetai foi i lau Afioga i le Minisita, le Sui Palemia foi e tusa ai ma lenei Tulafono.

E i ai lava le manatu e le faaumiumia foi se faamatalaga, ae o taimi foi faapenei ma aso foi faapenei e tatau lava ona tatou fefaasoai. O lea na saunoa foi se tasi o sui usufono o Faleata, o le mea lea na manumalo ai le Vaega Faaupufai lea, o nai mea lava ia sa faaaoga i campaign, ae tatou te le toe oo i ia mea. Tatou te vaavaai i auala e manuia ai le atunuu. O le Tusi a Paulo i le Ekalesia i Korinito, “A ou tautala i gagana a agelu atoa ma tagata ae leai sou alofa,” ia o lena ua e silafia lau Afioga i le Fofoga Fetalai. Ina ne i lilifa lo tatou alofa i se vaega toaitiiti, ae taatia le atunuu. Na pau lava lena o le mea lea e tau fautua atu ai i lau Afioga i le Minisita ma le Palemia ma le Kapeneta ma le la foi Itu, se i tau silasila totoa. E moni lava e i ai lo tatou... o lea foi e aumai lava le saunoaga a le Minisita i tulaga tatou te faaaloalo ai tele i alii faifeau o lo o faapena ona tatou faatumutumuina i mea uma lava a le tatou atunuu. Ae ou te talitonu foi, o se mea lea sa tau lagalaga mai foi i lou taimi, ae masalo e toatele lava le Itu lenei sa i ai i le Paeaiga lea na tea atu nei lea na pasia ai.

Ae sa ou matauina mai tua, sa ou le fiafia foi i ai ina ua fai lafoga a nai alii faifeau, ae ona ua fai lava le finagalo o le faigamalo pei ona i ai. Ae pei ona saunoa mai le Minisita, aumai uma vaega ia e silasila i ai lau Afioga i le Fofoga Fetalai ma le Maota lenei, i tatou nei e faia tonu.

Ona i ai lea o lou manatu, o sou lava manatu vaivai lau Afioga, o le a le mea tatou te le o ai i le atunuu, fai se referendum po o se tatou pelepesite, fesili pea i le atunuu. Ou te talitonu lava o la e lagona e le atunuu le mea e tatau ona fai. A aumai lava le finagalo o le atunuu, aveese le lafoga lea. Manaia. Aua ou te talitonu foi o le mea lea e tatau ona fai. Ae ia te au lava ia i lou tagata faatauva, le sui usufono o lenei itumalo, tatou e fai le mea lea. Ma lou faaaloalo lava. Manuia le Fono.

FOFOGA FETALAI: Malo faafetai mo le saunoaga a le sui usufono mamalu lau Afioga i le sui usufono mamalu mai Siumu. Se i tulai mai lau Afioga i le Minisita o Faatoaga ma Faigafaiva.

Susuga Hon Laauli Leuatea Polataivao Fosi: Lau Afioga i le Fofoga Fetalai, ioe, leaga ua ou musu ou te faalavelave i le saunoaga a le alii Tiakono. Ae ona o lea ua faalua le saunoaga lea faapea o le campaign, lea sa faaoga e le Vaega Faaupufai lenei. Lau Afioga, e le o se campaign, o le mea sao lava na matou lagona e tataua ona faasao i le atunuu, o le mea lena lea na avatu, ae le se mea foi na faafuaveta na nofo nofo lava feala mai le taeao fai, leaga o le mafatiaga lea na matou iloa, na ou i ai foi ma au, i le taimi na taumafai atu lava, toe tilotilo ma toe vaavaai. Ia lea la ua saunoa le sui usufono mamalu, tatou o i le atunuu. Na tatou o i le atunuu i le taimi na fai ai le mea lea? Tu sasae ae lava i luga fai, leai ma se fesili i faafeagaiga, fai faamalosi. O le ala lea le Maota, faafetai ia Faleata, o le ituaiga leo lena o lea tatou te manaomia i le taimi lenei. Ma o le agaga lena na matou o momoli. E le i momoli ona faapea ia sue ai so matou ai i le atunuu, na momoli mai le fatu ua oia le faavae o Samoa ma le Atua. A lea na outou silasila i ai? O le a le iuga na sau? Ia, lena ua outou iloa. A o le agaga lena, o le faamoemoe...

Tofa Ale Vena Ale: Lau Afioga i le Fofoga Fetalai...

Susuga Hon Laauli Leuatea Polataivao Fosi: Ina ia aua ne i tuuaia faapea ua matou faaogaina le mea lea, oi e le tau faaogaina, o le a iloa uma e faifeau le mafatia.

FOFOGA FETALAI: Ia, o lea o le a afu le saunoaga a le Minisita ae toe tuu atu lea i lau Afioga i le sui usufono mamalu.

Susuga Hon Laauli Leuatea Polataivao Fosi: Ioe. A o le agaga lena ne i te i ua outou pea mai. That's only a small portion o le matou mau na ave, a o le faamalalamaga, toe faafoi. A lea ua saunoa le Afioga i le Sui Palemia e a ia le Tulafono, na omai lava tatou matua tatou matitiva fesagai ae faasao le mea lea ona o le tatou ava i le Atua. Ia, o sau faamanatu lena i le sui usufono mamalu.

FOFOGA FETALAI: Ia se i onosai mai lava le sui usufono, leaga o lea ua taua le suafa o le sui usufono mamalu mai Faleata. Ia tulai mai lau Tofa Ale, Faleata 4.

Tofa Ale Vena Ale: Faafetai i lau Afioga i le Fofoga Fetalai. Leai ua ou tulai atu ma le faaaloalo tele, faafetai i lau Afioga i le Minisita, o le Taitaifono foi o le Vaega Faaupufai o le Faatuatua i le Atua Samoa ua Tasi.

E le seetia foi au i le malu o le tai taeao i le tulaga o lau saunoaga. Ae o le agaga ua ou toe tulai atu ai, ona o au lea na taua le mataupu lea o le campaign, ia o le mea lena e fia faasao o le campaign, ae aua e te popole fua i lena mea ua tuanai na taimi ia. Ia manuia le tatou Fono lau Afioga. Faafetai.

FOFOGA FETALAI: Ia o lea ua uma ona saunoa manino le Minisita lau Afioga i le sui usufono mamalu o lea foi ua uma ona faamanino mea uma, ae le o se tulaga faapena. O le mea lea, ia, lau Afioga i le sui usufono mamalu mai Siumu.

Tofa Hon TUUU ANASII LEOTA: Ia faafetai. Leai na ona ou toe fia... o nai mea fia faasao i le saunoaga a le alii Minisita, leaga o lea na saunoa mai o au o le Tiakono. E 4 tausaga o ou aoga, toetiiti lava faauu au, e faamalulu atu i le Maota, ona ou Tiakono loa lea. E sao le saunoaga a le sui usufono lea, e te silafia foi o lea na avatu lau tala i le amataga, ou te le i i ai, o le ala lea na ou fai atu ai, ave loa i le atunuu, ae le i i ai le aualii ia. Sa i ai le aualii ia ae sa leai se isi e fai i ai le mea lena. Pei lava sa e i ai foi ma oe. Ma lou faaaloalo. Manuia le Fono.

FOFOGA FETALAI: Ia, se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Ia, e taua lava ona o faamaumauga. Ioe. E taua lava. Na matuai tafetotoi lou tino i le fasi toatelega o au i le Tulafono lea. Ioe. Na tulai atu lava e tau puipui ma... ae ui o lea, e sao oe, Im sorry e te le i i ai. Ae malilie ia tatou pasia ia le Tulafono a le Sui Palemia.

FOFOGA FETALAI: Faafetai lava saunoa i lau Afioga i le sui usufono mamalu mai Siumu le alii matua, Honourable Tuuu Anasii Leota. Faafetai foi mo le fesoasoani i le tatou Tulafono.

O lea ua matau atu o lea ua tulai mai le sui usufono mamalu mai Gagaemauga 2, lau Tofa Seuamuli.

Tofa SEUAMULI FASI TOMA (Gagaemauga 2): Ia, faafetai i lau Afioga i le Fofoga Fetalai. Avea foi lenei avanoa e faatalofa atu ai i le paia o lenei Maota i lau Afioga i le Tamaitai Palemia aemaise foi lau Afioga i le Sui Palemia ma le paia o lenei Maota, lau Afioga i le Sui Taitai aemaise foi le paia o sui usufono mamalu o lenei Palemene.

E faatalofa atu foi i le tapuaiga a Samoa aoao aemaise foi o le paia o Samoa o lo o afifio ma papaaao ma silasila mai aua atunuu e mamao. Ia, e tulai atu ma le faaaloalo, e tautala foi ma le faaeteete e fai foi ma sui o lenei itumalo,

aemaise foi o le saofaiga a tama o le EFKS e faaleo atu ai se agaga faafetai e tusa ai ma lenei Tulafono.

E momoli atu le agaga faafetai i lau Afioga i le Minisita i lau Afioga Tuala aua lau Afioga i le Saoalii, aemaise foi o le Minisita Lagolago ma le paia o le Matagaluega. O lena e afio mai le Afioga i le Tamaitai Palemia ma le Kapeneta aemaise foi o le Malo e tusa ai ma le tofa ma le faautautaga ua toe liuliu aua le fetuunaiga o lenei Tulafono.

O le Tulafono lenei ua sailigata se mafaufauga e faauiga ai le Tulafono lenei. Ae i lau tilotilo faa-matai tautua i le Tulafono lenei, ua tatou faatulafonoina le alofa o le Atua ia Samoa. Ua tatou tautua ma le faatilotilo po o le a se tau i o le tautua i le Atua ma Lana aufaigaluega tatalo. Atonu e le o toe po se lilo, e le gata i le paia o lenei Maota, aemaise se faafogafoga tapuai a Samoa i le tulai atu aua le ulufale mai i le Maota lenei. E le gata i lou oo mai o au o le matai matua o le nuu ma le itumalo, ae ua ou oo mai o au o le Tiakono Toeaina o le EFKS. E mafua i se a? O le tali lea o le tautua i le Atua aua le aufaigaluega tofofi o auauna a le Atua. E ese le mea e tau o le faifeau tausiniu, e ese le faifeau ua uma ona faauu ae o lo o galue i totonu o Matagaluega a le Ekalesia po o se Matagaluega a le Malo. Leaga e usu i le taeao e saina, e manava i le afiafi ma saina, a o le faifeau tausiniu, o lana autalavou, o le aoga aso Sa, o mea uma lava, aemaise le soifua faaleagaga aua lo tatou atunuu. O le mea lea e momoli atu ai le agaga faafetai.

O le Tulafono lenei i le talatalanoaga ma tama o le Ekalesia, e momoli lava le agaga faafetai. Faafetai i le laulau a tama o le Ekalesia sa i ai i le taimi ua mavae ua faapea ona penisione malolo manumalo aemaise foi o le saofaiga i tama o le Ekalesia ma le laulau o le Fono Tele aua le lauliliuina o le tofa paia aua le faamoemoe lenei. E faamomoiloto i le tilotilo faa-tagata tautua i le vaai atu i le Faamasinoga o tulai mai faa-ao o le Ekalesia, o latou suki papae, latou suki papae. E faamomoiloto le vaai atu i taitai o Faauluuluga o le EFKS o faatasina i fogalemalo. Na i ai se solo taavale e faaleo atu ai se tuualalo a Ekalesia ina ia aveese le lafoga? E leai. Na i ai se solo filemu na faatino e le EFKS e avatu ai se tuualalo i le Malo ina ia aveese ai lafoga? E leai. Sulu lava i le Tulafono, sulu lava i le amiotonu a le Faamasinoga, a lea ua aumai?

O le Tulafono lenei i le tilotilo faale-EFKS, e ui lava ina faapea o lafoga a faifeau, a o le tele ia o lana aotelega, tele ia o le aotelega sa tilotilo i ai tama o le Ekalesia. A pasia nei le faatulafonoina o lafoga o alofa o faifeau, lona uiga, e alu atu loa ma le faalafoga o faigataulaga, o le isi vaega o le a pulea e le Malo le Ekalesia. O itu tetele ia sa silasila i ai tama o le Ekalesia, o le pulea e le Malo o le Ekalesia. Ae o lo o i ai lava le pulega a le Ekalesia ia aua tulaga e pei ona i ai. O itu ia sa silasila i ai na ala ai ona sulu i le Faamasinoga a o lea ua aumai le tali.

O le mea lea e momoli atu ai le agaga faafetai i lau Afioga i le Taitai o le Malo, lau Afioga i le Minisita Tuala, e le tau selu atu. Afai o Malaola ma

Gafoaga na taunuu i ai ma sunui i ai toai taunuu i ai le Talalelei, malo tofa, malo tofa. Afai foi o Mataniu Feagaimaleata na sunui i ai ave malolosi o le talalelei ma talia e le tupu o le atunuu, o lena e afio mai lau Afioga i le Fofoga Fetalai, aemaise foi o le Sui Fofoga Fetalai aua Faleu ma Utuagiagi. O le mea lea e momoli atu le agaga faafetai, o lea e i i le Malo, lea e i i le Malo. O eleele sa sunui i ai le malamalama o le talalelei, lea ua sulugia ai Samoa. Ae faaliliu i eleele o le sui usufono o lo o tulai atu i le Gagana Samoa le Tusi Paia, lea ua tatou malamalama i ai i le finagalo o le Atua.

E lagolagoina e lenei itumalo toe Teuteuga o le Tulafono e pei ona saunoa i ai le Afioga i le Minisita. Ia manuia le Fonousu a Samoa. Faafetai.

FOFOGA FETALAI: Malo faafetai saunoa i lau Afioga i le sui usufono mamalu mai Gagaemauga 2, faafetai foi fesoasoani i le tatou Tulafono o lea ua manino. Ia, tulai mai le sui usufono mamalu mai Vaimauga 1 lau Afioga Sulamanaia. Tulai mai le sui usufono mamalu.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai e talanoa loa i mea nei o aufaigaluega paia a le Atua, e augata lava tagata, ona e a? Ona o le auauna paia a le Atua, o le sui vaaia o le Atua.

Ae ou te momoli le agaga faafetai i le Afioga i le Minisita e ona le Tulafono ua aumai i lenei taeao, lea ua tatou talanoaina i le Maota Fono. Ae le i faia la se sao o lenei itumalo i le Tulafono ua toe aumai e toe teuteu ma faamatuu ese, e muamua lava ona ou fia talanoa i le tamaliiaga ma le paiaaga o le Maota lenei, le Maota Fono lenei o Samoa, o le Maota Faitulafono Aoa. O le a lona uiga? E fai ai Tulafono. A silasila i lenei Tulafono i le Paeaiga lea ua tuanai na pasia ai lenei Tulafono, ia e maeu foi le tulai mai o le atunuu. Ae o le uiga o lou fia faamamafa lau Afioga e i le Fofoga Fetalai, ina ua pasia e le Maota lenei lenei Tulafono, ia o lona uiga ua tataua ona usitaia e so o se tagatanuu o Samoa, ona e a? O i lea e faia Tulafono. A o le a le tulaga lea na tulai mai lau Afioga e i le Fofoga Fetalai? Lea foi faatoa uma ona saunoa Matautu. Ia, o lena. O le popolega la o le sui usufono o le Vaimauga, leaga o au le isi sui usufono sa matua tetee lava i le Tulafono lenei, o la e alaala mai o Olo ae na pasia loa i totonu o le Maota lenei, na alu lava i le i'a a le faalolo, o le Tulafono a le Palemene lenei.

O le popolega la o le sui usufono o le Vaimauga lau Afioga i le Fofoga Fetalai, ina ua pasia e le Maota lenei lenei Tulafono ae teena e se Ekalesia e tasi lava, tulou, tulou lava le aufaigaluega paia, teena, le lagolagoina. O le a la le tali lea na vaai i ai Samoa, o le a le tali? Ua molia ma tuuina atu i le Faamasinoga. Ona o le a? Ua faatino lava e le Matagaluega o lo o nafa ma le Tulafono lenei le le usitaia o le Tulafono lea na pasia i i. A o ai alo ma tamalii ia e i totonu o Matagaluega ia? O fanau a lo tatou atunuu, e vaai foi latou o faifeau, ae a? Na o lava e faatino ona o le Tulafono na pasia atu i le

Maota lenei. A lea na aumai nei i le taeao le isi Tulafono e toe teuteu ai foi le isi Tulafono. E faapena.

A o lou faanoanoaga la lau Afioga e i le Fofoga Fetalai, o le popolega lava o le sui usufono o le Vaimauga, o le a avea lea faataitaiga ma se isi mea e toe tupu mai i le agai i luma. Ona o le a? Na tatou vaai na solitu le atunuu i le suiga o le foeli, tulou o taavale, na solitu foi le atunuu i le GST, o le atunuu, ae o se Ekalesia lava e tasi, tulou, teena le finagalo o le atunuu e ala i le Maota lenei, o le popolega lena, aemaise o Ekalesia. E alu alu lava solo tetee i atunuu i fafo, e lotea loa mea ia o Ekalesia, tulou, e oti lava le isi, ona o le a? Ona o lona ia talitonuga faa-Ekalesia e tu lava i lana mau. O le ala foi lena o le tele lava o nai isi aufaigaluega paia a le Atua, o la e iloa e tatau ona o e fai lafoga, ae a? Ona o le finagalo o le Ekalesia. O le popolega lena o lou sui usufono, o le tamaliaga ma le paiaaga o le Maota lenei, ae tasi lava se Ekalesia e le i faatinoina le vaega lea.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Malie lau Afioga i le sui usufono mai Vaimauga 1 se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Ioe, e apaapa atu lava i le saunoaga a le sui usufono mamalu leaga o lea e faalogologo le atunuu. I lalo foi o tatou Tulafono Tumau, e le mafai e le Ekalesia EFKS ona tali mai, o lea e taua le upu lea toatasi, tetee le toatasi. A tatou o nei lau Afioga i le Fofoga Fetalai e auiliili le mea muamua, e le na o le EFKS na tetee, tulou le Ekalesia. Leaga e i ai isi Ekalesia na toso faatata e le mea lea. O le mea lea e saunoa i ai le sui usufono e ala faapea na tetee i le Tulafono, na ave i le Tulafono le mataupu. O le a la le tali na aumai i le Tulafono? Malo le Ekalesia. O le tali lena o le le atoatoa o le tapenaga o le Tulafono lea ua taumafai atu nei. Pe tatou te fefaasoai lava pe fetuunai, o le mafuaaga lena o le tulai o le Ekalesia. A lea na tatou o lava i le mea na gata ai mea? Faalua na ave, lea foi na faaoioi atu le sui usufono mai Salafai i le Gagaemauga, a o le mea lena. Ne i taliu ae popoe leaga o la e faalogologo mai. O lau mau, leaga ae ou te le i tulai e fai lau upu i le mataupu lenei na ala ai foi ona pisa, na ou savali uma lava i Ekalesia. E toatele Ekalesia e le na o le EFKS, ae ua toso atu lava ona o le tulaga o le manatu o le Malo na fai. A lea na ou fai atu, na iu le mea i le Faamasinoga. O le a le tali a le Faamasinoga? Malo le Ekalesia. Ae malie o le upu o le tau soo o le suafa o le Ekalesia, leaga o la e matau le Ekalesia, o ala na o le Tulafono Tumau lea sa ou taumafai atu ai.

FOFOGA FETALAI: Ou te iloa o lea ua manino lea tulaga. Ia, e ui lava ina saunoa le sui usufono mamalu o le Ekalesia, e le i taua le suafa o le

EFKS, ia, ae pei o le faauiga a le Afioga i le Minisita ma le faafogafoga a le atunuu ona ua saunoa i le tasi o le Ekalesia.

Ia e pei o itu na lau Afioga i le sui usufono mamalu ia tatou aloalosa foi i le tulaga lea. Tatou saunoa faalauaitetele pea, o a lava tulaga pei ona i ai, ia e faapena. A o le agaga lena e pei ona tulai mai le Afioga i le Minisita, ia, ina ia aua ne i tuuaia na o se Ekalesia se tasi lau Afioga i le sui usufono mamalu.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, e sao lelei, e malamalama tele le sui usufono lenei i Tulafono Tumau. O le ala foi lena e le i taua lava se Ekalesia. E le i taua se igoa, sa tatau ona tulai mai ai le sui usufono lea. Ae lau Afioga i le Fofoga Fetalai, e pei o le manumanuga lena o lou sui usufono. Pei lava ona ou fai atu, o au le isi tagata na matua tetee lava, na matua fai ai lava le sui usufono lenei. Ona o le afaigaluega paia a le Atua. Ae na pasia loa, ia lena ua ou fai atu.

O le agaga la o le sui usufono lea e tau avatu muamua lava lau Afioga i le Fofoga Fetalai, o Tulafono e tatau ona pasia iinei i le Maota lenei, o le a? Na o le submit lava ma le obey. O upu na e ese le manaia. Submit and obey, ma aumai ai se fautuaga ina ia faapena ona tuualalo. E pei ona ou fai atu, ua ala ona faatasina le afaigaluega paia a le Atua, ua le faia le Tulafono lea. Ua le o e fai latou tax pe totogi latou lafoga i le Matagaluega o Tupe Maua, lea la na ave ai loa i le Faamasinoga, ia, lena ua aumai le tali, o le a le tali? E le faamaonia o ni faifeau le mamalu o le atunuu lea. E pei o le tali lena na aumai e le Faamasinoga.

Lau Afioga e i le Fofoga Fetalai, i lenei lava Tulafono ua tatou tuuina mai, e pei ona ou fai atu, e manumanu lava lou sui usufono i Tulafono e pasia i le Palemene lenei, ae le mafai ona tausia pe faaaloalogia e le paia o le atunuu, seiloga e toe aumai i totonu o le Palemene lenei ona toe faapafala lea.

O le isi o vaega a silasila foi i lenei Tulafono na pasiaina, ou te masalo o le 1974 lea na tuusaunoa ai le afaigaluega paia a le Atua, le 1974 i le Income Tax Act ma le Income Tax Administration 1974, lea sa tuusaunoa ai le afaigaluega paia a le Atua faatasi ai ma Le Ao Mamalu o Le Malo. O lea la ua aumai le tou Tulafono i lenei taeao lau Afioga i le Minisita e aveese lafoga a faifeau, ae faapefea Le Ao o le Malo? Na aumai faatasi lava le Ao Mamalu o le Malo ma le afaigaluega paia a le Atua. E pei la e faapena se lagona, o lea ua pei ua lilifa itutasi, ae na aumai ai ma si Ao o Le Malo. A faapea ua outou finagalo e fai, toe aveese ai foi la ma le lafoga sa tuuina atu i le Afioga i Le Ao Mamalu o le Malo.

A matau i le 1977 ae o lea faatoa sui i le 2017, lona uiga pe ua 43 tausaga talu ona tulai mai le faamatuu atu o tuusaunoaina o nai faifeau. O lon uiga, e pei ua umi, ae o le agaga lava o lou sui usufono pei ona ou fai atu, fai ni sao, togi maa uma le atunuu i totonu o le tauatiaeina o si o tatou atunuu. O lea la ua tulai mai e faamuta lea Tulafono, a o le fesili la e avatu i lau Afioga

i le Minisita, e faapefea la le \$47,000 lea na aoina e e na usitaia, nisi o Ekalesia na usitaia ma totogi lafoga?

Lua, e faapefea la Ekalesia ia ma faifeau, tulou, e le i o e faila ni latou tax pe totogi mai le taimi lea na pasia ai mai le 2017 e oo mai nei? E faapefea le vaega lena? O manumanuga lena o le sui usufono. E lagolagoina e le sui usufono lenei le aveese o lafoga ma faifeau, o le aufaigaluega paia a le Atua. E malamalama lelei le sui usufono lenei. A fuafua foi e le o se tagata faigaluega le auauna a le Atua, o le mea foi lena e ala ai ona tau le aiga Sa Levi, aua o Levi e leai se fanua, e leai sona faasinomaga, o le mea lena e ala ai ona tau o le aiga Sa Levi.

A o nai fesili lena e tuuina atu i lau Afioga i le Minisita, a aveese nei le Tulafono lena, o lau ia lava tali, e tatau la ona toe refund uma tupe ia a faifeau ia na totogi lea e maua ai le \$47,000 ia i nai isi Ekalesia ma nai isi faifeau. A o lou ia lava popolega lau Afioga i le Fofoga Fetalai, o ni tulaga mo le agai i luma i toe tetee foi nisi tagata i ni Tulafono e pasia atu i le Maota lenei. O le puipuga lena o le Maota lenei lea e tau avatu ai.

O le isi vaega taua lava e fia tuuina atu i totonu i lau Afioga i le Fofoga Fetalai, o le malosiaga i lau Afioga i le Minisita. Masalo o le Tulafono lea na e afio atu loa ma toe tulai mai taofi loa. Ae mataulia foi oe o mea uma lava e tatau ona tuuina mai i totonu o le Maota lenei e aveese ai Tulafono. Ua i ai se malosiaga faaletulafono i lau Afioga e taofia ai Tulafono ua pasia e le Maota lenei? Aua ana faaauu lava, e oo mai i lenei taimi, ia po ua \$500,000 se tatou tupe e oo mai.

Lau Afioga i le Fofoga Fetalai, saunoa le Minisita i le taeao lenei i lana Tulafono, e le i lava liliu le tofa na faatino ai lenei Tulafono. Ua faanoanoa ai lava, leaga sa ta i ai i le taimi lea. E pei o le uiga lena o lau ia taumafai atu foi i le Tulafono ua tuanai, e pei lava o lea e tuuai le leaga i le tuanai, fai mai e le i lava ona liliu le tofa ma faatino. O lona uiga o le tofa a ai lea na fai ai Tulafono ia, lea na pasia i le Paeaiga? Ae a silasila lau Afioga e a le Fofoga Fetalai, e pei ona ou taumafai atu i lenei taeao, e le i faapea e faatusatusaina le aufaigaluega paia a le Atua, tulou, i isi ia e faigaluega. Leai o tagata lava ia la e faigaluega e tatau lava ona totogi le lafoga. A o le amiotonu ma le fai o le mea sao, ia lena lea e taumafai atu ai lau Afioga i le Fofoga Fetalai. O le a le Tulafono? a o le a le malosiaga i lau Afioga na taofia ai le totogi lafoga o faifeau?

E faaiu atu se faamatalaga a lenei itumalo lau afioga i le Fofoga Fetalai, e lagolagoina e lenei sui usufono le faamutaina o le totogiina o lafoga a le aufaigaluega paia a le Atua. Ae o le tuualalo lena e tuuina atu i lau afioga ma le faamalumaluga o le Maota lenei mo le agai i luma, ia mafai ona usitaia pea e so o se tagatanuu o Samoa Tulafono e pasiaina atu e le Maota lenei.

Ia manuia lau afioga i le Fofoga Fetalai ia faapena foi le faafofogaaga a le Maota.

FOFOGA FETALAI: Malo faafetai saunoa i le sui usufono mamalu o Vaimauga Nu.1, faafetai mo le faasoa. O lea foi ua manino mea uma i fautuaga ua tuuina mai. O lea foi ua lagolagoina le Tulafono, ia ae o lo o aumai foi ma fautuaga mo le agai i luma ma le tatou galuega e tausoa faatasi ia le tatou avega.

O le mea lea faafetai saunoa. O lea ua matau atu o lea ua tulai mai ia le sui usufono mamalu mai Anoamaa Nu.1 lau afioga Alaiasa.

Afioga ALAIASA MOEFAAUOUO MALAGAITUTOGIAI SEPULONA MOANANU: Lau afioga i le Fofoga Fetalai, faafetai mo le matou avanoa. Momoli le agaga faafetai i le Afioga i le Minisita, ia ua lologo lava i le papalologo, logo foi faa-Tutuila le folasaga a le afioga i le Minisita. Ia ma toe faatepa tatou i le vanonofo ai ma le Atua, ia aemaise o le afaigaluega tofofi a le Atua ia ma le Faavae ua faavae i ai le tatou atunuu.

E manatu e leai lava se isi e faasala ese ai i le tulaga lea o le tatou atunuu ma le faamuamua o lo o i ai o le Atua lea ua faavae i ai Samoa, le Atua le Tama, le Alo ma le Agaga Paia. Atonu foi o i o le punavai lea o manuia, faamanuiaina ai si o tatou atunuu. E ui ina e pei e itiiti ae tele ia o le aafiaga ma le alofa o le Atua i le soifuaga ma le olaga o nai o tatou tagata. O lo tatou faatuatuga lea faakerisiano leaga e tele isi atunuu e ese foi ia o latou atua ma latou talitonuga. Ua o tatou vaavaai la i ai i mea e faaii i ai le eseese o talitonuga? Ia e tua i le vevesi, e tua i le fetuatuanai. O taua ma femisaiga.

Ae peitai ane o Samoa, e tulaga ese lava le faamoemoe ma mea e i ai. O le mea lea e eseese ai afioga i le Minisita. Ua gasea lava le uta e tauoo i tua i le faamalamalamaina o lau Tulafono ua aumai nei. Ae sa ou fesiligia le afioga i le Failautusi se i toe aumai lava le Hansard lea sa fai ai lau lauga e faamaonia ai lau mau, o au le isi tagata sa fai lau lauga sa faalefiafia ai le Vaega Faaupufai ia te au.

Ioe, leaga sa ou alu i tua i le matou nuu ma le itumalo ma ou talanoa i faifeau e aafia i i i le Tulafono lea. O le ala foi lea ou te tulai atu ma le faaaloalo e pei ona saunoa nisi o sui usufono, e ui lava i so matou naunautaiga i lene vaitau, ae a pasia loa le Tulafono, ia aua o aga ia o le tatou Temokarasi lea e tatou te o ai. O le numera, a sau loa le numera ua fulisia, e ui lava na i ai ma le autetee la e i ai, a ua fulisia, tatou o e fai lene.

Ia na ou nofonofo lava lea ma ou tatalo i le Atua, ou te matauina ia tualumaga ia e saunoa i ai sui usufono, o mea na tutupu i le maota lea e i gatai. Ua ta vaavaai mai ia, i le paia o le afaigaluega ma i latou ia ua faapena ona agai i le maota lea, ia e faafesagai ma nei Loia se i tulou lava. O le afaigaluega a le Atua e le o faafesagai ma i tatou na faia le Tulafono, ae faafesagai ma sui o le Ofisa. O se vaaiga ia te au ia, sa ootia ai lava le loto i lene taimi.

Ou te le talanoa foi i se ekalesia leaga e le o faapitoa se Tulafono i se Ekalesia. O lo o faapitoa le Tulafono i so o se faifeau tausuu. Ia o upu lava

a le atunuu leaga a ou sau mai tua i le matou nuu o Falefa i le afiafi, e eseese mea e goto i ai le la. O le isi vaipanoa o le matou auala ua gotouga i le moana. O le isi itu ae oo mai i i e goto i tuamauga. Ae tasi lea taimi manaia o le olaga e manaia i lau matau. O le taimi e goto ai le la. Pe o fea e goto ai po o tuamauga po o gotouga i le sami, e sue lava e le la le mea e toe oso mai ai i le taeao. E sau ao o nuu, totogo malama, ia lea la ua i ai le taeao lenei, lea ua i ai le taeao lenei.

O le upu Faa-Peretania, we do not live in the petrol darkness, the sun will always rise again. E faapena le agaga o le matou usugafono, o lea ua aumai malama. O lea ua toe teuteu le Tulafono, ia aua ia ne i, i le la itu pei o... afai nei ae faaiugafonoina le tatou Tulafono, o le Tulafono na fai uma lava e tatou. O lea o le a tatou malilie faatasi e tatou te o e fai le mea sili i le taimi lenei ma le agai i luma ia aua le faamoemoe.

Ia sa fai le tatou semina, o au lea na fesiligia le tamaitai Ofisa Sili, se i aumai lava se fuainumera o se tupe talu mai na faavae le Tulafono. O lana numera na aumai mo le tolu tausaga lea na tuanai atu, \$450,000. O lona uiga a tuu i le tausaga faaletupe, \$150,000 i le tausaga. E .0002 o le aofaiga o tupe maua a Samoa i le paketi le tupe lea e tatou te vevesi ai mai i le lafoga lea ma le Tulafono lea. O lona uiga, si tamai vaega lava o le tatou tamaoiga lea na o tatou maua mai i i lafoga a faifeau. E le o se tupe tele. E te fuafua foi la i le tupe maua, ia ma le tau e ao ai, e le iloa pe sili atu le tau e faatulaga e le Matagaluega e ao mai ai, ia na i lo le tupe lea e maua.

Faafetai i lau afioga i le Minisita ia ona ua toe liuliu se tofa. Ia o le mea lea e saunoa i ai le isi sui usufono faapea o le campaign, ia e sao sa aumai i le tou menifeso i le tulaga lea a tulai mai, ia ua o tatou oo i le tulaga lea. Ia faafetai, ae ana faapea e tulai mai ia le matou Vaega, o lau fautuaga lea e ave i ai, soloia uma lava faifeau uma lava ma so o se ituaiga faifeau. Leaga e 4 tausaga pe 5 tausaga e aoga ai i o i Piula po o Malua e tutusa lava le auala na oso mai ai e fai ma faifeau.

Ioe, e i ai se mea pe toe silasila ifo le tatou Malo, pe le mafai ona toe faalautele ane, o le faifeau lava e faauu loa ua uma lana aoga, ua i ai le faauuga a le Atua e fai ai ona tiute. Ia e pei o se matou lea sao e tuutuualalo atu ai i le faigamalo, ia ma o matou agaga faafofoga mai ia le paia o le aufaigaluega, ia afai foi ua sala uta ia tonu tai ia aua le agai i luma o le tatou atunuu.

Ia ma le agaga faaaloalo, ia manuia lau afioga i le Fofoga Fetalai, manuia lenei Maota, manuia foi Samoa o faafofoga mai.

FOFOGA FETALAI: Ia, ua faamalo saunoa i lau afioga i le sui usufono mamalu mai Anoamaa Nu.1 lau afioga Alaiasa, faafetai mo lou sao. O lea ua manino mea uma aemaise foi o le agaga o le Tulafono e pei ona faataatia nei i le paia o le Maota. O le mea lea malo le saunoa.

Afioga LEAANA RONNIE POSINI: Lau afioga i le Fofoga Fetalai...

Afioga MASINALUPE MAKESI MASINALUPE: Lau afioga i le Fofoga Fetalai...

FOFOGA FETALAI: Ia se i fesuai foi ia tatou itu, o le a tuu atu i lea itu i le sui usufono o Lefaga ma Faleaseela. Saunoa mai lau afioga.

Afioga MASINALUPE MAKESI MASINALUPE: Ia faamalo le onosai, faafetai foi i lau afioga i lenei foi ituaso o le tatou Fonotaga. Ia e tulai foi ma le faaaloalo e solituina ai le mamalu o le Palemene, e momoli foi se sao o le matou itumalo aua lenei Tulafono ua toe lauililiuina.

Ia ou te manatu o lea ua oo uma saunoaga a nisi o sui usufono i le mafuaaga foi o lenei lava Tulafono. E na o se 2 lava Vaega ou te toe faatepa i ai le Maota aemaise o ni ou manatu.

Muamua o le Fono Faavae, e pei ona tulai mai ai ia uluai palemia sa o latou tauaveina tofi ia i totonu o si o tatou atunuu. A ou vaavaai i le tulaga e pei ona sa amata mai ia Mataafa Faumuina Mulinuu II, e le i i ai lava se taimi sa tau lotea ai lea Vaega. Faasolo mai lava ia Tupua Tamasese, e le i i ai lava se tofa i lea Vaega. Tupuola Efi, Vaai Kolone, Tofilau Eti Alesana, Tuilaepa Sailele, lea faatoa lotea ai le Vaega lea. O sou lagona ma sau fesili, aisea lava na le afea ai e nei Taitai o le tatou Malo ia lafoga a faifeau?

FOFOGA FETALAI: Ia ou te fesoasoani atu i le sui usufono mamalu ona o lea ua taua suafa o Taitai o le atunuu ua tuanai, e i ai foi le faaeteetega o le Nofoa ma o tatou taua suafa o Taitai o le atunuu ua tuanai. E i ai le agaga o le Nofoa ia o tatou ave pea ia le faaeteetega ma le faaaloaloga i e na mua i malae ma taitai le atunuu, ia leaga o lea ua o tatou agai mo le lumanai.

O lea ua o tatou agai i luma. O le fesoasoani atu lea i le sui usufono mamalu.

Afioga MASINALUPE MAKESI MASINALUPE: Faafetai i lau afioga ua talia foi ma le agaga faaaloalo. Ia ona o le faaauau pea le tulaga ae le toe taua ia suafa, e le i afea lava i se finagalo po o se tofa ia lea Vaega.

Na ou manatu ai lea, e le o se agaga na oso ina ia maua ni tupe a le atunuu na mafua ai ona le afea i se latou tofa. A o le matau i le Atua, o le matatau. Na ou manatua ai le tala ia Mose i le taimi na leoleo mamoe ai. E savali atu Mose ae la e mu le laau, lea e taua i le Tusi Paia ona afe ane ai lea e maimoa, e maimoa. O le a le mea sa oo i ai? E tilotilo atu Mose i le laau e mu ae e le faaumatia.

FOFOGA FETALAI: Ua ou vaelupeina le saunoaga a le sui usufono mamalu, talu ai ona o lea ua o tatou taunuu i lo tatou taimi malolo, o le mea

lea e faamalulu atu ai i le sui usufono mamalu, ia o le a faataatiaese galuega a le Fono Aoaofaitulafono mo lana malologa.

Na faataatiaese Taulumaga a le Fono Aoaofaitulafono mo lana malologa masani i le itula e 3:45 i le afiafi ma toe faaauau i le itula e 4:21 i le afiafi.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

E matau atu o lo o lavapapale pea le tatou Maota i le faagasologa o le tatou galuega. Faamalo le onosai i le paia o le Palemene. Ua sao i alo ia le taligasua ma le tautege, e talitonu foi ua maua se faasiliga malosi e faamaea ai le tatou galuega i lenei afiafi.

E faataatiaese ia le tatou Taulumaga mo le tatou malologa o lo o saunoa le sui usufono mamalu mai Lefaga ma Faleaseela. O le avanoa lenei i lau afioga i le sui usufono mamalu, tulai mai e faaauau lau saunoaga.

Afioga MASINALUPE MAKESI MASINALUPE: Faafetai i lau afioga i le Fofoga Fetalai mo le avanoa faaauau. E talitonu o lea sa oo tonu lava ia lau faamatalaga i le toaina lea o Mose. Ae e i ai foi la ia lau talitonuga, ia e pei o le a taatia ia Mose ou te talitonu e tau le maua i ai se malamalamaga o nisi o sui aoao fesoasoani o tuu mai i o i le la pito.

Ae o e pau lava le mea na ou fia taua ai le tulaga lea o le laau e mumu ae le faaumatia. O le uiga loloto lena o le matautia o le Atua. O le Atua e leai lava se isi e faataumatatao ae o le a ou alu ese mai i i le tulaga lea.

O lou manatu lona lua i te i ua faauma atu ai ma lau lauga, o le va o mea tau feagaiga. Ia e pei lava ona maua i si o tatou atunuu, o le feagaiga a le tama ma lona tuafafine, ia e matua tausisi lelei ia lea vaega. E faia i luga o le faaaloalo ia le va fealoaloai. E le mafai ona soona soli fua i luga o le tulaga o le vanonofo.

Ia o le lua o feagaiga o le feagaiga a le Atua na osi feagaiga ai ma lona nuu o Isaraelu. Ia o le popolega lava ina ne i soli e tele lava na soli e Isaraelu ia le latou feagaiga, ia e fai lava ma aoai e le Atua, aoai. E faatino foi lea e auala mai ia Asuria e avea ma aupega e faatoilalo ai ia lona nuu filifilia. E pei o faasalaga ia e masani ona faia e le Atua i lona nuu pe a fai e soli le feagaiga.

Atoa ai la ma le feagaiga mulimuli ua ou aumaia, o le feagaiga i le va o le Ekalesia ma le Feagaiga taulagi po o le faifeau. E tasi lea feagaiga e ese e tulagaese i totonu o nuu afioaga ma alalafaga. Leaga o le upu lava a o tatou tuaa e aua e te faamasinoina faifeau. E faamasino e le Atua lana auauna. Ou

te talitonu o le tele na o isi ua le iloa le va ma le faifeau ia ae o faafeagaiga taulagi ua uma ona faauuina. O sui vaaia o le Atua.

A tuu mai foi la i le tulaga e pei ona i ai le tatou... e le tatau lava i lou talitonuga ia ona faia lea Vaega. Ou te iloa e ioe faatasi i ai latou uma o e ua talitonu i le Atua ma Lona finagalo i sui vaaia ia o le Atua. E le mafaia ona toe faatinoina le Vaega lea.

Ia e pei o sou lava manatu e faaalua i tulaga e pei ona i ai, ia e aveese ia lea Vaega i lafoga a faifeau. Ou te talitonu foi o le lagona lava e tasi, ae e i ai le manatu a uma loa le lauga lea a Lefaga ma Faleaseela, ia ona faatu mai loa lea o se lafo e pasia ai lenei... ae o tatou faagaioi i se isi Vaega. Ia aua o lea lava e toafilemu lava ia le tatou fono ae ia alofagia e le Atua ia le tapuaiga a nai o matou faafeagaiga i tua i Lefaga, ia o lea lava ua faaleo. Sa outou fesili ia te au, po o le a lau mea e fai, ae ou fai atu I was born to fight for this issue. O le issue la lea e aveese, o lafoga a faifeau e le fetai.

Ia manuia le tapuaiga, manuia lau afioga i le Fofoga Fetalai, manuia foi le Kapeneta le afioga i le Palemia, o le Sui o le Taitai o le la Vaega ma le aupele, aemaise o le Loia Sili ma Ofisa Sili o Pulega o Matagaluega ia ma le tatou Palemene atoa. Ia manuia lenei aso.

FOFOGA FETALAI: Ia ua malo le faasoa, malo foi le saunoa i lau afioga i le sui usufono mamalu mai Lefaga ma Faleaseela. Ia atonu foi o lea ua agia ia le lagolagoina o le Tulafono. O le mea lea malo faafetai.

Afioga LEANA RONNIE POSINI: Lau Afioga i le Fofoga Fetalai...

FOFOGA FETALAI: Ia o lea ua tulai mai le sui usufono o Safata Nu.1. Ia tulai mai lau afioga i le sui usufono mamalu

Afioga LEANA RONNIE POSINI: Ia faafetai tele i lau afioga i le Fofoga Fetalai, ae e fia faaalua foi se manatu o lenei itumalo e ala foi i le Tulafono.

Ia ou te faafetai i le afioga i le Minisita e tusa ai ma le Tulafono ua e folasia nei i le Palemene. Ou te talitonu foi e le auese ai foi se manatu o lenei usugafono i le saunoaga a lau afioga. E talitonu foi o le tatou atunuu ua leva ona faavae i le Atua a o lea na faatino e le Paeaiga lea talu ai, ua tuu i totonu o le tatou Faavae. E faavae ai ia le tatou atunuu i le faakerisiano.

Ou te talitonu foi o le tatou faaeaea i Susuga i Faafeagaiga o tausia ia o tatou nuu, e leai lava se isi o lenei Maota ma o tatou afioaga tatou te le o faaeaea i o tatou Susuga i Faafeagaiga. E le o se mea e le o faaeaea uma i ai le atunuu lenei. E faapena uma lava. O tatou uma lava e tausia ia o tatou Susuga i Faafeagaiga e i ai foi ia o tatou vatapuia i totonu o afioaga.

Ae e i ai lava le taimi na i ai nai tuufesili, o au foi na faia le tala lea, e malu ia le Ekalesia i le aganuu. Ia ae e pei e tau mau eseese ai isi Susuga i faifeau.

Ae o lou talitonuga lena, e malu ia le Ekalesia i le tatou aganuu. O le faaeaea lena o le tatou atunuu i le Ekalesia. O tulaga foi o... e sao lelei lava saunoaga a lau afioga i le Minisita, e eseese uma lava tofiga ma valaauina o tatou e le Atua. O nisi lea ua totofi e fai ma faifeau e talaiina le finagalo o le Atua. O nisi foi o tatou ia o lea ua o tatou sui usufono. O isi foi ua tulaga eseese uma lava. E oo foi i se teu auala lea e... o le valaauina a le Atua.

O lau lea faitau, o tatou uma lava o auuana a le Atua. Pe o le a le galuega o lo o e galue ai, o tatou o auuana a le Atua. Afai o lea ua o tatou talitonu e oo lava i nei tofi i lenei Palemene e tofi mai i le Atua, o lona uiga, o tatou foi o auuana a le Atua.

Ae o lau autilo foi i mafaufauga foi o le Tulafono, ia i lau faitau, e nofonofu lava ma matau silasila foi ia le tatou Palemene i suiga o le tau lea ua i ai, e le o toe tumau lava se mea. E tele ia o le suiga lea ua agai i ai ia le suiga o le tau. O suiga lea o le tau ua suia atoa ai ia le tamaoaiga o le lalolagi, sui ai foi ia taaviliga o faigamalo.

Ia ona ou toe tomanatu foi lea i le faamai oti lea ua maua ai le lalolagi, ou te le iloa foi pe o afea e alu ese ai ma le lalolagi lenei. O le tasi lea mea ua matua sui atoa ai ia faigamalo a le lalolagi ma latou mafaufauga ma latou talitonuga e atinae ai Malo. E pau lava lea o lau tau faitau i ai i le vaai lea i ai. O lou foi lea manatu, e tatou te faia lava so o se mea ina ia maua ai le Viiga o le Atua. E tatou te le faapito e faapea e fai se mea e le viia ai le Atua. O mea uma lava, e viia ai le Atua i a tatou galuega e fai. O le ala lea o lou talitonuga.

Ae e silisili foi ona ou faafetai i lau Susuga i le Minisita, o lea ua e saunoa manino lava. Na oo lava i lo tatou Alii Faaola sa totogi Lana lafoga. A ou nofo ma mafaufau o le Alii Faaola o le Pule Aoa, o le Silisili Ese, na faia le lagi ma le lalolagi ae na totogi le lafoga. O lou lea manatu, e tele ia o le feau o le Talalelei lea e aumai ai. E le i nofonofu lo tatou Alii Faaola ma le Silisili Ese, o le Pule Aoa na faia le lagi ma le lalolagi na totogi Lana lafoga. E tele le Talalelei la e mulimuli mai ai.

E mulimuli lea o se matou tala, o lea ua e saunoa lau afioga i le Minisita, o lea e tele isi mea e saili ai ia tatou tupe. Ia ua au atu i ai ia lou manatu, ae faapena se vaivaiga o lenei itumalo aua e le o toe tutusa le tulaga o le tamaoaiga o le lalolagi ua i ai i le taimi lenei. E tatou te ofo lava tatou e tuuina ia o tatou loto ma o tatou tagata, e tautua ai lo tatou atunuu.

Ia manuia le Fono.

FOFOGA FETALAI: Malo faafetai, malo saunoa i lau afioga i le sui usufono mamalu. Malo foi le faasoia i ala o le Tulafono ia ae o lea lava ua auga lava i le lagolagoina o le tatou Tulafono.

Ia o lea e matau atu ua tulai mai ia le sui usufono o Falealupo, saunoa mai le sui usufono mamalu.

Afioga FUIONO TENINA CRICHTON (Falealupo): Faafetai i lau afioga i le Fofoga Fetalai aua foi lenei tauafiafi, ua pulapula lagoto foi le fetu i lona nofoaga. Ua agi malu foi le savili ia aua le Maotausu o Samoa. Ia aua le taeao na liulua, ia aua le Fonotaga mamalu.

Ia e fia fai foi se sao o lenei foi itumalo ia aua le tulaga o le Tulafono aua lafoga a faifeau so o se faifeau. O le tagata lava ua ave a o le faifeau, ia o laei na o le Tulafono lea ua taumafai mai.

Faafetai i lau afioga i le Minisita, faafetai foi i lau afioga i le Palemia, ia aemaise o le Pulega. O lenei foi mataupu ua laga, ua se mataupu ua lagona uma foi e le Maota lona matagofie aua e tilotilo lo tatou taimi mo a taeao aua le savaliga o faigamalo, ia aua foi lenei vaitau e pei lava ona maua i nisi o finagalo, ua le o toe faigofie nei aso. Ia aua o le mea moni lava, ana faapea lava e tumau lafoga a faifeau, ou te fiafia foi au ia i ai. Ae ana o lea ua o tatou iloa, ma lona faasologa o le taimi ua tele lona suiga.

O lea la ua aumai lenei mataupu matagofie i luma, ia o lo o faafogafoga mai foi si o matou itumalo o Falealupo, o le nuu e 8 faifeau. E leai lava se isi e le i tomumu, e le i fiafia i le tulaga i le pa atu o le tala, ua pasia tulaga o le fai lafoga a faifeau. Ia o mea lava ia e le toe tau faamatalaina. Na oo lava i faamasinoga o faapena, oo lava i tulaga e masofa ai le nofolelei o Ekalesia aemaise foi le va ma le Malo, ia ua le mafai lava ona toe tuutuu lata mai. Ma ou te talitonu foi i sou lagona, a pasia foi lenei Tulafono, [.....]. Ona o tulaga o le mea ua i ai lo tatou faamoemoe i se mea mo a taeao. E faafetai foi i le Itu Agai, matagofie lauga o lenei aso, fetuunaiga o fua aua e pei lava ona moni i le tulaga o saunoaga, e faigata se mea ua pasia i totonu o le Maota, ae toe taumafai. Ae faafetai i le lototele o le Minisita ma le faiga o lenei fuafuaga, ua atagia ai le matagofie, a o faagasolo le faaiiuga o lenei aso ma le pasiaina o le Tulafono. O le mea, i se leo o lenei itumalo o Falealupo e le umi, e lagolagoina ai le tulaga o le Tulafono aua lona faamoemoe. Ma lou faaloalo.

FOFOGA FETALAI: Tulai mai le sui usufono mo Faleata Nu 3.

Tofa Lealailepule Rimoni Aiafi: E le i fia faalavelave i le saunoaga a le sui usufono. E pau lava le mea lea e fia oo i ai se faamatalaga, o le vaega lea o le saunoaga faapea, “a pasia le Tulafono lea ua toe manuia le siigamai, ou te le o maua lelei po o le a le uiga o le saunoaga lea. Afai o mai Tuilaepa o le Taitai o lenei Vaega ona o le Tulafono lea, e leai e sese lenei faamatalaga. E tatau ona ave i tua, faamolemole lava.

FOFOGA FETALAI: E i ai foi le lagona o le Nofoa, leaga o lea ua taua tulaga ia i le sui usufono mamalu, e moni lava e le i taua le suafa, a o lea ua taua mai e lea Itu. O le isi mea, e toa lua la e sii gasegase i Niu Sila. O lo o i

ai foi le faamoemoe i se tasi mo Niu Sila i se taimi lata mai. E i ai le manatu faapea, e faamalulu atu i le sui usufono mamalu, soia ia tatou te taua lea tulaga O lea ua uma ona ave le tatou tatalo i le Atua e tapuaia ia siiga gasegase a auauna ma o tatou uso sui usufono.

E a, e toe faaui i tua au saunoaga?

Tofa FUIONO TENINA CRICHTON: E leaga o lea ua taua le igoa o le Afioga i le Taitai o le Itu Agai, leaga o le toa na faia le Tulafono, o le ala lena o le agaga, ou te faaamua ai ia te ia ma lona taimi na fau ai le Tulafono lenei. O la le ua sii gasegase le toa i Niu Sila, o le mea taua lena. Ma lou faaaloalo manuia le aso.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, e faatu se lafo, e le logomalie saunoaga ia, faauigalua. E pau le agaga lea sa tulai atu ai, e lagolagoina le aveeseina o faamatalaga ia “siiga gasegase leaga e tasi le Itu lenei o lea e ave le Taitai”, ae toalua outou. A o lea ua toe saunoa, o le toa na faia le Tulafono lenei, o lea ou te talosaga i lau Afioga i le Fofoga Fetalai, aveese ia saunoaga faauigalua, lau afioga.

FOFOGA FETALAI: E i ai se isi e faaluaina le lafo, faaluaina e le sui usufono mo Faleata Nu 3.

Ua fai le faaiuga a le Nofoa o le a faataatiaese ia lafoga. E manatu foi...

[Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Falealupo: *“Ia ua ou lagona o le a faasolosolo manuia le gasegase o lo o agai atu i fafo.”*]

Tofa FUIONO TENINA CRICHTON: E pau lava lea o le mea ua misi ia i latou lea faalagiga lelei e tuu i le tama sa i ai i le Nofoa, ma le faaaloalo.

FOFOGA FETALAI: Ou te talitonu o lea ua manino lou finaglao, o lea ua aumai aua le tatou Tulafono, malo saunoa i le sui usufono mamalu mo Falealupo.

Saunoa mai le sui usufono mamalu o Faleata Nu 3.

E faamalulu atu i le sui usufono mamalu mai Palauli Nu 3, faafetai ua maua mai, ua e sauni e te tulai mai. O lou avanoa lelei lenei, le sui usufono mamalu mo Palauli Nu 3.

Tofa LAGAAIA TIATUAU TUFUGA (Palauli 3): E faafetai i lau afioga mo le avanoa, e faafetai foi le faaaloalo i le afioga i le sui usufono mamalu mo Faleata Nu 3.

E manatu ua taoto i pagamalie le aleiga a tautai ma tama tauvao. E ala i le tofa saili ma le utaga loloto aua lenei mataupu ma le tatou faamoemoe e pei ona i ai. O le Aso Sa lea o le a sau nei, e amata ai le vaitausaga o le Fagafulu. A ou manatunatu foi i le uluai tagata na agasala, e tele lava le faaletonu na amata ai lea mea. Ina ua tilotilo ifo Atamu o le vaa o mala le mea, ua faalumaina ona o le agasala e mafua i le le usitai. Ona toe nofonofo lea o le Atua ma mafaufau ma le faanoanoa tele, tausaili se auala e toe faasao mai ai le lalolagi, aemaise o le Palealii o ana galuega mai le agasala, ua toilalo ai talu le tiapolo ma ana faaosoosoga.

Ona fafau lea e le Atua le polokiki, leaga o le taimi lena sa polokiki tele le Atua, mafaufau lea o le Atua i se polokiki e toe faasao mai ai lana fanau. Ona fai atu lea o le Atua i le agelu, e alu e fai ia Maria, o lea o le a to, ma fanau mai lea o se tamatane e faaigoa ia Iesu, fai mai Maria...

FOFOGA FETALAI: E faamalulu atu i le sui usufono mamalu, ua faaauau lau lauga ae ua mamafa lava i le Nofoa le upu lea e taua ai le Atua. E i ai le manatu, malie le sui usufono, toe silasila lelei, o upu lava ia o upu a tatou faalelalolagi nei, ia e i ai le manatu faapena, e i ai le tatou vatapuia. Lau Afioga i le sui usufono, o le tulaga lena.

Tofa LAGAAIA TIATUAU TUFUGA: E pei e ala foi ona tautala i lea mea, o se mea sa toe fafau e le Atua, ae le afaina. O le a faapuupuu le faiga o le tala, o le a taatia aua le toe taua le polokiki. A o le finagalo lea o le Atua, ina ia foai lona Alo lea e toatasi, ina ia ave e togiola ai ma faasao mai le lalolagi mai le agasala, e pei ona pau ai le uluai tagata. A tatou matamata i ai e le faigofie lea mea, na ofo lava le soifua o le tatou Alii Faaola, ina ia magalo ai tatou. O le ala lea o le tatou saafi, fatafata i le fatafata le Palemene, sootauau Samoa ma le lalolagi, ona o le galuega faaola a Iesu Keriso, na mafua ona o le alofa mutimutivale o le Atua. A tatou fua la i lea mea, e ese lava le manaia, o lea ua tatou felafuai e fai lafoga, ma le toe aveeseina o lafoga. Ae a tatou tilotilo i le alofa o le Atua ua faasao mai ai tatou. O lea e fai a tatou anapogi, talosia le faamai, ae afai e faaauau lafoga a faifeau, ia tatou alolofa, aveese, aveese lafoga a faifeau.

O lea e matau atu i saunoaga ua aumai finagalo, ua tasi uma lava, e alualu lava i luga, ae tasi i le aveese o lafoga a faifeau. O le agaga fiafia lea, o le mea lea na ala ai ona ou tu, se i avatu lau faafetai, malo le tofa, tofa lena o le vaatele e toa i ai auaumalu pe a mavae matagivale. A o le utagaoo e saili ai manuia mo a taeao. O le taofi o lenei itumalo, e lagolago i le Tulafono e toe aveeseina lafoga a faifeau. E pau lea o se leo, ma le agaga faafetai mo lenei aso, ia agalelei mai le Alii. Manuia le Fono.

FOFOGA FETALAI: Ia malo, faafetai le faasoa, faafetai foi lagolago i le tatou Tulafono.

E matau atu o lea ua tulai mai le sui usufono mo Faasaleleaga Nu 5.

Afioga PESETA VAIFOU TEVAGAENA: E momoli le faafetai i lau Afioga i le Fofoga Fetalai, atonu o lenei Tulafono e le o se Tulafono fou. Ma e augofie lou sui usufono, ou te tulai atu ou te fia molimoli se manatu o lou sui usufono o la e faafogafoga mai lou itumalo. Ona e tasi lenei Tulafono i le taimi na aumai i le Maota lenei, masalo o au le isi sui usufono na matua lagolagoina le Tulafono lenei e totogi lafoga a faifeau, ma o lo o mau i ina i faamaumauga a le Maota lenei.

Lau Afioga i le Fofoga Fetalai, a o le i oo atu sau mataupu i le Tulafono, ae o le a ou aumaia lava le faigalotu lea a lo tatou Malo sa taitaia e le susuga i le faafeagaiga Metotisi. E momoli ai lau faafetai i le tatou Malo, aemaise foi susuga i faafeagaiga sa i ai i le tatalina o le anapogi ma le tuu atu foi o le tatalo i le Atua, aua foi gasologa amata o lenei tausaga ia sao ma uli lo tatou faamoemoe aua feau ma galuega. Sa ou matau lea ma le totoa le matagofie o le upufolafola a le Peresetene o le Metotisi. O le usitai, o le upu lava lea, e pei o le upu tomua lava lea i le lauga a le Peresetene, ia outou usiusitai. Ina ua aumai le Tulafono lenei, e pei ona ou taua, sa ou lagolagoina le Tulafono ona o le tulaga lenei. E leai lava se isi e i luga o le Tulafono.

O totonu o le atunuu lenei ma le lalolagi atoa, e tasi lava le Atua, e tasi lava le Atua, o le Atua le Tama, le Alo ma le Agaga Paia. Ma ona ou toe mafaufau lea i upu tomua a le tele o atunuu o le lalolagi, o le tagatanuu lelei, good citizen. O le a le uiga o lea upu? O le tagata ua ia te ia le lagona o le alofa, faasoa, fetufaai se mea ua na maua, tufa i lona tuaoi, tufa i lona matai, lana faafeagaiga taulagi.

Ona ou manatua lea o le malaga a Iesu i Kapunauma, na o atu ma Peteru. O lea la ua o atu le au ao lafoga, fesili ia Peteru, ua totogi ni lua lafoga ma lou matai? Ona fetalai lea o Iesu ia Peteru, alu i le vai, alu i le vai o le ia muamua lava e te maua, tulou lava le upu ma le gagana, leaga o upu o le Tusi Paia, “faa-faamaga le gutu, 4 tupe na i ai i ina, ona e alu lea e ave tupe na e totogi ai ta lafoga.”

Lau Afioga i le Fofoga Fetalai, e tasi lena mafuaaga maualuga a lou nei sui usufono, o la e tapuai lou itumalo, e le o se isi lava tulaga. Ae sa ou vaai i le Tulafono tatou te faua i le Maota lenei, e le gata i lenei Vaega Faaupufai, a o a foi Tulafono o le a fau mai i ina tatou te lagolago uma i ai, o le sini autu lava so o se Tulafono, o le usitai, o le usitai. O lona uiga, o lea le aoga e fai ai Tulafono ae le usitai isi? Aua o mea e fai e lenei Itu e fai foi e lena Itu.

Ona ou manatua lava lea o le mau a se tasi o atunuu tele, o le nuu lea e tele taimi sa ou galue ai. E tusa lava i le atunuu lea po o oe lava o le tagata Amerika moni na e fanau ai, ae a le totogia ni au lafoga, e te le agavaa i mea tau penefit, pension, social security, e oo lava i mo mea o insure e vaai ai le falemai. E na o tusi lava e tufa atu i tagata, a o tagata moni e fananau i le atunuu lea. Ae pe te alu atu lava iinei i Samoa, o oe o le Fiti, Toga, o fea le

atunuu e te sau ai ae e te galue ma totogi lafoga i le atunuu lea, e te agavaa lava e tali faamanuiaga. O le a le tulaga lea e i ai i faamanuiaga a lo tatou Malo? o le penisione lea na taumafai i ai le Vaega Faaupufai a le HRPP ma le tatou Malo e tua i ai lo tatou atunuu. Po o tatou matua e le faigaluega, ae a oo loa i le 65 tausaga e maua lava le penisione e tua i ai na i o tatou tuua ma lo tatou atunuu.

E toe foi mai lava lea o sau faamatalaga i le tulaga lea, ona o lea na saunoa le Sui Palemia e ana le Tulafono, i le tulaga i le mea lea na manao ai Iesu i le auositaulaga e ao lafoga. E leaga o lena e i totonu o lau lauga lau Afioga i le Fofoga Fetalai. O lena e mau i totonu i ina, e totogi a tatou lafoga, ave mea a Kaisara ia Kaisara, ioe ave mea a le Atua i le Atua. O le a le upu a Iesu, “ua outou faoa au mea.” O a ia mea? O lau sefuluai. O lena e i ai le ata o Kaisara, foi a la ia Kaisara, o lafoga na.

O le ala lena lau Afioga i le Fofoga Fetalai, o le agaga lena na mafua ai ona avatu se manatu o lou nei sui usufono e lagolago ai le tulaga lea. Ona o le Tulafono lava a lo tatou atunuu, e le na o faifeau, so o se tagata, so o se tagata. O lea foi e talosaga mai nisi o faafeagaiga.

FOFOGA FETALAI: Ia se i fai si na malologa o le lauga mai Faasaleleaga Nu 5, tulai mai lau Afioga i le Minisita o Galuega.

Tofa Hon Olo Fiti Afoa Vaai: E pau lava le mea o na i vaega e fia faasao o le saunoaga. A o lea ua manino mai i le saunoaga a le sui usufono, na ioe Iesu i le totogi o le lafoga. E le i tali Iesu i pe leai, e pau lava le tali a Iesu na fai i le aufalesaio ina ua nonofo ma faaosooso atu sana tali, aua e polokiki le mea, ave mea a Kaisara ia Kaisara, ave mea a le Atua i le Atua, ae le i i ai Iesu pe leai i ai. E leaga e pei ua tau loloto le agai o le sui usufono mamalu, i le mataupu lea ae le lava tele ia i le Mataupu Silisili, ma le faaaloalo.

FOFOGA FETALAI: E talitonu foi lau Afioga i le sui usufono, o lea foi ua saunoa le Minisita, a tatou o nei i le loloto o nei mea, ua le iloa po o le a le mea a fai. O lea ua maea mai lau saunoaga i tulaga ia, ua leai lava se vaipanoa, ua oo lava i le Tusi Paia. O le mea lea, a o i ai se mea o totoe ona faauma mai loa lea o lau saunoaga.

Afioga PESETA VAIFOU TEVAGAENA: Lau Afioga, e ese le taua o le tulaga lea ua aumai ai le Tulafono a o la e faafofoga mai auauna a le Atua. O la foi ua latou faalogologo mai o Peseta lea ua lauga. O le tasi lenei o Tulafono sa ou maua foi faamatalaga, ailoga a ou toe foi mai i le Maota lenei. A o au ua faateia i le uma o le palota ua ou toe sau foi, ona ou faapea lea, e leai o lea e sao lava le Tulafono lea na fau e le Itu lea. A o lau Afioga, se i ou tali i si ou uso a Minisita, e leai a lea na fai lava e Iesu le vavega, ave tupe i le gutu o le ia ma tuli Peteru, alu loa e totogi ta lafoga, i toe omai foi

le au ao lafoga. O lena sa totogi lafoga a Iesu. O lona uiga, se totogi uma lafoga. E tatau ona totogi uma lafoga a tagata uma. Ma lou faaaloalo lava.

FOFOGA FETALAI: Se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: E leaga o lea e faamaumau a tatou faamaumau, ne i te i e ese se mataupu silisili e iloa e Pese, ese se mataupu silisili lea e taumafai atu ai. Ou te fia iloa po o fea le tusi lea e tusi ai mea ia, faamolemole lau Afioga i le Fofoga Fetalai.

FOFOGA FETALAI: Se i tulai mai le sui usufono mo Faasaleleaga Nu 5.

Afioga PESETA VAIFOU TEVAGAENA: E pau lava lea na ou sili mai lava i le amataga e tau lava ina uma lau aoga i le Mataupu Silisili, o le mea lea.

FOFOGA FETALAI: O le a la le tusi lea e taua?

Afioga PESETA VAIFOU TEVAGAENA: O la e i le tusi o le Mataio 17:17-24. Ua vaai la i le mea lea na ou fai atu ai, e pau lava lea o le mea ma te eseese ai ma le Minisita o Faatoaga, o mea tau Tusi Paia, na te le mafaia ai au i le va lea, ma le Minisita o Galuega. Lau afioga ua uma le manatu o lenei itumalo.

FOFOGA FETALAI: Malo faafetai mo le sao foi o le sui usufono mamalu, malo foi le faasoa, e malu lava le aumaiga, e faapena foi ona taua foi le felafolafoaiga a le Maota. Malo saunoa i lau afioga i le sui usufono mo Faasalelelaga Nu 5.

O lea e matau atu o lea ua fofou mai le sa o Aleipata Itupa i Lalo.

Afioga FALEOMAVAEGA TITIMAEA TAFUA (Aleipata Itupa i Lalo): E faafetai atu i lau Afioga i le Fofoga Fetalai mo le avanoa. E muamua ona momoli le faafetai i le Atua i lenei mamao ua ia aumaia i ai lo outou soifua, ma so matou ola. O lou tulai atu, a o le i amatalia se faamatalaga, e muamua ona faanoi i lau Afioga i le Fofoga Fetalai, i se tasi o alo o lenei afioaga, o le malaulau o lona soifua, ae amia faafuasei e le Atua. O se tasi e le gata o le afioaga o Saleaamua, ae faapea foi le Kalapu taaalo a Vaiala.

O le alo o le susuga i le Toeaina Faatonu po o le Taitaifono a toeaiina, le susuga ia Asotasi Nutime ma le faletua. E avea lenei avanoa e faamaise atu ai i le susuga i le toeaina, e tusa o le amia faafuasei o tama fanau, ua oo tonu

lava i le taimi ua malaulau lona soifua. E faapena foi ma le kalapu taaalo a Vaiala, e momoli atu ai le faamaisega i le toesea o lea atalii.

A o lou faalogologo ma le totoa lau afioga i le Fofoga Fetalai, o lou sui usufono o le sui usufono anapo, e le o se sui usufono ananafi po o talaatu ananafi. A o lau faalogologo ma le totoa i lauga o le tele lava o lauga lea ou te faalogologo ai, o le taumafaiga lava e aumai ma faailoa i le itumalo, le agaga, ae o le sini ma le autu o lau faalogologo e mafuli lava tatou manatu faaalua i le lagolago i le Tulafono. I lou sui usufono ma si o matou itumalo, e lagolagoina le Tulafono e aveese, ae e i ai ma ona teuteuga. Aua o lea na ou maua i se tasi o sui usufono na saunoa, le mea e tau o le faifeau faauu. O lau tatalo, o le faifeau tausiniu lea e i ai le Tulafono lea. A o ona teuteuga i faifeau lea e galulue, o la lava e totogi a latou lafoga. O le faagasologa foi o le soifuaga, a oo lava i le taimi e tofia ai oe, e te tausiniu, ona e oo foi lea i le tulaga lea, e le lavea oe i lafoga.

O le tulaga lena lau afioga, e matua tulai atu ai ma le faaaloalo, pe mafai foi ona ou faatuina atu se lafo i lau afioga, e a pe a faagata ai loa i i tatou felafolafoaiga ae tuu atu le avanoa i le Minisita, se i tali ai, o lau faalogologo e autasi uma lava le toatele seivagana lava Peseta e le auai i le Tulafono. Ma le faaaloalo faafetai mo le avanoa.

FOFOGA FETALAI: Malo saunoa i le sui usufono mo Aleitapa Itupa i Lalo, faafetai o lea foi ua maua se tasi o alo ma fanau ua valaauina e le Atua, malo o lea ua oo i ai lau faamaisega.

O lenei lava e tuuavanoa le tatou Nofoa e manatu foi i le mamalu o le tatou Palemene. Ia tulai mai le sui usufono mo Faleata Nu 3, ona sosoo ai lea ma Sagaga Nu 2.

Tofa LEALAILEPULE RIMONI AIAFI: E faafetai i le Afioga i le Fofoga Fetalai mo le avanoa, e talitonu foi ua alu le tatou aso, ae le mafai ona alofia le tatou valaauina ma le tulaga o Tulafono, e tataua ona tagofia, aua foi si o tatou atunuu o tapuai mai. Sa faalogologo foi i finagalo o sui usufono, e faafetai lava ua toe aumai le Tulafono lenei i le Palemene ua maua le avanoa ou te lauga ai. O le Tulafono lenei sa faatino e le Paeaiga talu ai, ou te le i i inei sa ou i se malaga a le Malo sa ou i ai. Ou te foi mai la ua uma ona pasia, ae sa fai lau tuualalo i se tasi o fono, ia i latou, le matou foi ekalesia EFKS, ia malilie ia, ia usitaia i le tulaga ua i ai le Tulafono.

O Tulafono uma lava e pei ona tatou talanoa ma faasoa, e pei foi o le Tulafono na mavae atu nei, e leai lava se Tulafono tatou te aumaia, ina ia faaletonu pe tigaina ai le tatou atunuu. O Tulafono uma i le agaga e faatino ai, o le agaga ia manuia ai Samoa. E i ai foi Tulafono i lou faavasegaina, aua e le o Tulafono uma tatou te fiafia i ai. Ae le mafai lava pe a fai ua pasia ma autasi i ai finagalo o le Palemene. O le Tulafono lea e i ai nei, o faafeagaiga, o se Tulafono e lelei, ae lua ituaiga Tulafono i lau tilotilo, o le Tulafono e

sao, o le Tulafono e lelei. E i ai Tulafono e le lelei, ae sao. Ae i ai foi Tulafono e sao, ae le lelei. E pei o lau tilotilo lea i le Tulafono lenei, ae o le Tulafono lava ia, o le agaga, e tasi lava le mea e agaga i ai, ia tutusa uma ai i tatou uma. O le a lava lou faasinomaga, e tutusa uma i tatou i le Tulafono. Atonu o le agaga lea sa i ai ina ua pasia le Tulafono lenei, e eseese uma lava o tatou finagalo. O nisi foi ua agai i le Tusi Paia, i lou lava tagata ou te le fia faaaogaina le Tusi Paia, e eseese uma lava le faauigaina. E pau lava le mea lea ou te iloa i le Tusi Paia, upu taua la e i ai, o le honor and respect, o le usitai ma le faalogo.

I le tulai mai o le Tulafono lenei, aua e le fou, o lea sa i ai le talitonuga sa tax muamua i taimi o Siamani. O lea foi na saunoa Sula le sui usufono mo Vaimauga, o lea e faapea sa oo lava i le 1974 o tax, aua o ia lea sa faigaluega ai i le Ofisa o Lafoga, ona sui ai lea o le Tulafono. I lou talitonuga, ua tatou vaai i le faataatiaga o lafoga a le Malo, o lea e i ai le tapulaa, o le first hold, e le totogia ai lafoga, \$15,000 agai i lalo e tax free. E toatele tagata faigaluega, faiaoga, leoleo ma le tele o tagata faigaluega a le Malo, o lona uiga o le toatele lea e i lalo o le vaega lea, la e tuusaunoa lafoga. E lavea ai foi la ma faifeau, i latou uma o lo o i ai i le vaegatupe lea. Ae a oo loa i luga ae lau tupe maua, ona faasolosolo loa lea o pasene o le lafoga. E pei lava o tatou lea pei ua 30% le tatou lafoga ia e totogi.

Ae i le aumaiga o le Tulafono i le amataga. E manatua foi, o lea e totogi lafoga a faifeau uma faigaluega, a o lea sa tuusaunoa faifeau tausinu. E manaia foi le afioga ia Fuiono, e faamalulu atu foi, e manaia foi, e sao lana saunoaga, ae pau le mea, ou te le fiafia i le upu lea o le toa, ae ou te fiafia i le upu o le lototele. E leaga o le matua lototetele lava o tagata na faia le Tulafono lenei. Aua na tatou iloa uma lava, e toatele e le fiafia, ae faatino lava. O lea foi mea o le tautua lotu, o la e silasila le Atua, o tatou matua, o matua o tatou matua, e oo lava ia i tatou, e tausi lava faifeau, o mea masani, e le o se mea na tau aoaina, o le mea na fanau ae ma tupuae ma tatou. A tatou vaai foi i le Taitai o lenei Vaega Faaupufai, o le mea lava e matai ai, ma fai ai ma ana mea faale-lotu, ana lafolafoga ma lona alofa, e le tasi se falesa. E le gata i le EFKS, a o le Ekalesia Katoliko. Ou te talitonu, e faapena uma lava tatou. O lona uiga, e le faapea na faia taumate le Tulafono, e le i faia taumate. Ae i lau tuualalo sa i ai i lea taimi foi i le matou talatalanoa ma latou, a fai le Tulafono, taatia, aua le faamalosi fua. O le uiga o lau tala, o la e ua i ai le Tulafono, taatia, aua o faifeau o le latou mea lea e lauga, toe totogi a latou lafoga, totogi lea e tataua ona fai. Aua i lou talitonuga, o se mea le talafeagai le maua o sau tupe tai lua vaiaso ma maua sau tupe e \$50,000 pe \$60,000 pe oo lava i le \$100,000 i le tausaga ae le totogia sau lafoga. Ia ua mamafa tele lea upu o le lafoga, ona ai o le igoa, ae ou te talitonu e tataua ona fai se tatou sao, e tofua lava tatou ma le sao. O faifeau foi nei e faigaluega i Ekalesia, o la e totogi e Ekalesia, totogi mai tupe ua uma ona ao lafoga, la e totogi i lafoga. O tupe e lafo a Ekalesia, e le o totogia i ni tupe a le Malo.

Afai la o le finagalo lea ina ia tutusa uma ai ma lafoga ma faifeau ia, afai la ua e faifeau aua lea le toe totogia sau lafoga, i lou lava lea talitonuga, ina ia tutusa uma ai la tagata. Tutusa uma ai faifeau. A faapefea la i latou ia na usitaia le Tulafono, aua o lea e le o aumaia se vaega o le Tulafono Toe Teuteu e toe faatumu ma toe faaola tupe a i latou nei. Aua o lona uiga, o lea ua oti faalua, ua uma ona totogi a latou lafoga ua usitaia Tulafono a le Malo a o lea o le a... a o lea ta te faalogo pe o se \$500,000 pe le oo i ai. Afai o tatou e amiotonu ma faamaoni le tulaga o i ai le tou Tulafono ua tou finagalo e ave i tua, toe faafoi tupe a i latou na aumai i lo latou agaga usitai e totogi ai latou lafoga.

Ua outou faafofoga ma tatou faalogologo uma lava i le lauga a le Afioga i le Minisita talu ai nei ina ua tatou talanoa i le mataupu lea i le TIMS. Ioe. Lea na saunoa manino lava, ua manaomia le tou fesoasoani, ua manaomia le fesoasoani a i latou uma e tatau ona totogi lafoga. Ma e le o se upu e aveane ai, e i ai se tulaga o le faaitiitia o tatou tupe maua i lenei tausaga, e i ai le tulaga o le faaitiitia o tupe maua ona o mea e tutupu mai, le faamai ma tulaga o i ai le tamaoaiga o le lalolagi. A o le taimi lenei, o le taimi lenei e fai ai sou sao i lou talitonuga. O tagata faigaluega a le Malo, o le Tulafono a le Malo e 55 tausaga e litaea pe 60 foi pe a laki nisi. A o faifeau, e oo lava i le 70 tausaga, e pei lava o le 70 lea e gata ai isi faifeau. A o isi, e tuusaunoa lava, e tuusaunoa lava. Ae le faapea foi o tatou faailogaina meaalofa ia e tufa ma penefiti e maua pe a aulia tausaga e tatau ona maua ai.

O lea lau Afioga o lau tuualalo, sa manaia lava le Tulafono ua i ai, taatia laia ua uma ona fai, tuu i le faitalia o i latou latou te iloa le mea e tatau ona fai. Leaga o i latou e le iloa le mea e tatau ona faia, ia o lena foi tatou te iloa. A o le a le mea ua finagalo i ai lena Itu, ae i lou tagata, ou te le manao e mimilo faapolokiki le mea. Ae i lou talitonuga, e leai, e i faiaina ai se HRPP i le Tulafono lenei, e le i faiaina ai, na pau lava o le mea ua i ai le tatou faigamalo. Aua a ou alu atu i le lotu EFKS, e ese foi finagalo. O le tele foi o nai isi faifeau la e totogi latou lafoga. A ou sau i le matou lotu lea o le Peace Chapel, o la e totogi le lafoga a le matou faifeau ma lona faletua, ua leva ona totogi. O nei la i le tausaga nei e atoa i ai le 65 tausaga, ia tala fiafia lau penisione, o lena e fai lou sao, ia fiafia.

Ia, o le tuualalo lea lau Afioga i le tatou Tulafono. Ma le faaaloalo lava. Faafetai.

FOFOGA FETALAI: Malo. Ia malo saunoa i lau Afioga i le sui usufono mamalu Faleata 3, o lea foi ua maua e le Maota le finagalo faaalia, e talitonu foi o lo o i ai le avanoa o le tatou Komiti pe a tuuina atu i ai le Tulafono e fai ai foi lo outou sao.

Ia, tulai mai lau Afioga i le sui usufono mamalu mai Sagaga 2.

Susuga MAULOLO TAVITA AMOSA: Faafetai tele mo le avanoa lau Afioga i le Fofoga Fetalai. E muai momoli atu se faamalo i lau Afioga i le Sui Palemia, o le Minisita e feagai tonu ma le Tulafono lea ua tauaaina nei i le Maota. Ua tau musua lava e faaali se lagona ina ua oo lau saunoaga ua maea ona outou feiloai ma sui o Ekalesia uma, o le latou finagalo lea ia aveese le Tulafono. Peitai, ona o lea faatoa oo mai i le faitauga lona lua, atonu e aoga lava lo tatou fesufiaiga, o le tele foi o manatu e tutupu ai ni manatu fou, aemaise lava le upu e masani ona taulai i ai le tatou fesufiaiga i lena masina ua tuanai, o le galulue faatasi ma fesoasoaniai le tasi i le tasi.

Ina ua ou oo mai i totonu o le Maota lenei, oo mai ma sou vaivaiga, aua ne i faapito tasi manu, ae tagai lautele i le mea e manuia ai so o se vaega o Sagaga 2 po o Sagaga le Usoga, ia tainane foi se tuualalo mo le manuia o Samoa atoa.

E le tau fesiligia lo tatou soifuaga nei, lo tatou vatapuia ma auauna a le Atua. Ae o se vaivaiga ua taumafai atu ai, tau lava ina tuu atu i tafatafa ane o lau Afioga i le Palemia ma le Kapeneta ma le Malo, pe faamata o le ituaso lenei ua talafeagai ai ona toe faasolomuli atoa le Tulafono lea? Pe le o se ituaso tau tomanatu ai ma silasila totoa e toe sasaa le fafao? Pe i ai se ituaso e talafeagai ona faatino lea. E mafua lau Afioga i le Fofoga Fetalai, a tatou silasila i faamaumauga mai le Samoa Bureau of Statistics ina ua sosoo tausaga e lua mai le 2020 oo mai ia Iuni i le 2021, ua faamauina le pau o le tamaoiga. Ona oo mai lea o le latou latest data lea na maua mai i le fua ia Setema o le 2021, ua faatupulaia pea le pau o le tamaoiga. O se faamatalaga o lo o faapea mai; o le pau lea ua matauina o le tamaoiga i le kuata ia Setema, o le 2.3% e mafua ona ua faamauina le pau i faatauga mai wholesale e tusa lea ma le 1.14%. A o le pau i retailing e tusa lea ma le 13.4%. O le a le uiga? Ua agai ina le faatau le atunuu. Ae i ai la le mea o lea e pei se paso i le vaavaai i ai, ona o lea e aumai ua pau le tulaga o le faatau a tagata. Ae a silasila i le tupe o faamomoli mai fafo i le 2019, e tusa lea ma le \$547.4 miliona.

Oo mai lea i le tausaga 2020 i faamaumauga lava e \$606...

FOFOGA FETALAI: Lau Afioga i le sui usufono mamalu, o le a le tusi lea e te faitaua mai totonu o le Palemene?

Susuga MAULOLO TAVITA AMOSA: Leai o faamaumauga ia a le Samoa Bureau of Statistics. Leai, o le uiga o lau faamatalaga, o nai fuainumera ia e fesoasoani e fai ai se lagona e aoga i le Malo i le taitaiga o le Malo. Ua oo tatou i le tulaga ua matua afaina lava le tamaoiga, le lalolagi atoa. Na pau lava lena o le mea lea e taumafai atu ai. A oo foi la i le tulaga, o lea foi matou te matau ma le alofa. O isolation fee, tupe e ave i faletalimalo e \$150, a tuu i ai ma overheads, ua e talanoa po o le \$250 i le aso e tasi mo le tagata e tasi. Afai e 21 aso, ona e talanoa lea i le agai i le \$4,000 i le \$5,000

le tupe a le Malo e tofogi ai le isolation a le tagata e toatasi. O lona uiga, afai e sau le vaalele e 200 le pasese, tolu vaiaso e isolate ai, ua e talanoa i le \$900,000 agai i le \$1 miliona le tupe e feagai ma le atunuu.

FOFOGA FETALAI: Leai, e avatu pea le fesoasoani a le Nofoa i le sui usufono mamalu. Ia ona o lea ua e talanoa faalauaitele i le tamaoaiga o le atunuu, o lea ua maea atu le tatou Tala Faaopoopo o le Tupe sa tataua ona e talanoa ai i tulaga ia, a o le mea lea tatou te talanoaina nei, o lafoga a faifeau.

Susuga MAULOLO TAVITA AMOSA: Lau Afioga, se onosai mai faamolemole. O lea ou te taumafai e faamalamalama le mea e mafua ai se lagona e avatu, o le itu e faasoa ma fesoasoani atu i se finagalo o le Malo.

FOFOGA FETALAI: Ia o lea ua maua atu. O lea ua maua atu le sui usufono mamalu.

Susuga MAULOLO TAVITA AMOSA: Ae afai o le tulaga lea e fai ma taofi mai, ona lagona ai lea o le faanoanoa. Ae ui i lea, afai o lea, ia e fai lava le mea e i ai lou finagalo.

FOFOGA FETALAI: E leai. Ia, lelei. Se ua mamao tele lau sailiga i tua atu, a o lea e manatu o lea e talanoa agai i le Tulafono. E pei o le mea lena o lea e tau fesoasoani atu ai i le sui usufono mamalu, ona o lena e talanoa mai ma e silasila i ina i faamaumauga ae leai ni faamaumauga o i le Palemene atoa lena. O le mea lena ou te fesoasoani atu ai i le sui usufono mamalu, o lea e i ai se taimi avanoa le Komiti, ona e alu lea i ai ma lau data lena e faitau i ai po o le a se mea e te lua fetoi ma lau data lena pe a oo i luma o le Komiti. Tulai mai lau Afioga i le Minisita.

Tofa Hon Olo Fiti Afoa Vaai: Lau Afioga i le Fofoga Fetalai, sa le fia faalavelave, ae a gasea le Afioga i le sui usufono mamalu, a o lea e i i uma i le Malo fuainumera o lo o laulau mai. Ia ae sa tau faalogologo lava ma le totoa po o fea lea e aga i ai lona finagalo, ae moni lava ua matua mamao lava i sasae le mea ua oo i ai lana tofa. Faafetai.

FOFOGA FETALAI: O le fesoasoani foi lea i le sui usufono mamalu. E talitonu foi atonu e fou foi i lau faafofoga mai i le taumafai atu a le Nofoa, ae talitonu lava, o le uiga lava ia o tatou saunoaga, ia tuusao pea i le uiga o le Tulafono ma le taunuuga o le Tulafono. A o le auiliili uma mai o ia itu, o le itu lena o lea e popole i ai o lea e faafogafoga le mamalu o le atunuu. O le mea lea, ou te fautuaina le sui usufono ina ia... ia tau tuutuu mai le saunoaga. Ma le faaloalo.

Susuga MAUOLO TAVITA AMOSA: Faafetai. E faamalulu atu. Afai foi ua logo eseese Tutuila ma Ape foi i se matau i lenei mataupu, ona e masani lava ona ou faalogo i le iu o siufofoga o lau Afioga, aumai faamaumauga mautinoa e lagolago ai se taofi e fia faaalua. Ae o le agaga moni lava latou ia, faafetai pe afai o la e i o faamaumauga pei ona saunoa.

O le uiga o lau faamatalaga, i le mamafa o le avega o lo o feagai ma le Malo i tulaga tau tupe. Ae a faapea lava o le tulaga lea o lo o lototele pea le Malo e lava lana faasoa, ia tatou o e fai.

Aua o lea sa tau fauma atu ai sau faamatalaga e faapea lau Afioga, o le talafaasolopito lava ia o Samoa ua silafia uma e le Maota lenei, o ai na laveai i taimi faigata o Samoa i le 1829 seia oo i le 1830? O le talalelei. Seia faasolo mai lava, taunuu mai Ekalesia eseese, o taeao ia o le talalelei na fesoasoani ia Samoa. Ua matau atu i le tulaga ogaoga ua i ai le tamaoaiga, o sou lava vaivaiga, pe le o se avanoa lenei e toe tulai mai ai taeao o le talalelei e fesoasoani i le tulaga ua i ai faigata o Samoa? Na pau lava lea o sou taofi sa fia fai atu ma nai fuainumera ia i faapea ai o ou soona tautala, leai se mea e faavaea ai. Ia ae faamalie atu ai i lau Afioga, ae a faapea lava o le finagalo lea o lau Afioga, ia ua muta foi i i, ae na o se fesoasoani sa fia avatu i le tatou Malo. Faafetai.

FOFOGA FETALAI: Malo faafetai, malo le faasoa. Ia, e talitonu lava e tele foi tapenaga a le sui usufono mamalu, ae i ai le manatu, o le tatou Tulafono lenei e uma toe tuu atu i le Komiti. Ia o avanoa na o sui usufono mamalu, pe a faapea o i ai nisi mafuaaga talafeagai ma talafeauga aua lava le fesoasoani i le Tulafono. O le fesoasoani lea i le sui usufono mamalu. Ia, o lea ua...

Afioga Aiono Tile Gafa: Lau Afioga i le Fofoga Fetalai, mo se avanoa faamolemole.

FOFOGA FETALAI: Ia, o le a tatou felafuai. O le a lafo atu ia i le Minisita Lagolago o Faatoaga, ia tulai mai.

Afioga VAELE PAIAAUA IONA PAIAAUA SEKUINI (Gagaifomauga 2): Faafetai i lau Afioga i le Fofoga Fetalai mo le avanoa, ua maua foi se avanoa o lenei itumalo e faaleo ai se lagona e uiga i lenei Tulafono sili ona taua. Ae le oo lava se faamatalaga a lenei usugafono i le va o le tagata ma le Atua, ia, po o agai foi i le Tusi Paia. E i ai lava le talitonuga o lenei sui usufono, o lo o i ai lava le afaigaluega Paia a le Atua e ou le matafaioi ma le galuega patino. Ae o le a agai tonu lava se tala i le Tulafono o lea ua taoto nei i le Laulau-a-Fono.

O le mea moni lava lau Afioga i le Fofoga Fetalai, o le Tulafono lenei na matua faaosoina lou sui usufono ou te fia tauva i le faiga palota lea ua mavae.

E le i i ai lava se manatu e fia tauva i le faiga palota pe fia ulufale mai foi i le Maota lenei, ae ina ua faatulai mai le Tulafono lenei i le 2017, sa lagona lava le faanoanoa i le taputapu mai tua ma vaavaai mai foi i tualumaga a le Fono Aoa o Samoa. A o le ala lea na mapue ai se lagona e fia tauva i lenei faiga palota ma fia oo e fai se leo agai le Tulafono lenei.

Lau Afioga i le Fofoga Fetalai ina ua faatulai mai le Tulafono lenei, e anoanoai ni fesili sa fesiligia ai lou mafaufau i le faatulai mai o le Tulafono lenei. Ma o le tele foi la o fesili o lea ua tali manino le Afioga i le Minisita e ou le Tulafono, ae sa tatai lava i tua se lagona i vaitau ua alu, vaitau o le tau utiuti o le tamaoaiga o Samoa, sa vaavaai ma faalogologo foi i tualumaga a le Fono Aoa Faitulafono i le laitiiti o se tamaoaiga sa tau faasoaso, ae sa le i afea lava i lena vaitau le afaigaluega. O le taimi o lo o mu eletise le taulaga nei, a o la e tau faamumu se sulu aulama po o moli fagu vaeatu le mamalu o le Maota, le tau utiuti o le faaso, ae sa mafai lava ona tulai mai tatou faigamalo ma tau posiposi le tamaoaiga e faatofutofusia ai le mamalu o le tatou atunuu ma le latou tapuaiga. A o le fesili la lea sa fesili ai; o le a se tulaga o i ai le paketi a le Malo i lena vaitau i le Paeaiga ua mavae? Po o le mea ea ua i ai se faaletonu o le faaso a le Malo i lenei vaitau ua vaavaai i le faatupulaia o le tamaoaiga e ala i ana Tala o le Tupe o lo o faalogologo mai ai i tua, a o lea ua naunau ai le faigamalo ua mavae e apaapa i le afaigaluega paia a le Atua. Ona i ai lea o le manatu e tele lava ni fesili ma ni lagona ae ua manatu foi, o lea ua tali le Afioga i le Minisita e ou le Tulafono ma ua faamalieina ai lou ulufale mai totonu o le Maota lenei.

O le mea lea, e puupuu lava se manatu o lenei itumalo, o le fia faaaleo o le agaga faafetai i le Minisita e ou le Tulafono. Malo toa malo le lototele, ma ou te faaigoaina foi lau Afioga o se Minisita lototele, o oe o le toa ua tulai mai lenei vaitau e toe faafoi le tulaga o lea lava e sololelei le faasoasoina o le tamaoaiga o lea e maua mai i lafoga a le afaigaluega, ae le o le apaapa i le afaigaluega.

Faafetai foi i le Afioga i le Tamaitai Palemia ma le Kapeneta i lo outou lagolago malosia e toe aumai le Tulafono lenei e mafai ai ona teuteu. E pei o le agaga lea o le usugafono o Gagaiifomauga 2. E momoli atu le faafetai tele, malo le silasila i le feagai ai o le va nonofo o le tagata lotu ma lana faafeagaiga, aemaise o le va nonofo o le tagata soifua ma lona Atua. O le mea lea faafetai, malo le silasila i le Atua ma le galuega.

Lau Afioga i le Fofoga Fetalai, e fai ai lou leo ma sui o faafeagaiga uma o lenei itumalo, aua o lenei Tulafono e le na o se Ekalesia e tasi, o lea ua aofia uma le afaigaluega i so o se fatafaitaulaga. E fai ai le leo o le sui o Gagaiifomauga 2 e momoli le faafetai mai le afaigaluega a le Atua i totonu o lou itumalo i lau Afioga i le Minisita, ia i ai le manuia o le Atua. Faamanuia le Atua i lau Afioga aemaise foi o le Matagaluega. Ia faamanuia foi le Atua i lau Afioga i le Palemia ma le Kapeneta ae ola le leo o Gagaiifomauga 2. Faafetai.

FOFOGA FETALAI: Ia, ua malo saunoa i lau Afioga i le sui usufono mamalu mai Gagaifomauga 2. Ia malo mo lou sao o lea ua lagolagoina le tatou Tulafono.

Ia tulai mai lau Afioga i le sui usufono mamalu mai Aana Alofi 2, lau Afioga Aiono.

Afioga AIONO TILE GAFA: Faafetai tele i lau Afioga i le Fofoga Fetalai mo le avanoa e tulai atu ai ma le agaga faaaloalo e solitu foi le paia o le Palemene, e fia fai foi se sao e tusa ai o lenei Tulafono Teuteu o le Tupe Totogi o Lafoga. Atonu o tatou uma lava o Samoa, e leai se isi o i tatou tatou te le o lagona le agaga faafetai i le Atua i lo tatou tofi ua aumai e le Atua tatou te ola ai ma nonofo ai i le tatou atunuu o Samoa. A tatou fua i le taimi ua sola ma le tuanai i le tele o faafitauli sa tatou asa mai ai, le tele o luitau, matagi ma afa e toe aveeseina lava e le Atua o le a oo mai. O le tele o faalavelave ua tatou vaavaai i le lalolagi, vevesi, fetauai, ae a lenei atunuu ua aumaia e le Atua e fai mo tatou tofi? Viia Lona alofa, faafetai i Lona agalelei i le toamalie ma le toafilemu ua tatou aeaie ai i faleseu ma saa i maomalie. E tofu tatou ma lagona, e tofu le tagata ma lona talitonuga, o atinae eseese tatou te taupule ma topule ina ia atiae lo tatou atunuu. Ae a tatou manatu loa i ia mea, o ai e afua mai ai, o ai e afua mai ai? O lo tatou atunuu. Faafetai o lea ua tuu i totonu o le Faavae, e Faavae i le Atua Samoa.

Lau Afioga i le Fofoga Fetalai, e faapena foi le agaga faafetai i le tuuina mai o lenei Tulafono se i toe silasila i ai le Maota, se i toe soalaupule i sona atoatoa e tatau ona taoto ai. Ou te le i i ai i le taimi o lenei Tulafono, ae sa ou faalogo loa i le Tulafono, lau Afioga i le Fofoga Fetalai ma le Maota, e ese lou fia faalogologo mai. Sa ou fia faalogologo mai. Aisea? E pele ia te au le galuega a le Atua, ua leva tausaga o ou galue i le Aoa Fesoasoani, toetiiti ato le toasefulu o lou aiga o lo o galulue ma punonou i le galuega a le Atua, ioe. A o le latou... e le oo mai se leo ia te au, ina ua ou sau i le Maota lenei, ioe, e tapuai mai. A o le agaga lena lau Afioga, o le agaga lena, manaia, faafetai i le toe aumaiga o le Tulafono tatou te toe vaavaai i ai. O le matou Ekalesia, lea e faafofoga mai le uso a Minisita o Fesootaiga, e masani ona afio atu matou te lolotu aua e fai foi lana matafale i le matou Ekalesia. Ina ua taunuu atu le Tulafono, matou te le i nofonofo po o le a le faiga o le a fai ai le tax a le matou faifeau. O au, o la e ou te teuina tupe a le matou Ekalesia, sa fetuunai po o le a se faiga e fai ai. E oo mai lava i le aso, e le o... ua sui le faiga o matou tupe ma mea e fai, ua fiu e toe faaave i tua i le tulaga sa masani ai, ioe. O lea ua matou masani lava i le faiga lea e fai ai le faiga o alofa o le matou faifeau, ioe. O le ala lena lau Afioga, sa manatu lava o le a le tulaga e tulai mai faataunuaina ma le faatinoina o lafoga a faifeau, e tautala lava ma le faaaloalo o la e faafofoga mai, e le gata i le matou faifeau a o le matou pulega, e matou te galulue lava e faatino e le Ekalesia ae tapuai

le faifeau, matou te vaai i le matou faafeagaiga, o le ioimata o le matou nuu ma le Ekalesia.

Lau Afioga i le Fofoga Fetalai, o le ala lea e avatu manino ma avatu mama le lagona ma se faamatalaga a lenei itumalo ma lenei usugafono i le Tulafono e pei ona tuuina mai. O lea ua aumai le teuteuga, ou te talitonu o le agaga foi lea o lenei itumalo, ioe. E le fai mo se isi nei mea, o le Atua e le mativa le Atua i se mea. Aua foi tatou te masalosalo, e le aoaia e Laupua Tamafaiga i le tofa, e saunia e le Atua mea uma pe afai tatou te faia le mea amiotonu. E le faapea o fai atu se faamatalaga ona ua le amiotonu, e leai. E pei lava ona talanoa atu lau Afioga i le Fofoga Fetalai, e eseese lagona, e eseese le tofa na fau ai Tulafono, ona o le manatu i se isi itu aua le atiaaina o le atunuu. A o le agaga lena.

O le mea lea lau Afioga i le Fofoga Fetalai, o le lagona lena o lenei itumalo e lagolago atu i le Tulafono e pei ona faataoto mai, ia tatou agai e lagolago ma galulue faatasi aua le aufaigaluega paia a le Atua. O le mea moni, o le tasi lava lea manunu o le toau o le tatou atunuu i lenei vaitaimi, leaga ua lagona i ala le iuleo aua le Tulafono lea, mai lava i le taimi na pasia ai, ioe. Talofa, pau lava ia... e i ai se tasi aso na ou sau ai o valaau le Faamasinoga, na ou sau ai lea e i ai lau mataupu na fai, ae na ou fia oo lava i luga se i ou vaai po o le a le tulaga o i ai i le mea o lo o valaau ai le mataupu. Lau Afioga i le Fofoga Fetalai ma le mamalu o le Maota, ua li'a tino, ioe, i le tutu o le aufaigaluega fai le lotu ma tapena lo latou o i totonu. Sa faapea ifo lou loto, le Atua, faamagalo le atunuu lenei, faamagalo lou atunuu, afai ua sala uta, ia tonu tai.

Lau Afioga i le Minisita, malo faafetai, ioe. Malo faafetai i le tofa ma le finagalo aua lenei Tulafono mo le toe teuteuina aua le lafoga a le aufaigaluega a le Atua. O le tala lea ma le faaaloalo, faamanuia le Atua i lau afioga, faamanuia foi i le Palemia ma le Kapeneta ia ma le paia o lenei usugafono, le afioga i le Sui Taitai ma lenei Itu, ia aemaise le paia o Ofisa Sili o Pulega o Matagaluga ma le Fonotaga i lenei aso, faafetai.

FOFOGA FETALAI: Ia ua faamalo saunoa i lau afioga i le sui usufono mamalu o Aana Alofi Nu.2. Ia lau afioga Aiono, ia faafetai mo lou sao. Ia o lea foi ua faailo foi lou lagona faaaoao fesoasoani e lagolagoina le Tulafono pei o le Maota. O le mea lea faamalo faasoa, faafetai mo le finagalo faaalua.

Ia tulai mai ia lau afioga i le sui usufono o Aleipata Itupa i Luga.

Afioga FUAAVA SULUIMALO AMATAGA: Ia faafetai i lau afioga i le Fofoga Fetalai. E talitonu o lenei itula o le aso ua vela foi le fala. Ua leva foi na faaaaogagase lau afioga aemaise le paia o le Maota, ua faaali foi finagalo aua le lauliliuina o lenei Tulafono Tau Faaofi. E manatu lenei sui usufono ua tele ia finagalo faaalua ma o lea foi ua lavea atu ai ma nisi o mafaufauga i tulaga uma sa taumafai e faailo.

Ia ae vaavaai atu i le tatou taimi ua toetiiti oo i le taimi e malolo ai le tatou Fono. Ia ona faapea lea, o le a taumafai ia e faatopetope atu se manatu, se tuualalo pe o se taumafaiga foi e fesoasoani atu i le Tulafono a le Minisita e tauala atu i lau afioga i le Fofoga Fetalai.

O le Tulafono o lo o talanoaina nei Tau Faaofi nei i Teuteuga i Tupe Maua, ia e i ai lava le manatu o le Tulafono leni e maaleale. E maaleale tele se faamatalaga ma le finagalo e faali manatu uma ai ona e i ai le talitonuga o le sui usufono, e taufai tutusa uma lava tatou. O le tatou atunuu foi e faavae i le Atua. O tatou foi e pei ona maua i saunoaga a nisi o sui usufono mamalu, o tatou uma lava o tagatanuu o Samoa. O tatou foi o auauna a le Atua. Po o le Palemia, Minisita, sui usufono ia po o a lava tofiga ua faamanuia mai le Atua i lona valaauina e tautua ai i lo tatou atunuu. O tatou lava o auauna a le Atua. O faafeagaiga foi ma faifeau, ia e i ai so matou vaivaiga, o auauna uma a le Atua.

Ae o le a taumafai se faamatalaga e aua lava le afea le tulaga lea i Ekalesia. E popoe tele i ai lou sui usufono ona e pei foi lele o le a tau aumai e faaelelea ma nini mai le Ekalesia, ae o le Tulafono ia e manino lava. O le Tulafono lea i le 2017, o le teuteuga o le Tulafono i le 2012. E pau le tulaga lea i lou talitonuga, ua faaopoopo i ai ma faifeau ia tausinu. Ia atonu foi o se mafaufauga ma se vaivaiga i na taimi, ia o tagatanuu uma o si o tatou atunuu. E pei la e i ai le agaga foi lea, ia atonu lava o le va lava i le faifeau se i tulou, ma le Tulafono, aua lava ne i faaelelea ai le Ekalesia. Ae ou te iloa foi o le agaga o le Tulafono, e pei o se tulaga foi lea o lo o i ai lava le aiatatau, o lo o i ai foi le agaga faaosofia i Susuga i Faafeagaiga, o la outou sao lea, o la outou maa lea e lafo i totonu o le tatou Malo e atiae le Malo. E manuia le Malo, e manuia ai oe le auauna a le Atua, o oe o le faifeau po o so o se Samoa lava. E manuia lou aiga, manuia lou nuu, manuia lo tatou atunuu. Atonu e pei o se agaga na i lau tau matau i le Tulafono, o se agaga alofa. O le tatou faasoa, e tausoa le tatou amoga ia aua le atinaeina o si o tatou atunuu.

Ia e i ai lava si Vaega lea e pei e taumafai atu i ai, o le a ou le taumafai lava e paia le tulaga e alo se faamatalaga po o se manatu i tulaga o le Tusi Paia ma tusi sii e pei foi ona saunoa nisi o sui usufono. Ia ona o lou sui usufono e le o se sui sa aoaoina ma faauuina i mea tau Tusi Paia, ae e ui e i ai ou tofiga faale-ekalesia, o lea foi sa tauala atu ai se taumafaiga i totonu o le Ekalesia e pei o se finagalo, se tuualalo i Taitai o le Ekalesia ia aemaise foi o le vasega a faafeagaiga. Ia sa aumai foi la ia so latou manatu, ia ma o lea e tauala atu ai i lau afioga i le Fofoga Fetalai i le Minisita o lo o gafa ma le Tulafono, ia faafetai.

E le o i ai se manatu e tetee i le Tulafono leni sui usufono, ae e pau si Vaega lea e avatu, o le latou talitonuga, e pei e faafoliga foi lea ua agai tele le Tulafono i le faifeau tausinu. I le matou ia Ekalesia, o tupe a le aulotu pe o le Matagaluega, e fai ai le alofa i le tautua matagaluega po o le faifeau. O tupe la ia ua uma ona tax ma fai lafoga. O tupe o lo o fai mai ai taulaga a le

mamalu foi o tagatalotu o le ekalesia, o tupe foi ua uma ona tax ma fai lafoga. Ma o lea la e aumai ai, o lea e fai ai totogi o faifeau o lo o galulue i totonu o ekalesia i tulaga o aoga, o ofisa o tulaga uma faapea.

E i ai foi la lo latou talitonuga, e tutusa lava la ma alofa ia e agai i faifeau tausinuu. O lea ua uma ona tax. Ia afai la o le Tulafono lea ua i ai nei o lea e taumafai e lauliliu ia le Tulafono Tau Faaofi, ia a toe tax la, ia lona uiga ua i ai le talitonuga lea, ua tax faalua. Ia ao taulaga foi ia lea e aumai i totonu i tulaga o taulaga ma faigame, ia e fai lava si feoloolo o nai miliona e oo foi i ai. O tupe uma foi la lea ua uma ona tax, lea e aumai toe totogi ai ia Taitai o le Ekalesia ia ma le mamalu o ekalesia o lo o galulue ma tautua ia totonu o le ekalesia. Ia o lea la e toe tax tatou.

E pei la o le tulaga lena, o lea e taumafai atu ai, o le Tulafono lava ia e pei o se vaai i ai o le va lava o le faifeau, o le tagata lava ia o le tagata Samoa e pei o le faifeau pe o le a lava le tulaga ia ma le Tulafono. Ae o si atugaluga lea i lou sui usufono, se faamolemole lava lau afioga i le Fofoga Fetalai, e tauala atu ai, o le tulaga lea e pei e aumai ai so latou finagalo, afai ua exempt ia faifeau tausinuu, ia pe a faafefea ia latou ia e galulue i totonu o Ekalesia lea e totogi tax.

Ia ona ou vaavaai atu lea i totonu o le tatou Constitution, i le Faavae, se faamolemole lava, o le faafesili i le tatou Tulafono Tau Faaofi lea, po o ua afifi ai le Vaega lea i le fuaiupu e 15 o le Faavae lea e i i, “o le saolotoga mai i tulaga faailoga tagata”. E i ai le faaupuga foi lea e tutusa tagata uma i luma o le Tulafono ma e tofua tatau ona maua ia le puipuiga tutusa i lalo o le Tulafono.

O lona Faa-Peretania lena e i ai, ‘all persons are equal before the law, and entitle to equal protection under the law’. Ia e pei o se mea ua avatu ai se faafesili i le Tulafono lea ona e pei o lea e agai lava i faifeau tausinuu. Ae e pei o se vaivaiga o lou sui usufono, se i toe silasila ane lava i nai isi faifeau ia e pei ua vavaeeseina ai faifeau ia ua faauuina, ona o lo latou foi ia talitonuga, o le galuega valaauina faafaifeau, o le Ministry lea, e i ai lava pe e te galue faafaiaoga, pe e te tausinuu, pe e te galue faale-ofisa, e i ai lava lau ministry o oe o le faifeau. E i ai le Vaega o le pastoral element, o le latou matafaioi. E le faapea a e galue i le Ofisa, ia ua le mafai ona e faia ni autalavou, mea faapena Aoga Aso Sa ia ma fai foi sauniga lotu ma tulaga uma faapea.

Ia e pei o se faasoia atu lea, o nisi foi o lagona aua e pei ona ou fai atu, ia e taumafai lava e aoao mai ia manogi o le lolo aemaise latou ia e aafia i le Tulafono lena o lo o tatou lauliliuina. Ia ne i te i ua o tatou faapito manu ia tasi, i faifeau tausinuu, ia ae faafefea faifeau ua faauuina, certified ua faauuina i le 4, 5 tausaga sa galulue ma aoaoina ai i totonu o Kolisi Faafaifeau.

Ia e pei o se tuualalo atu lea pe talatala malie atu, ia ae aafia uma ai loa ia faifeau, certified faifeau faauuina. Pe galue lava i totonu o Ekalesia pe

tausinuu, ia o sa tatou faasoa lea. O la tatou faamamalu foi lea, e tatou te avea uma i faifeau o lea ua o tatou ave i ai le faaaloalo, o latou ia ua ao i ai faalupega o Samoa. Ia aua e le faapea seiloga o ni tausinuu, ia na e faalupe lea faapena. O le faifeau lava o le faifeau i sou lea vaivaiga.

Ia lau afioga i le Fofoga Fetalai, ia e pei o le pau lea o se taumafaiga vaivai a lou itumalo, ia e fesoasoani atu ai i le afioga i le Minisita faafetai mo le Tulafono. Ia faafofoga mai foi ia le mamalu o le tatou atunuu ia aemaise foi ia si ou itumalo, ia o le a taatia atu pea i ina ia nai motugaafa ia, ia e liuliu i ai le tofa ma le uta mamao ina ia i ai se Tulafono e fafia uma i ai tagatanuu o si o tatou atunuu.

Ma le agaga faaaloalo, manuia lau afioga ma le Fono.

FOFOGA FETALAI: Ia ua faamalo le saunoa i lau afioga i le sui usufono mamalu o Aleipata Itupa i Luga, ia malo foi le faasoa. O lea foi ua faafogafoga atu le afioga i le Minisita, i le fautuaga ua tuuina mai.

Ia o lea e matau atu o lea ua fou mai le sa o le sui usufono mamalu mai i Gagaifomauga Nu.1, lau... Hon Faimalotoa Kika Stowers.

Tofa Hon FAIMALOTOA KIKA STOWERS AH-KAU: Faafetai tele mo le avanoa i lau afioga i le Fofoga Fetalai. E momoli atu foi le faamalo ua lavapapale ua umi foi ma vela le fala o lenei aso faapena foi le afioga i le Palemia ma le mamalu o le Kapeneta, faapea sui usufono uma o le Palemene. Faamalo atu foi i Faauluuluga o Matagaluga o lo o faapena ona o tatou mafuta pea.

Ia e le tele se manatu, ou te talitonu o lenei Tulafono e pei ona aumai ai i na vaitau ma iu ai ina luga lalo, ma iu ina pasi ma pasia e le Palemene, ia ou te talitonu e tele ma anoanoai mafuaaga na aumai ai ia lea Tulafono. Ia ae o lau tilotilo i ai ma lau faalogologo i finagalo eseese faatoa oo mai i le Palemene i na taimi, sa i ai le agaga foi lea ina ia o tatou tofa sao uma mo le atinae o le tatou atunuu i lona tulaga aoaotetele. O lau na faataua ina ua aumai le Tulafono lea.

Ia peitai, o lea ua toe aumai foi le Tulafono lenei e toe teuteu, ia ua ese foi lagona o lenei taimi i mea ua tutupu mai talu ai nei i le la tausaga, suiga o le tau, faamai ma tulaga faapena. Ua ou lagonaina ai e au ia le alofa ma le agalelei o le Atua i si o tatou atunuu. E ui lava o le lalolagi atoa ua pagatia le tamaoiga ae o lo o alofa mai pea le Atua ia Samoa. Ia sa faapopoleina lava tatou i le la vaiaso ae oka le matalasi o le alofa o le Atua. Ua i ai la si ou tamai lagona, ma sina musumusuga, po o le a lava? Po o le a lava? E tuu atu si ota manatu o si tamai teuteuga lava.

Ae e avatu le lagolago i le Tulafono lenei, e lenei usugafono mai i Gagaifomauga Nu.1. E a pe a... e lagolagoina le Tulafono ae ona i ai lea o sina tamai teuteuga ina ia laugatasia uma ai faifeau. O le faifeau lava, o le faifeau. O le faifeau ua faauina mo le galuga a le Atua ina ia maua ni agaga

se tele mo le Atua ma Lona finagalo. Pe a pe a laugatasia uma ia faifeau, tuu i ai le avanoa i le faitalia. O le totogi ma le le totogi, pule le faifeau. Ia a le o lena foi, ia ona o le isi tulaga lea e ta te tilotilo i ai ta ita ia laugatasia uma lava faifeau, aua ne i faapea mai le isi ekalesia, mea ane o tatou o Taitai o lo o faia ia tonu ma Tulafono e tatou te faapito i se ekalesia. E tau popoe ai foi se manatu i lena itu, a faapea loa o le a faapafala loa, ia ona ou manatu lea, to be fair i faifeau uma a totogi a latou lafoga, ae toe tatalo atu lau afioga i le Minisita ma le paia o le Matagaluega pe a pe a toe refund, ona fair and square lea.

O le mea e tau o le faifeau, o le Atua ma Lona finagalo e tatou te faamoemoe i ai, i so o se mea lava. Ia e pei o se manatu puupuu lena, ou te talitonu ua latalata ia lo tatou taimi manava, ae o se lagona lena mai i lenei usugafono.

Manuteleina ae faapena ona avatu faapupuu ia tatou tala, ia ae tuusao atu pea ia le mea ua o ta lagona, e tatau ona avatu. E lagolago atu ia le Tulafono, ae ia fai ia tutusa, fai aua ne i i ai se agaga faapito e faapito tasi i se ekalesia ae ia tutusa. A fai loa o le a le tologia, ia toe refund ia tupe a nai faifeau ia sa usitai i le Tulafono, na pasia i totonu o le Palemene lenei. Ia aua o lea sa fai mai foi tatou, no one is above the Law. O lea sa usitai latou, ia e pei o le usitai lea e ta te alu atu ai faamolemole lau afioga i le Fofoga Fetalai.

Manuia le Fono.

FOFOGA FETALAI: Ia ua faamalo le saunoa i lau afioga i le sui usufono mamalu o Gagaifomauga Nu.1 ia faafetai foi faasoa. O le agaga ma le tofa o lea ua lagolago ma fautuaga o lea ua faafogafoga atu ia le afioga i le Minisita aemaise foi ia le tatou Komiti, ia e faapena foi ona faatoai i ai le fautuaga e pei ona tuuina mai.

Afioga LUPEMATASILA GALUMALEMANA TOLOGATA TOGIA TILE LEIA: Lau afioga i le Fofoga Fetalai...

FOFOGA FETALAI: Tulai mai lau afioga i le sui usufono mamalu o Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEIA: Faafetai tele i lau afioga i le Fofoga Fetalai mo le avanoa. E manatu foi ua vela le fala ae o le a faapuupuu atu ia le sao o lenei itumalo. Sa i ai le manatu o le a leai se manatu e faia ae e faigata o la e faalogologo mai ia si ou itumalo pe o fea o i ai le sui usufono.

E i ai le manatu o le aso ma le filiga, o le aso foi ma le mataigatila. O le taimi foi ma le mea e tupu ai. I le matau atu i lenei Tulafono toe teuteu ua tuuina mai, ia ma le Tulafono foi o lo o i ai i le taimi nei. Ua ou manatu o lea ua maua foi i le faalogo e tele foi ia ni faitioga i le Tulafono o lo o i ai

nei. Ae e pei lava ona malie i nisi foi o saunoaga o lenei Maota, e leai lava se Tulafono e aumai i le Maota lenei e leaga. O le agaga atoa, ina ia manuia ia lo tatou atunuu.

E i ai foi la le manatu o le Tulafono e pei ona tulai mai, ia sa faia foi e le faigamalo ua tuanai atu. Ma o lau matau i sini autu ma mafuaaga sa faavae ai le Tulafono, muamua ia ositaulaga tagata uma mo le atinaeina o le atunuu. Ao le Vaega lona lua, ia tutusa tagata uma i lalo o le Tulafono. E pei o Vaega aoatetele o lea sa fua iai i luga le Tulafono e pei ona tapisa ai nei.

O lea foi la ua oo mai i lenei vaitau, ia e momoli atu le agaga faafetai tele i le afioga i le Minisita ia faapea foi ia le Ofisa Sili ma le Matagaluega e ana le Tulafono ona o lea ua mafai ona toe tuuina mai lenei Tulafono taua, ia e toe Iloilo e lenei Palemene.

Ma o lea foi ua manino mai sini autu e faavae ai le suiga o le Tulafono e pei ona faaofi mai, faaaloalo i faifeau. E pei o manatu aoatetele ia e 2 i le eseese o le vaai i le faigamalo na tuanai atu nei, ia ma le faigamalo ua tulai mai i lenei vaitau.

O le mea lea e fia faaleoina ia le lagolago a lenei itumalo o Falelatai ma Samatau i le Teuteuga o le Tulafono e pei ona tuuina mai i ona Vaega uma, seivagana ai nai fautuaga e tuuina atu. Ia ua maua i le faalogo nisi foi o finagalo ia pe a pe a aafia uma ai faifeau i le Tulafono lenei. Ae o le manatu o lenei itumalo, o lea lava e manino lava le aumaiga o le Tulafono toe teuteu. E ala ona faasagatonu nei teuteuga i faifeau tausinuua ona o le tulaga foi lea o le galuega ma le tagata faigaluega aua e le o i ai se tulaga faapena i le faifeau tausinuua. E le o i ai se konekarate e faafaigaluega ai le faifeau i totonu o ekalesia peitai o faifeau o lo o faigaluega i Ofisa ma tulaga faapena, o lo o i ai ia tulaga o le employer ma le employee.

Ae ui i lea, e taua foi se tasi o manatu lea e faapea mai, e ui o le tulaga lena o lea e faigaluega ai isi faifeau i totonu o Ofisa o ekalesia, ae peitai o seleni o lo o totogi ai, o seleni lava e pei lava o le alofa tulai o ekalesia ia ma aulotu lea e lafo taulaga, lea e aumai totogi ai faifeau nei o lo o galulue i totonu o Ofisa.

Ia ona i ai lea o se fautuaga o lenei itumalo, ia e manaia ae se i silasila i ai lau afioga i le Minisita ma le Matagaluega, ia ona o le Tulafono lava lea e aumai e mo faifeau tausinuua. Ae ua ou lagolagoina foi pe a mafai ona faatautele te isi atu, ina ia aafia ai so o se faifeau, aemaise lava faifeau o lo o galulue i totonu o Ofisa o ekalesia, ia ona e leai se isi alagatupe e aumai ai tupe i totogi ai, o tupe lava ia e lafo e le ekalesia ia i taulaga, ia o lo o taumafai ai ia nai o latou totogi.

Ia ma le Vaega mulimuli, ia e auai foi lou manatu i le tulaga lea o le refund a nai faifeau ia na usitaia ia le Tulafono. E avatu ai foi le agaga faafetai tele i nai faifeau sa mulimulitaia ma usitaia ia le Tulafono a lo tatou Malo, ia o lea ua toe lauililiu le Tulafono, ae o le Talosaga lena ma le agaga faaaloalo, ia e manaia foi ae toe faafoi uma tupe a nai faifeau ia sa aoina i le Tulafono

lenei, ia aua o lea e faalogologo atu e le o se tupe tele. O lena foi e maua atu i saunoaga a le Malo, money is not a problem. So \$400,000 e le o se mea tele, ia a toe refund ai nai tupe a faifeau, ia na ala la ona o e totogi ia latou lafoga ona o le mulimulitaia o le Tulafono, e pei ona pasia e lenei Maota.

Ian a pau lena o se tuualalo a lenei sui usufono, ae ia manuia tele lau afioga i le Fofoga Fetalai, ia faapea foi le mamalu o le Maota.

FOFOGA FETALAI: Faafetai, malo le saunoa i le sui usufono mamalu, e talitonu foi o lea ua faasoa ma tuuina mai foi lou finagalo. Malo foi le saunoa ma faufautua. Ia atonu o lea lava e faafogafoga atu le Minisita ia aemaise foi o se taimi foi i le tatou Komiti, ia ona faapena ona maua foi le avanoa.

Ia e matau atu ona o lea ua o tatou taunuu mai i le tatou taimi malolo mo le 15 minute, ia se i o tatou talii mai ia ona faaauau lea o saunoaga.

E faasilasila atu ua faataatiaese ia galuega a le Fono Aoa mo le 15 minute.

Na faataatiaese Taulumaga a le Fono Aoa Faitulafono mo lana malologa masani i le itula e 6:00 i le afiafi ma toe faaauau i le itula e 6:25 i le afiafi.

FOFOGA FETALAI: Ou te faasilasila atu, ua toe amatalia nei Taulumaga a le Fono Aoa Faitulafono. E i ai le manatu ua tatou tulata i le faaiuga o a tatou galuega i lenei afiafi. Faamalo le onosai i le paia o le Palemene.

E faataatiaese Taulumaga mo le malologa, o lo o tulai mai le sui usufono mo Salega Nu 1, o le avanoa lea mo lau Afioga i le sui usufono mamalu.

Afioga FEPULEAI FAASAVALU FAIMATA SUA (Salega 1): E faafetai mo le avanoa lau Afioga i le Fofoga Fetalai, e manatu o lea ua saoialo le taligasua, o se faamalositino i lau Afioga i le Fofoga Fetalai tainane foi le afio o le Tamaitai Palemia ma le mamalu o le Kapeneta, le la foi Itu i le Afioga i le Sui Taitai ma le mamalu o sui usufono o le Palemene. Ae faafetai mo lou avanoa ua mafai ona tulai e fai se sao o lenei itumalo o Salega aua lava lenei Tulafono matagofie. O lea ua lauliliu i luga o le Maota Fono o Samoa i le mea e lipoi ai upu a lo tatou atunuu, aemaise foi se taumafaiga aua manuia o tagata lautele.

E faatalofa atu i si ou itumalo o Salega, ou te faitauina lava a ou tu e tasi lava maua ma le Afioga i le Minisita, maua o Salega 1 ma Salega 2. E le vavaeesea lona mamalu i lona tulaga, o maua lava o maua lava o le uso, o le 1 ma le 2 o maua lava e tasi.

E faailo i se lagona le agaga faafetai le paia i lou itumalo, e mai lava i Matailiili ma Tapapa se i paia Fetoloai ma Vaimuliai. O lenei itula ma lenei aso e tusa ai ma le Tulafono Tau Faaofi, e agai i lafoga a faifeau, o le paia lava lea i ekalesia i totonu o le tatou atunuu. Aua foi le nofotapuai a le afioga i le Peresetene, i le Laulau a le Koneferenisi, afioga i le Peresetene Sili o le Auso ma le mamalu o le Auso Fealofani, le paia i le nofo a Sea, ae tainane Komiti Tumau. O le paia lava lea aua le susu o tausi Matagaluega ma le susu i susuga o tausi matagaluega ma faletua i so o se matagaluega. A o se tapuaiga foi ma se nofo tatalo i le susuga i le Taitaifono i le Fonotele ma lana laulau, le susuga i le toeina faatonu, ma le mamalu o le nofo a toeaiina, ma le vaega o matata taitasi i le paia i le ekalesia. A o se tapuai foi a le afioga a le Akiepipikopo ma le mamalu o lana aufono, le afioga i Patele ma Tamaitai sa, felela, nofo a tiakono ma fesoasoani i totonu o ekalesia taitasi. E le faagaloina foi le tapuai mai i le susuga i le Taitaifono o le ekasia o le Faalapotopotoga a le Atua i Samoa, mamalu o le aufono, susuga i toeaiina, le paia o le aufaigaluega, ne i le oo se faamatalaga i nisi o ekalesia sauoo a ekalesia i Samoa, ae talitonu o la outou tapuaiga ma la outou tapuai tatalo, e manuia ai faiva, filifiliga a Samoa ua fai ai matou ma auauna, matou te tautuaina upufai a lo tatou Malo.

Lau Afioga i le Fofoga Fetalai, e matauina lava lenei Tulafono, e matau mai tua ae le i oo mai i lenei Maota fonon mamalu. E tasi lenei Tulafono, na lagona ai lava i lou lava loto, ma le paia o le aufaigaluega i lou itumalo ma le ma itumalo, e tagiuu o le loto. E mai le aso na tulai ai le aufaigaluega a le Atua i le maota lea, sa ou vaai ai o savali si ou uso faifeau, ma lana toniga lanupaepae, ae savali i totonu o le pa. Na tagi lou loto ma ou faapea ane, o au le isi tagata lea pe a ou ioe i le Tulafono lea, ua ou momolia lou uso i luma o le Tulafono.

Ae peitai o le faaosofiaga o le agaga o le Atua, na mafaufau ai o le a se taimi, o le a se aso, e maua ai se avanoa e faaleo ai se lagona, o le ala lea o le faapai i lenei itumalo. E faafetai i lenei avanoa. Na talatalanoa foi i le paia o le itumalo i le aufaigaluega, o le usitai o le measili lea. E leai se mea e mafaia e le aufaigaluega, tulou lo outou faafofoga mai, pe alu atu le Tulafono a le Malo e totogi lafoga. E leai foi se tala e tu ma tetee leaga o le usitai le mea e manaomia. Ae o le tasi lea anavatau o le Talalelei e lauga o le usitai. Ae paga e, fai mai se mau a le tama o lenei itumalo, ua faaali lona lagona talofa e, ua faatusa e lea tama le Tulafono lea ma le faiga o le lafoga, o se tulou se upu e to atu, i le tautinoga a lea tama, fai mai o se mama e to i fofoga. Na ou fesili o le a le uiga? E talitonu e malamalama Samoa ma lau faafofoga, tulatoa o le atunuu i le uiga o lea upu. Ae ou te manatu faamatai tausi aiga ma matai tausinuu, a o se matai fai matafale e tautua i le ekalesia. O tatou uma lava tatou te fai matafale, e fai lau monotaga, e te le manao e toe aumai se mea ua e lafo mo le Atua.

E tele upu o le Tusi Paia e faatusa ai lea mea, e faatusa i le ia e aumai ai le tupe, ua faatusa i le usitai, ae o le talitonuga o lenei itumalo, e fai ai lou leo faatauva, sa lagona lava e tino i tua le vaivai o le loto ma le mafaufau. Ae ou te faafetai foi i le Malo lea ua filifilia e le Atua ua ae se tofa, lau Afioga i le Minisita e tauala atu i lau Afioga i le Fofoga Fetalai, malo toa. Ou te faatusaina lau Afioga, o oe o le malali a le Atua i le Maota Fono lenei. E leaga a oia le vaafolau o Samoa, ona puluki lea i le malali aua ne i osofia le sa o Samoa i se sualiu. Ua a nei? Ua e malaliina le Tulafono, aua ne i osofia i se sualiu ne i faaletonu le folau a Samoa. E momoli le faafetai i lau Afioga.

Ona i ai lea o le talitonuga o lenei itumalo, matou te lagolagoina le Tulafono Toe Teuteu, ae a faapea foi e tusa ai ma tuualalo, e toe totogi tupe po o lafoga a le aufaigaluega sa lafo. O upu lava e fai i le Maota lenei, tatou te le toe tepa i tua, ua see lo tatou sa. O lea ua tatou agai i luma, o le a le mea sa tupu i tua, fai ma lesona o nei ma a taeaoa. Ae a tatou toe foi foi i tua, ona toe fesili foi lea o luma po o le a le mea a toe fai i tua. Lau Afioga i le Minisita, a fai lava o lou finagalo, aveese lafoga a faifeau, o lau tuualalo, aua tatou te toe tepa i tua. O le tulaga foi i lafoga a faifeau lautele, e leaga e i ai isi ekalesia, e iu mai i aoga faafaifeau tulou, ae le faigaluega uma, e nofo aiga tulou, o le ala foi lea ou te le auai sou lagona po o sou manatu, le paia o lenei itumalo, e aafia foi le aufaigaluega e le o tausinu. E manaia o lea ua i le Tulafono, e aveese lafoga a faifeau o lo o tausinu ma nopiai i le paia o afioaga. E leaga o le sa Levi lava ia, e leai sona tofi, ae ola tulou, ma lona faasinomaga ma lona faamanuiaga, o le sefuluai, po o le tupe alofa lea a le tagata i le aufaigaluega a le Atua.

Ona faatai lea o se manatu e le umi, e momoli ai le faafetai i le Minisita i lou lagalaga i lou maemae i le afioga i le Palemia, aua e ui lava i se manatu, leaga a le maua le tasi i lau Afioga ma le paia i lau aufono le Kapeneta, e le maua manatu lelei e pei ona i ai lenei aso.

Ia agalelei mai le Atua, maua le tofa i lau Afioga i le Palemia, maua le tofa i lau Afioga i le Sui Palemia e ana le Tulafono, a o se manatu ma se lagona tuualalo i Minisita o le Kapeneta, fuga pea le tootoo i lau Afioga i le Fofoga Fetalai, aua le taitaina o le tatou Fono ma le mamalu o sui usufono a le Palemene, e le gata i lea o sui usufono uma. Ae ola le sui usufono mo Salega i le alofa o le Atua. Soifua.

FOFOGA FETALAI: Ua faamalo saunoa i lau afioga i le sui usufono mo Salega Nu 1. O lea ua tuuina mai lou sao aua foi le Tulafono, malo faafetai. Ua faafogafoga foi le itumalo ma le aufaigaluega, o lea ua aumai le sao o Salega Nu 1.

O lea e matau atu ua...ia tulai mai lau Afioga i le sui usufono mo Faasaleleaga Nu 2.

Afioga MAGELE SEKATI FIAUI (Faasaleleaga 2.): E tulai lava ma le agaga faaaloalo e talisapaia foi le avanoa ua maua i lenei vaega o le afiafi, e faafetai atu i lau Afioga i le Fofoga Fetalai. E manatu lava i le tapuaiga a si ou itumalo, e matauina i galuega o lenei aso, o lea ua maua atu se tasi o Tulafono sa tatou fale, a o lea ua agai mai se tasi o Tulafono, ne i pea ane po o fea lava le mea o moe ai le sui usufono. O le agaga lea, e tulai ai ma le faaaloalo e fai atu se sao o si ou itumalo, e avatu foi se vaivaiga e lagolago ai tulaga o le Tulafono, ua lumamea nei.

Ona ou faafeiloai atu lea i lau Afioga i le Fofoga Fetalai, lau Afioga i le Palemia ma le mamalu o le Kapeneta, Minisita Lagolago tainane le afio o lau Afioga i le Sui Taitai, ma sui usufono mamalu uma o le Palemene o Samoa. O paia ma sa o Samoa o le a le toe oo i ai se faamatalaga, ae o le a agai tonu se manatu e tusa ai o le Tulafono, e puupuu foi, e puupuu foi le lagona. I le silasila ia a lenei itumalo ma le vaai, e vaai i itu lelei, na fausia ai se Tulafono.

O le a le toe agai i tua i talaaga o Tulafono ma tulaga faapena, e manatu o lea ua saunoa le toatele o sui usufono mamalu o le Palemene. A o lenei lava sui usufono e agai lava i itu lelei na fausia ai Tulafono. Sa tilotilo ma matau i Tulafono talu ai, e pei e ese foi itu sa silasila i ai Faigamalo talu ai, i lau lea matau, e ese foi le ankle sa tilotilo mai agai i ai. Ae peitai ua tulai mai foi le Faigamalo i le taimi lenei, e ese foi le ankle ua tilotilo atu i ai latou e tusa ma le Tulafono. O le itu lelei mo au lava ia, aemaise o le faafogafoga a si ou itumalo. I le matau ma le vaai i le faavae o Samoa, e pei e tolu tulaga aoatetele i lau lea matau. O le faakerisiano, o le faale-aganuu ma le faale-Malo. Ona ou manatu lea i le tilotilo i le Tulafono e pei ona i ai, i le tulaga i lafoga a faifeau, e tilotilo lava foi ma matau pei sa lilifa le silasila i le tamaoaiga o le atunuu, i nisi auala e maua ai le tamaoaiga o le tatou atunuu. I lou manatu na o au, o se itu lelei e le i faapea na tilotilo i se isi vaega a o se itu sa agai i ai le tilotilo mo le manuia o tagata lautele o le atunuu ma tulaga faapena. Economically speaking e faapena se lagona, e pei o e itu lena. O lea lava e talitonu o lea sa faaaoaga lelei lena seleni mo le tamaoaiga o le tatou atunuu.

Ae i le matau i le tulai mai o le Faigamalo lenei, ua tulai mai nei, e ese foi le latou foi silasila i ai i le Tulafono. E pei e faapena le vaai ma le tilotilo e pei e lilifa le tilotilo agai i le vatapuia aemaise o le tulaga faakerisiano. O le tatou va nonofo ai ma faafeagaiga tau i le lagi, aemaise o manuia tatou te maua mai i lo tatou Tama oi le Lagi i le tulaga faale-agaga, spiritually speaking e faapena se lagona, e pei o ankles ia e 2 o lea ou te matauina e au ia, o itu lelei. Po o lea lava le itu tou te mafaufau i ai, ia te au ia, o lea lava sa faamanuiaina ai lo tatou atunuu. O le mea lea e faamalo ai foi i lena Itu i le Afioga foi i le Taitai ma lena Itu i lea futia ua alu, i le tulaga sa agai i ai le silasila i le tamaoaiga o le tatou atunuu.

Ae faafetai foi i le Palemia ma le Kapeneta ua tulai mai, i le tulaga ua agai i ai le silasila i le vala lea, i le tulaga i le va nonofo ai i le tulaga o le vatapuia ma faafeagaiga aemaise foi o tulaga faale-aganuu. O mea lelei uma lava, aua le manuia o le tatou atunuu. Atonu la o le a le toe maua mai le lafoga i le tupe ma le seleni e pei ona i ai le faamanuiaga e tusa ai ma le Tulafono talu ai. Ae o lea o le a maua mai le faamanuiaga e sau mai luga, e ala lea i le tatou toe aveese mai o le lafoga ma faifeau. E manatu foi, o le faanonogamanu a faafeagaiga i totonu o le tatou atunuu, e manuia ai o tatou faiva ma tiute. E manatu foi o le latou galuega lea o lea ua manuia ai Samoa. E ui lava ina afatia i le faamai, a o lea lava ua vaaia ataata o tauleleia. E pei e faapena atu ai se vaivaiga ma se lagona o lou sui usufono.

E pei ona fai atu e puupuu lava se lagona, lau afioga i le Minisita, e momoli atu le faamalo i le tulaga lea e pei ona taua ai teuteuga, o lea ua maua i finagalo o nisi o sui usufono, pe a faapea o le a faataunuu lea vaega. E manatu e na o au le sui i lau matau pe a fai e sao, na o au le sui o lau ekalesia, le Ekalesia a Iesu Keriso o le Aupaia o Aso e Gata ai i totonu o le Palemene o Samoa i lenei taimi. E le tuua foi i lalo, e manatu foi, e tele foi le sao o si a matou ekalesia i le tatou atunuu i lona tamaoiga ma tulaga faapena. E le tau faailoa ia vaega, ae o le lagona lena, pe a fai o le a i ai le tulaga o le a le gata i tausinnuu ae o le a faasafua ma faifeau uma, e i ai ma faifeau o lea e faigaluega, e pei ona tau maua atu i nisi o finagalo.

O le tatalo lena a lenei sui usufono e fai ma sui ia manatua ane epikopo a lenei ekalesia ma Peresetene o le Seketi, o la e foi e faigaluega. Aua o lenei ekalesia, e tagi lava i lima, faifeau e faapena, e o lava latou e sue a latou fasifalaoa, tulou o le upu e to ia te au, e tagi lava i lima le...Pe a faapea e i ai se na teuteuga, e faapena le lagona, se i manatua ane ia na i faifeau uma a si o matou ekalesia, epikopo uma o le matou ekalesia, po o fea lava o i ai, aveese ma latou lafoga pe a tau ane ai.

O le isi vaega lea o le tulaga i le refund e pei ona maua i nisi o finagalo, e tauese laititi lou manatu i le refund, i le toe faafoi o le tupe a faifeau lena, le tax a faifeau lena ua i ina. E i ai lava le lagona, o la e faafogafoga mai faafeagaiga ma i latou sa togi le maa i lea taimi, e i ai le manatu ailoga o latou toe manaomia le toe faafoi atu o latou seleni. Ae taatia pea i ina e fai ai fuafuaga a lo tatou Malo mo lenei taimi. Ae mo le agai i luma, ou te iloa o lea o le a matua talisapaia ma fiafia, pe a fai o lea o le a faapafala tulaga sa i ai, ae toe aveese tulaga ia.

Ona faaiu atu lea o se lagona, sa ou manatu tele o le a le oo i tulaga o le Tusi Paia e faapena, e eseese lava foi o tatou faauigaga ma tulaga faapena. Ae peitai e i ai lava si au mau e tasi e faaiu ai lau tamai lauga, o se tasi lenei o mau sa faavae ai lou olaga ma o lo o faavae ai lava i le taimi lenei. E aumai i le Tusi o Mataio lea sa taua e le afioga i le sui mamalu o Faasaleleaga 5, o le Mataio mataupu e 6, e manaia lena mataupu.

Ou te valaaulia foi le tatou Palemene, a maua se avanoa toe silasila i ai, o le lauga faaauau a le Alii Faaola i luga o le mauga, ina ua uma ona fai lana lauga faa-amuia, ona faasolo loa lea o lana lauga lea e i ai le mataupu lea e 6. O lena e amata i le aoaoga o le tatalo i le Atua, faasolo atu i le anapogi, tulaga faapena. O le fuaiupu la e 31,32,33, o le taua ia ia te au o fuaiupu na. Ona lea o le a ou taumafai e faa-Samoa atu, ona e faa-Peretania lau tusi lea e uu. O le fuaiupu 31, o lena e fai mai, take no thought what you shall eat. Aua tatou te mafaufau po o le a le mea tatou te aai ai, po o le a le mea tatou te feinu ai, po o le a le mea tatou te lavalava ai. Ona faasolo atu lea i le fuaiupu 32, o le fuaiupu la e 33 na e fai mai, o le a ou taumafai e faa-Samoa atu. Ia outou muai saili le Malo o le Atua ma lana amiotonu, ona faaopoopo atu ai lea o mea uma ia ia te outou. O lagona na e faaiu atu ai se lagona o lenei sui usufono. E faapena, ia lava lo tatou faatuatua, tulaga foi i suiga ua i ai Tulafono i lenei taimi, ia tatou talitonu i le mau lea, ia ona tatou muai saili le Malo o le Atua ma lana amiotonu e matuai faamanuia le Tama oi le Lagi i lo tatou atunuu.

Ia faamanuia le Atua i lau Afioga i le Fofoga Fetalai, faamanuia foi i le Palemia ma le Kapeneta aemaise o sui usufono uma o le Palemene, ia maua foi se finagalo afioga i le Loia Sili ma lana Matagaluega faapea foi Ofisa sili o Pulega o Matagaluega a le Malo, ma Pisinisi tumaoti ua tatou faatasi i lenei afiafi, ae ola le leo o Faasaleleaga. Soifua ma ia manuia.

FOFOGA FETALAI: Ua faamalo saunoa i le sui usufono mamalu mo Faasaleleaga Nu 2. E faafetai o lea ua aumai lou sao, e le gata i lea, ua aumai lau fesoasoani i le Tusi Paia, o lea foi ua faalogologo atu ma le totoa le tatou Maota, tau ia ia aoga le faasoa. Malo saunoa.

O lea e matau atu ua sauni mai le sui usufono mamalu mai Satuapaitea.

Afioga Hon LAUTAFI FIO SELAFI PURCELL: E faafetai i lau Afioga i le Fofoga Fetalai, ona ua lamalama faaiu le tatou galuega, ae tatau pea ona avatu se leo i le Tulafono lenei. Ona o se Tulafono sa tatou le toe mananao e talanoa i ai, pe a na faapea e alu lava i le aluga o mea. Aua e le o se Tulafono e faigofie ona faatulai mai, atonu o lea e faigofie ia outou lea e fou mai i le Maota, faatoa maua lo outou avanoa tou te sausaunoa ai foi, ma faaali outou finagalo i ni lagona sa ia te outou, i taimi e le i avea outou ma sui usufono. A o lea ua maua le avanoa, o lea ua outou sausaunoa mai ai. Ia te au lava ia ma le manatu i ai i le Faigamalo ua tea, na ou faapea ailoga a toe lotea lenei Tulafono. A o le auga nei o mea ua tatou i ai i nei vaitau. E faafetai i finagalo uma ua faaalia, i lena itu, e faafetai foi i le Minisita i se tofa, o lea foi e maua le avanoa tatou te toe velo aso ai i le Tulafono Tau Faaofi lea. O le auga lava latou ia tulai mai se Tulafono ia manuia ai Samoa. O le talitonuga lena o le matou Faigamalo, o se Tulafono e tutusa uma tagata Samoa, o le auga lena.

E pei ona sa saunoa foi nisi o sui usufono, we have people who live under the same roof, everyone is equal under the Constitution.

Na fai mai le tala a le isi tagata Amerika tautaua o Benjamin Franklin e i ai lona ata lea e tilotilo i le tupe Amerika na e tu ai lona ata i ina, e tusa o le founding member lena a Amerika, fai mai lana tala sa fai i totonu o le Senate, e 2 lava mea e mautinoa i lou olaga, olaga o se tagata ola. O le mea muamua, e te oti, sei tulou. O lona lua e totogi au lafoga. There are only two things are ensure enough, one is you die, two, is pay taxes. O le loloto lena o le talitonuga e leai se tagata e tataua ona ola ma sana maa e lafo, broad sense. O tagata uma e ola i le lalolagi, o lou sao lea i lou nuu, e i ai lau maa e togi, o tagata ola, e i ai le eseesea se i tulou le Maota, e i ai le eseesea ma meaola. O tagata e ola i social communities, e le ola toatasi se tagata, e pei o tatou i Samoa, e ola i totonu o nuu, i communities.

O totonu la o faalapotopotoga o tagata, e i ai obligations e tataua ona e faia, leaga o lea sa ave lau mataupu lea o le Sociology lea la ou te talanoa atu ai. E i ai....

FOFOGA FETALAI: Ia malie le sui mamalu se i tuu atu le avanoa i le Minisita o le Siosiomaga.

Afioga Hon Toolesulusulu Cedric Pose Salesa Schuster (Minisita o Punaoa Faalenatura ma le Siosiomaga): Lau Afioga i le Fofoga Fetalai, e le fia faalavelave foi, ae o le faafesili ona e fia malamalama ona o lea ua taua e le sui usufono faapea le toatele o sui usufono o lea Itu o le Maota, o lo o taua pea le mea lea, e tutusa tagata uma i le vaega lea e taua o lafoga. O le faafesili pe na totogi ni lafoga a tatou faifaatoaga, ma tatou faifaiva ma isi, tagata uma a lo tatou atunuu i Tulafono i tausaga ua tuanai?

FOFOGA FETALAI: E leaga o lea ua tuu mai le fesili a le Minisita, malie lau Afioga i le sui usufono mo Satupaitea.

Afioga Hon LAUTAFI FIO SELAFI PURCELL: Sa ou faapea e loloto le tofa a le uso lea, e faauiga i le lautelega o mea. O le faifaatoaga, o lea e alu i le afiafi e aumai talo, e aai ai le aiga, aai ai le latou nuu, o lona sao lena. A fai ni saogamea a le nuu, fai atu, alu oe e fai mai... o lou aoga lena, o lou aoga lena. Ou te le o fai atu faapea e na o le lafoga lava le mea e i ail au social obligation, e leai, e tofu tagata ma lana. O le agaga o le Tulafono lea, ona ua i ai le agaga, e ese lava faifeau e le o i totonu o le community lea e nonofo ai tagata, e pei e tuuese e tatou, nofo mai o i le lalolagi la e nonofo mai ai faifeau, ona pei lea e ave i ai le mea foi lea, e ese lava faifeau. A o le mea foi na oo mai foi faifeau fai mai, se o matou, se matou te fia i ai i ina i le tatou social foi lea gathering la e fai. O le mea lea ou te talanoa atu ai, o le mea foi lea e saogalemu ai le olaga o le tagata, e ese mai ma manu e alu

lava le manu ia i le mea e ola ai. A o i, e pei o se taumafaiga ia tutusa le avanoa e ave i tagata e fai mai ai o latou sao i totonu o le tamaoaiga o le tatou atunuu.

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia fai mai sina malologa a lau Afioga i le sui usufono mamalu, se i tuu atu le avanoa i le Minisita o Galuega, le iloa pe fesoasoani atili ai i lau saunoaga.

Tofa Hon Olo Fiti Afoa Vaai: Lau Afioga i le Fofoga Fetalai, e leai o lea lava sa ou fia faalogologo i se tali i le fesili a le Afioga i le Minisita o le Siosiomaga, pe sa i ai se tax, pe na fai ni tax a le aufaifaatoaga. Ia o lea ua tali manino, o le aufaifaatoaga lava ia e toto fua o faatoaga. E faapena uma lava le galuega faafaifeau, lea foi e i ai le fatu lea e toto e faifeau aua le ola faaleagaga o tagata. E tutusa lava la, e leai lava la se eseese. O e tau maua mai le mea lea ou te talanoa atu ai?

FOFOGA FETALAI: Ia, tulai mai, o fea e agai i ai lau faauilavea le sui usufono mamalu?

Tofa Lealailepule Rimoni Aiafi: Lau Afioga, e taua foi le tulaga lea lau Afioga, o le Tulafono lea tatou te talanoa ai, o le Tulafono o Lafoga a Faifeau. Ana tatou talanoa i Tulafono o Lafoga a Faifaatoaga, e tatau foi ona totogi lafoga a faifaatoaga. O le eseese lene o mea lea e i ai nei. Ma le faaaloalo lava.

FOFOGA FETALAI: Se i toe tulai mai lau Afioga i le Minisita.

Tofa Hon Olo Fiti Afoa Vaai: Lau Afioga malie ona o lea sa manino i le saunoaga a le sui usufono mo Satupaitea, o le latou faigamalo ma le tilotilo ina ia tutusa tagata uma. O le mafuaaga tonu lava lene na fesili ai le Afioga i le Minisita o le Siosiomaga. Ia o lea ua talanoa mai i i, a o lea ua galo ia te ia le isi fatu lea e toto e le aufaigaluega a Iesu.

FOFOGA FETALAI: Tulai mai le sui usufono mo Satupaitea e faaauau le saunoaga.

Afioga Fepuleai Faasavalu Faimata Sua: Lau Afioga pe maua se avanoa?

FOFOGA FETALAI: E te faauilavea i fea le sui usufono mo Salega?

Afioga Fepuleai Faasavalu Faimata Sua: Leai e agai atu i le sui usufono mamalu mo Satupaitea.

FOFOGA FETALAI: Oi, o le saunoaga a le sui usufono mo Satupaitea. Ia, saunoa mai lau Afioga i le sui usufono mamalu mo Salega 1.

Afioga Fepuleai Faasavalu Faimata Sua: Faafetai mo le avanoa. E ese le taua i lou lava sui usufono o le gagana lea e tupu i totonu o lenei Maota Fono o le tausii mamalu. Na ou faalogologo ananei atu i le saunoaga a le sui usufono mamalu lea, faapea a ia ai e mamafa le tofa a le tama lea, tulou, leaga e faigata ia te au o le Afioga i le Minisita o le Afioga ia Toeolesulusulu o le matai tausii, a o le faaululuga foi o le itumalo ma le afioaga. Ia pei o le ala lea ou te... e le o se isi itu a o le mamalu aua lava ne i taufaatauvaaaina le paia ma le mamalu o sui usufono ma le mamalu foi o sui usufono filifilia mai e itumalo ma nuu. Faafetai.

FOFOGA FETALAI: Faamalo lava faasoa, o lea ua maua atu. Ia e le i maua atu e le Nofoa le saunoaga lea a le sui usufono mamalu. Ia faaeteete foi i a tatou upu ma saunoaga e ao lava ona aloaia le tulaga aloaia o le Palemene ia aemaise foi sui usufono mamalu.

Afioga Peseta Vaifou Tevagaena: Lau Afioga i le Fofoga Fetalai, o se mea e fia faamalamalama ma fia faasao i le Afioga i le Minisita, leaga o au le isi sui usufono lea na aafia i lau lauga le tulaga lea, e leai se isi i luga atu o le Tulafono, e tutusa tagata uma i le Tulafono. O le mau lea na ou avatua lea na faaali atu ai e le Atua le vavega ia Peteru, alu e totogi lafoga. O le a le mafuaaga o lea mea? O le usitai. E tau atu ai e Iesu i le au ao lafoga, e sili le usitai nai lo le gao o le mamoe poa. Ma lou faaaloalo lava.

FOFOGA FETALAI: Ia, ua atili ai lava ona matua sese. Ua leai lava ma se mea o manino i le faafesili a le Afioga i le Minisita. Na faapea e tulai mai o le a maua se fesoasoani. O le mea lea, faaauau le saunoaga lau Afioga i le sui usufono mamalu o Satupaitea, ma se i faapena ona e sao foi le saunoaga a le Afioga i le sui usufono mamalu o Salega. Ia e le i maua atu e le Nofoa, ae tatau foi ona tatou maua le faafealoaloai ina ia faapena ona maua pea le mamalu o le tatou Maota. Ia saunoa lau Afioga i le sui usufono mamalu.

Afioga Hon LAUTAFI FIO SELAFI PURCELL: Faafetai. Ia talosia ua maea foi le vala lea na tea nei lea ua uma mai ai faauilavea. Ia, e leai e masani lava Toeolesulusulu ia i nai a maua tala e faapena. Afai ua tetee lou finagalo Toeolesulusulu, ia e faamalie atu. O le mea lea sa taumafai atu ai, e pei o le auga lena o le tatou Tulafono lea sa faamamafa ia aua ne i i ai se isi e i ai sona manatu e le o i ai sona sao i le tamaoiga o Samoa, po o le a lava. Afai

lava o lou tofiga o lau filifiliga lea ua e tulai ai i se tulaga i lenei taimi, po o le a lava, ia i ai le avanoa e te togimaa ai i totonu o le tatou tamaoiga, e ui la i auala faapea. O lo o i ai foi Tulafono e puipuia ai i latou e mafai ona agavaa, lea sa taua e i ai le threshold, e le faapea o faifeau uma lava, o la e i ai isi faifeau e le o lava latou seleni maua, o la e ese isi auala pei o mea ia ou te talanoa atu ai e fai ma latou sao i totonu o le olaga lenei tatou te nonofo ai i nuu, Ekalesia ma tulaga uma faapena. E pei o tulaga na sa taumafai lava ia...

FOFOGA FETALAI: E manatu le sui usufono mamalu se i tuu atu le avanoa i le faauilavea a le Afioga i le Minisita o Faatoaga.

Susuga Hon Laauli Leuatea Polataivao Fosi: Lau Afioga i le Fofoga Fetalai, faafetai. O lea e matagofie lava le faasoa a le sui usufono mamalu mai Satupaitea. Ae na ona ou faamanatu lava, ou te taofi lava au ia, e leai lava ma se isi e le o fai soa ona o le tatou VAGST. E leai ma se isi o le tatou atunuu lenei e le o togi se maa. Ae na ona ou faapena atu, leaga pei a tatou agai faapea o faifeau tausuu e leai so latou sao, lea foi sa fesoasoani atu ai le Minisita o le Siosiomaga. Ia na ona ou faapena atu. O le tatou VAGST, ou te taofi, mai lava i le tamaitiiti e tau i le tagata matua, ia, o lo o faapena ona lafo le lafoga. Ia na ona ou fesoasoani atu i le finagalo, ne i te i ua matau faapea a aveese nei ia lafoga a faifeau ua leai so latou sao. Ia, e tautala ma le faaeteete i faafeagaiga taulagi nei e tausuu, e matua matautia le mea, 24 itula, 7 aso o le vaiaso, o le a le taimi e tupu ai le faalavelave i nuu, so o se ituaiga faalavelave, e tulai lava. Ia, o le contribution in life and death lena, i lau lea mau. Money cannot even buy them. Na ona ou faapena atu, ae faalatalata mai lau tala, leaga o lea tatou te talanoa i le contribution, VAGST, lea na tatou omai lava i le 15% e tatou te o ai lava i le 15%. Ia o le fesoasoani atu lena. Ma le faaaloalo.

FOFOGA FETALAI: Ia, ou te iloa o lea ua tele foi le faasoa mai a le Afioga i le Minisita lau Afioga i le sui usufono mamalu ina ia faapea ai e le o i ai se sao o faifeau tausuu, o lea ua manino. Ia faaauau mai le saunoaga.

Afioga Hon LAUTAFI FIO SELAFI PURCELL: E leai lava se manatu i se tulaga faapea. A o lea ou te taumafai atu o le taumafaiga o le tatou Tulafono ina ia auai uma mai tagata uma lava, e moni o le VAGST, o le pay as you earn lea tatou te talanoa i ai i mea tau totogi lea e i ai tax nei. E ese lava la le VASGT, o tagata uma lava o le atunuu, ese le tax lea tatou te talanoa i ai, o le mea e tau o le income tax, o lau income lea e maua o i ina e tax ai oe, e ese mai fuafuaga o le tax faalauaitetele, o tagata uma lava, e sao ai le Afioga, e mai lava i le pepe. A o se manatu lena na ala ai ona faufau le Tulafono lea i lona aoatetele, ia aua ne i i ai se tulaga e faapea se isi, o la e

fai lava latou, fai lava le Malo, fai le aufaigaluega, a o lea lava matou te nofonofa o lea foi e tele matou tupe o lea e maua, e tatau ona matou agavaa foi matou e togi sa matou maa. E pei o le agaga lenei, e faigofie lava.

O le tulaga lea faapea e pei e le amanaia faifeau, ia o se matua mamao mamao lenei talitonuga ma le faigamalo lea sa i ai. E leai, o ai le tagata o le a faia se manatu faapena e le amanaia faifeau. O ao o faalupega, o faifeau na, ao o faalupega, lea tatou te o, e fai loa se lauga, le susuga i le ao o faalupega. O le honour lenei, o le honour lenei lea ua tatou aveia i auauna a le Atua, ma e tumau e faavavau, e le mafai ona aveesea e se Tulafono, e le mafai, le mafai lava. O le taumafaiga a le faigamalo lenei e tuu i totonu o le Faavae, Faavae i le Atua Samoa i totonu o le Tulafono Faavae. Atonu o le faamaufailoga lenei o le amanaia e le Itu lenei o galuega a faifeau ma le faakerisiano o lo o la ai Samoa, lea e asu i aso uma, aso i po e faafeagaiga taulagi le ipu lea o le vai o le ola lea tatou te soifua manuia ai. I le tulai mai i lenei vai i le tele o luitau, o ai tatou te tepa i ai? Tatou te tepa lava i faifeau, ae aveese la le mea lenei ma le tulaga lea faapea a togi se lafoga a le faifeau ona le faamanuia lea o le Atua ia i tatou. E leai ni tulaga faapena. Na pau le mea lea e taumafai atu, e le i i ai ni manatu faapea e le amanaia faifeau, e faapea atu e tatau ona togi se lafoga a faifeau. Ioe. Ina ia i ai so latou sao o lea e fia mananao mai ia auai uma tatou i totonu o le atunuu lenei tatou te ola ai, e tutusa uma tatou i lalo o le Faavae ma Tulafono e auala mai le Faavae, Tulafono la ia tau lafoga. O lea e manino lava, e le faapea o tagata uma. Ia lea la ua tulai mai i le taimi lenei, ia, e faafogafoga mai foi si ou itumalo, e 10 au faifeau, e i ai ma le Ekalesia Mamona e toalua au Epikopo ma Peresetene, 4 au faifeau Metotisi, e eseese uma o latou manatu. O le Assembly of God, e i ai uma lava, o le Asofitu. E eseese o latou manatu, a o le latou faaiuga lava, o le a le Tulafono e aumai e le Malo matou te lagolagoina. Ia ae leaga o au faifeau, e le oo i le threshold le tele o latou, e le oo i le tupe lea e amata ai ona togi lafoga. Ae afai lava po o le a le tulaga, a ia outou silafia, e ese le agaga na fai ai e le faigamalo lenei, e mamao lava ma isi mea na ou te faalogologo atu o sau ai pei foi lea e le i amanaia. Ae o le tulaga lenei lau Afioga i le Fofoga Fetalai, ia, principal of fairness lea na base ai i luga na faavae ai le Tulafono lenei, principal of fairness. Everybody is fair, under the law, whether tax law, income tax law, whatever laws, everybody should be same. O le auga lenei.

Ia, e le faaititia ai le faafetai i auauna a le Atua ma le latou galuega o lo o fai o lo o manuia ai Samoa. Ia o ni manatu na lau Afioga ua uma atu ai se manatu o Satupaitea, sa lelei ma taua manatu sa fai i le matou foi taimi. Afai o lea ua tulai mai lau Afioga i le Palemia ma Minisita ua sui foi sa outou vaaiga, o le Malo lenei ua ia outou. Ma lou faaaloalo lava.

FOFOGA FETALAI: Ia malo faafetai faasoa. Ia, atonu o lea foi ua aumai foi le lagona o lau Afioga i le sui usufono mamalu, ia o se tasi foi sa fai foi

ma Kapeneta mai le faigamalo talu ai, ia e talitonu lava o lea foi ua tulai mai lenei faigamalo, ia e ese foi le latou silasila. O le mea lea, ia faafetai mo le faasoa, o lea ua manino, o lea foi ua maua atu e le Afioga i le Minisita ma le Matagaluega. E talitonu foi o le a maua foi se fesoasoani ma taua foi fautuaga ua tuuina mai.

Ia, o lea ua matau atu o lea ua tulai mai le sui usufono mamalu le Sui Taitai o le Itu Agai.

Tofa Hon LAUOFO FONOTOE NUA FESILI PIERRE LAUOFO:
Lau Afioga i le Fofoga Fetalai, faafetai mo le avanoa, e matau atu ua api le uli, ua vela foi le fala i lenei itula o le afiafi, ua faaaaogagase foi sui usufono mamalu o le tatou Maota nei, ae ua tulai atu foi aua sina manatu e fonofaapipii i finagalo faaalua o sui usufono mamalu e tusa ai ma lenei Tulafono Tau Faaofi.

O le faatulai mai o lenei mataupu, ou te manatua sa luga lalo ai foi felafolafoaiga a le Maota, a o usua le Fono i uta i Faleata i le maota taalo i uta i Faleata, ma sa sausaunoa uma ai foi sui usufono mamalu sa i ai i lenei foi Paeaiga. E leai lava foi se sui usufono e le i sii mai le Tusi Paia e lagolago ai lana mau, ia ma sa faalogologo lava ma le totoa i le taua o finagalo faaalua. E ui lava ina pei o se Aoga Tusi Paia sa fai, ae o le taua ia o finagalo ona o le mataupu e le o se mataupu foi na faigofie i lenei vaiata. O le mea la lea lau Afioga, o le tele o finagalo faaalua ua faafofoga i ai le atunuu, mai lava i lenei taimi e oo mai foi i le aso, sa tele lava foi ina agiga i luga o leitio, o televise, o upega tafailagi.

O le uiga o le tala lau Afioga, e le toe tele foi se manatu, pau lava o lea, e lagolagoina e lou sui usufono finagalo ma fautuaga ua tuuina atu, aua o lea foi e matau e uma foi see i le Komiti ona toe see mai foi lea o le Tulafono. A o finagalo faaalua ma fautuaga, ia ua auai foi ma lou sui usufono, aua o tatou, o tatou o tagata galulue, e faapena foi i lou faatauvaa, o au o se tagata e galue, e galue ma e mafua ona galue o le faatauuina o lou valaauina, faataua lou valaauina. Ma e tau i totonu o lenei valaauina, o lo o i ai tiute ma matafaioi ma galuega e faatino. O le mea la lea, o a ni tau a o ni tamaoiga pe afai e maua ai, ia viia le Atua. O mea e mulimuli mai i tua o le faatinoga o le tatou valaauina. O mea na o tamaoiga ma mea o tau.

Ia o le tulaga lea e pei e faapea a i se manatu ma se lagona lau Afioga i le Fofoga Fetalai, o lea foi ou te tilotilo atu i lau pepa totogi lea o le sui usufono, o le tele foi ia o lau tupe lea e vavae ese mo lafoga. Ae taua foi lea ia i tatou o Taitai o le atunuu, fai tatou ma faataitaiga lelei, aua o nei lava tupe, ia o lea foi e toe avatu i totonu o le Malo aua le faasoa a le Malo i le faaleleiga o le suavai, faalelele e eletise, faalelele auala e feoai ai taavale, aemaise le tatou maota gasegase e sulu atu o la e i ai le fomai, o la e maua le vaiala, o la e maua le fualaau, o mea uma faapena o lo o manaomia i le soifua lelei o tagata lautele o le atunuu.

Ia ae lua lava nai vaega e pei ona afea foi e saunoaga a nisi o sui usufono mamalu e fia ave foi i ai lau faamamafa, lea e pei ona saunoa isi sui usufono. Muamua, o le Tulafono lea o Lafoga ma le mataupu lea ua avea ma pinefaamau i le tulaga foi lea o le tetee atu, teteeina o le Tulafono ma le usitaia o le Tulafono.

Lua, e pei foi ona afea i nisi o saunoaga a sui usufono mamalu, o le mafai lea i se malosiaga o le Afioga i le Minisita ona taofia le faamalosiaga o le Tulafono e pei ona i ai. Aua o le isi taimi ona saunoa lea o le Afioga i le Minisita e faamalamalama nai vala ia pei foi ona laga e nai isi sui usufono mamalu.

A o le tulaga lava o le teuteuga, e tasi lava lau fautuaga ona o lea ou te vaai atu i le Tulafono lenei teuteu, o lo o tuu ai le malosiaga i le Komesina e faamaonia ai e ia le faifeau tausiniu, aua o lea e pei ona laga foi e nisi sui usufono, o lea foi ou te tau vaavaai au po o le a tonu le uiga o le faifeau tausiniu. O lea la ua aumai i le Tulafono Toe Teuteu, atonu o le tasi lea mea e silasila i ai le Komiti pe a oo atu i luma o le Komiti, po o le a tonu lava po o ni agavaa a le faifeau tausiniu, faifeau faauuina, pasi mai i se kolisi faifeau, ia po o le a lava. O a ni agavaa ma tulaga faapena e tau ina silasila i ai, ona faamaonia lea e le Komesina o Lafoga e pei ona aumai i le Tulafono le tagata lena.

Ia, o nai motugaafa ia lau Afioga ona e matau atu foi ua leva foi le afiafi. Ia manuia le Fono.

FOFOGA FETALAI: Malo faafetai saunoa. E talitonu foi o lea ua saunoa manino lau Afioga i le Sui Taitai o le Itu Agai, aemaise foi o le sui mamalu mai Anoamaa 2, ou te talitonu o lea ua taaofai mai i lou finagalo finagalo foi o lena Itu o le Maota. O le mea lea, ou te talitonu foi, e pei lava ona saunoa, e uma tuuina atu foi i le tatou Komiti, maua foi isi avanoa e tele.

O le mea lea, ia o le avanoa lenei i lau Afioga i le Minisita e te talifuaifua foi i nisi foi o mataupu na laga e sui usufono mamalu. Tulai mai lau Afioga i le Minisita o Tiute ma Tupe Maua.

Afioga Hon TUALA TEVAGA IOSEFO PONIFASIO: Faafetai i lau Afioga i le Fofoga Fetalai. Ou te toe faatulou atu i le malu i le paia o le Maota nei, ma e talitonu o le a le toe umi foi se faamatalaga e talifuaifua ai foi saunoaga matagofie ua faapea ona pau ai le tanoa i totonu o le Palemene i lenei afiafi.

Ou te nofo lava ma ou matau, e lagona pea le mafanafana i se faalogologo totoa foi i saunoaga aemaise o le aumaiga o le tofa ma le faautaga ua sasaa mai i lau matau, ona faatoa ou faalogo lava lea ua saausi le Palemene i le faasoia i le mataupu lenei. E ese le matagofie o lau faalogologo atu ua tatala a outou Afioga, o i ou te iloa ai le matagofie o lenei mataupu ma lona aoga, e le gata i lenei vaitaimi, a o le agai i luma, ua lagona foi le agaga o le faafetai

ona o timaiga ma tuualalo ua tuuina mai, lea ua faamauina, ma o le a toe vaavaai foi i ai. O nai mea lava ou te fia tali atu ai, e i ai lava nai mataupu ia o lo o faamalosia mai e ao lava ona avatu ai se faamatalaga. O le mea muamua lava, ia ua agai lava le tele o saunoaga i le tulaga lea o le toe faasaoloto uma o faifeau, ia soloia uma lafoga a faifeau, aemaise foi Le Ao o le Malo, i le tulaga foi lea o tupe tuua po o le a le faiga e fai i ai, toe totogi mai ma tulituliloa nai faifeau e le i totogia maia, e faapea foi tulaga o refunds ia i latou sa totogi a latou tax.

Ia, o le mea muamua lava, o nei mea, e le faapea o le a fai uma i le taimi e tasi, e toe maioio lava vaega ia i lau vaai, pe a tatou amata atu i le sitepu muamua. O le sitepu muamua pei ona ou taua, ia o le tulaga lea o le toe faapafala o le Tulafono ia ona mafai ai loa lea ona tatou savalivali i luma ma silasila le tatou Malo i tulaga uma lava ia ua tuuina mai, ma e taua, e le mafai ona matou turn a blind eye pe matou te fuli e le silasila totoa le tatou Malo i fautuaga ua tuuina mai.

O le mataupu o le malosiaga o le Minisita e taofia ai ma aveese, o upu ia lea na ou faamauina. Ou te faafetai foi i le fesili lea, leaga e taua. O le mea muamua, e leai se malosiaga o le Minisita e aveese ai se Tulafono e pei ona taua e nisi o sui usufono. o le mea lena e nafa ma le Palemene, na o le Palemene latou te suia tulaga o Tulafono. E i ai la le aso pei ona tatou fale ai. O le Tulafono lava ia o le Palemene, ae o le Matagaluega, o le Minisita. E lelei lava le avatu pea, leaga o lea ua fesiligia le tulaga lea. O le aafiaga o le Matagaluega pei ona ou taua i le itula analeila, ua le mafai ona faatino, ua le mafai ona faatino le tulaga o le aoina o lafoga. Lena na manino lava le fuainumera na tuu atu o le tupe ua mafai ona ao i totonu o le 5 tausaga, e le i faigofie. Ae mafai foi ona ou faapea atu, e le i nofonofu fua le Matagaluega sa galulue, o le latou taimi na alu i ai, le taimi o le aufaigaluega, e le i faigofie. O tupe na alu i le taumafaiga o lenei Tulafono aemaise foi le tulaga ua tulai mai, e le taugofie. Ia faaopoopo loa i ai ma le le mautonu, ia ou te le tio i le tulaga sa i ai le Matagaluega, e le i faigofie. Na tulai mai foi le tulaga o le Faamasinoga, faaletonu le Tulafono. Sa faapena foi ona toe avatu. Ia, ou te iloa ou te le tau toe faamatala, a faaopoopo i ai ma se lagona o le pressure i totonu o le Matagaluega, talofa e, ia e iu ina faaletonu ai nisi o auaunaga. E silafia foi, o lea foi na pasi le Tulafono lea o le TIMS, e oo foi i lena Tulafono, sa alu faapea, o le tala moni lena.

Ina ua ofi mai i totonu le faigamalo lenei, e le i faapea na matou omai loa oso loa le Minisita o Tiute ma Tupe Maua tili e faatino le tulaga lea. Leai, sa i ai foi feutanaiga ma le Matagaluega i le Tamaitai Pule, sa vaavaai totoa foi i ai i se tulaga ia maua le malamalamaaga ona sosoo atu ai lea ma se faatinoga po o le a le mea o le a fai. Ma o lo o manino sa oo foi lava le iloiloga o lenei mataupu i le tulaga foi lea pe a pe a tatou o e fai se lafoga e fai i lalo o le loto malie. E le i nofonofu fua o lea e faafogafoga mai le Ofisa Sili na saili, luga, lalo i se tulaga ina ia faatino ai le faamoemoe lea o le tatou

Malo, ae o lo o tumau lava le lagona, e le mafai ona fai ni mea faapena, e le o ni mea e masani ai le fai o ni Tulafono foi lea e voluntary, e tuu atu lava i le loto faitalia o le faifeau. Ae sa i ai foi le manatu, a vaavaai foi i le tulaga o lo o i ai le sao o faifeau i totonu o le tatou atunuu, le mea lea pei e noa i le tele o nisi o saunoaga na ou faalogologo atu i ai i le afiafi lenei, e pei ua tatou tuituli lava le tupe, totogi lau tax, totogi lau lafoga. Ae a fua i le tulaga faa-economics, oi, ia tatou faaeteete, leaga a tulai mai loa faifeau e fua le latou aoga. Ia taatia ia le itu tou te fia agai i le itu faaleagaga. I le taimi lenei i le matou itumalo, o lo o faaelelea faifeau i le fausia o le aoga i Samalaeulu, lea e faafofoga mai lo matou itumalo. Ioe, e le na o le itu faaleagaga. O lo o gapatia le matou faifeau i Saleaula i le fausiaina o le mamalu o le mauga o le Atua i Saleaula, o lo o taimua ma taulamua i galuega fai i totonu o le Ekalesia. Ia lena o lo o outou silafia le tulaga o lo o tulai mai i Patamea, pei ona i ai le mu na aafia ai si a matou falesa. A o ai na tulai mai? Na tulai mai foi le faifeau. Leaga e le na o le faifeau ma le falesa na aafia ai, na aafia uma ai lava le Ekalesia ma le nuu atoa. Leai na ona ou talanoa atu faapena, ae aua ta te o fua galuega a faifeau i le tulaga foi lea na o tupe. E pei o le mea lena na avatu ai sau faamatalaga analeila. E faamalulu atu foi i le sui usufono o Vaimauga o lo o faapea mai ia i se tala foi na tetena ai lona finagalo e le i lava ona liliu le tofa. E sao lelei. O lau mataupu lea na tusi i i analeila, e le i lava se taimi na liliu ai le tofa. Ma ou te talanoa foi o le faasaoga lena. E faamalulu atu ai o na e sao oe.

Ae ou te talanoa foi i faamaumauga, o le isi lea mea e taua e fafau ai se lagona ua uma ona tuuina atu. A tatou vaavaai i lipoti ma tapenaga foi a le Matagaluega sa i ai, o se lagona lava e na o au, e le i lava tapena ia le tulaga o le Tulafono.

O lea ua ou faalogologo atu e moi na saunoa ia le Sui Taitai o le la itu, o mea uma lava ia ua o tatou faafofoga muamua i ai. Ae atonu e sao ia lea tulaga, ia o au foi sa ou faalogologo ma le totoa i felafolafoaiga i luga lava o le mataupu lenei. E le i i ai se felafolafoaiga e pei o le tulaga ua saunoa i ai le Palemene i le afiafi lenei. Ia atonu o le isi lena itu matagofie o lenei afiafi ua i ai le tulaga foi lea, o le isi tagata e na o le nofonofa lava mafaufau lava i ai, ae e mafai loa ona saunoa pe aumai sona manatu, ia na te i lava lea ua lelei lona faalogona.

It's healthy debate i le tulaga o lo o i ai ia le tatou Palemene i lenei afiafi.

Tofa Lealailepule Rimoni Aiafi: Lau afioga i le Fofoga o le Fono...

FOFOGA FETALAI: Ia malie lau afioga i le Minisita se i tuu atu le avanoa i le sui usufono mamalu o Faleata Nu.3.

Tofa Lealailepule Rimoni Aiafi: Ona o lea e saunoa le Minisita i le tulaga foi lea pei o lea na lilifa ia matou faamatalaga i le Economics. E manatu

matou i mea tau tamaoaiga. E leai o lea na avatu sao lava e paleni le mea. Ia aua a tatou fetagofi e quantify ia le mea e tau o le Economics, a le faifeau ma tatou o sui usufono ma tagata uma, ia e faapena.

Manatua, ua pau le mea lea lau afioga, o le ala lea e tuusaunoa ai e le Malo ia lotu e le totogiina ni lafoga. E le totogiina ni lafoga a lotu a vaai i ai i tama lotu ia e le maua, o le fesoasoani lena a le Malo ma le amanaia lena o ekalesia uma lava.

Ae o le mea lea e tatou te talanoa ai tatou, o le a le sao a le faifeau lava a latou ia. E tatau ona fai sana lafoga. Ia e pei o le mea lena lea na avatu ai... e le natia i lalo ia le tulaga o mea ia.

FOFOGA FETALAI: Ia ua maua atu lou finagalo...

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai...

FOFOGA FETALAI: Ia se i tulai mai le Sui Taitai o le Itu Agai...

Tofa Hon Lauofo Fonotoe Nuafesili Pierre Lauofo: Leai mo le faasaoina o lau tala sa fai, o le mataupu i le tulaga o lafoga a faifeau, i le tulaga lautele, sa aofia uma ai lava ia finagalo faaalia i le aso. But if he wants to talk about specifics, e sao la oe. Ae o le tulaga lautele ona o lea ou te lauga faalauaitetele i le Tulafono.

O le Vaega lena o lea e faapena ia le tulaga e pei ona ou talanoa a o le faafofoga a le Maota i le saunoaga a le Minisita, e le o mamafa i le itu o economics ia saunoaga ae tatou te faitau eseese. O lau na faafofoga, ae e le o lau na faalogo aua a e silasila foi i le tulaga o le formula ma le faaaogaina o le formula foi lea o tax brackets lea e faaoga e tutusa uma ma tagata faigaluega. Pe o ai lava ia le tagata faigaluega e tutusa uma lava.

Ia o le tulaga lea lau afioga.

FOFOGA FETALAI: Ia o lea ua maua atu le faauilavea a lau afioga i le Sui Taitai o le Itu Agai.

Tulai mai lau afioga i le Minisita e faaauau le saunoaga.

Afioga Hon TUALA TEVAGA IOSEFO PONIFASIO: Ia o le a tatou laalaa i luma. Faafetai i lau afioga i le Sui Taitai.

O le lona lua o le isi tulaga lea o lo o i ai le faamamafa, le na saunoaina foi le tulaga faapea o le tetee o tagata i le Tulafono. O le making of Laws o le faiga o Tulafono e gafa ma le Palemene. A maea, ona see lea i o i le Faamasinoga o latou e auiliilia Vaega eseese o ia Tulafono i lona faauigaina. O Tulafono e fai e le Palemene, e pei ona saunoa foi nisi o sui usufono, e

leai lava se Tulafono o faaletonu ua oo mai. E leai foi se Tulafono e leaga, lelei.

Na saunoa foi nisi sui usufono, e i ai isi Tulafono e lelei, e i ai foi isi Tulafono e faale-lelei. E sao lelei lava, aua a ou vaai foi i ai, e i ai Tulafono e i ai ona faaaitauli. E i ai Tulafono e saisaitia ai aiatatau a tagata. E i ai Tulafono e faailoga tagata. E i ai foi Tulafono e saua, draconian laws. E i ai foi Tulafono leaga, bad Laws.

Ioe, e i ai foi Tulafono e le atoatoa aemaise lava Tulafono o lo o faatopelau ona fai. O Tulafono ia e masani ona tupu ai faaaitauli. O le fua foi lea o sau tala e faamalie atu foi pe a mamafa foi se upu na avatu, lea na oo ai le Tulafono lea o Lafoga i totonu o le Faamasinoga na afua ai ona faiaina le Tulafono i le mau a faifeau. O le a le mafuaaga? E le lelei ona tusi le Tulafono, e le i maea ona tapena le Tulafono.

Silasila foi i le mea lea faapea equality under the Law, e sao lelei lava, e tutusa uma tagata i lalo o le Tulafono. Ae aua ne i galo, e i ai le aiatatau a le tagata, e luita ai le Tulafono lea. A ou iloa o le Tulafono e faaletonu, e saua, e faailoga tagata, e le atoatoa, e aafia ai ou aiatatau, ou te alu e ave i le Faamasinoga lale. O le mea tonu lava na a faifeau na fai, o le mea tonu lava na a faifeau na fai. E le o se latou tetee i le Tulafono, o lo o vaai ma silasila faifeau i so latou aotelega, their own perspective. O le latou aiatatau lena, ou te teena le upu lea e faapea na tetee i le Tulafono. E i ai principles a faifeau, e i ai ia o latou values. O tagata soifua, o tagata aoaoina, o tagata ua faauuina.

Ia ou te le manao e tala tele i tua, ae tau lava ona faailoa atu i le Palemene, e i ai le mea e tau o le counter argument e mafai ona o tatou finau i lenei mea i le po atoa. Ae e pei e tau avatu sou taofi i le matagofie o lenei afiafi, ua mafai ona saausi le faasoia a le Palemene i lea mataupu.

O lea ou te tu ma ou matamata atu i mea a le Minisita o Faatoaga lea e fai, ua ia faamaumauina ia tagata o lo o lagolagoina. O lea la, e pei lava e na o le toatasi lava le tagata lea e... ae o sui usufono mamalu uma, ua o latou lagolagoina ia le Tulafono. O lea la ou te tulai atu ai, e leai sou manatu e faaumi se faamatalaga, ae e i ai lava nai mea e fia talanoa i ai i au faamaumauga...

Afioga Peseta Vaifou Tevagaena: Lau afioga i le Fofoga Fetalai...

FOFOGA FETALAI: Malie lau afioga i le Minisita se i tuu atu le avanoa i le afioga i le sui usufono o Faasaleleaga Nu.5.

Afioga Peseta Vaifou Tevagaena: E momoli lava lau faafetai i le afioga... o lou uso ioe, leaga o le afioga ia Tuala Tamaalelagi. Ioe, o le agaga na avatu e lou sui usufono, e mama lava ma e le mafai ona toesea upu a le sui usufono lenei o na e taoto i na i le Maota, o upu lava ia na ou tautala i ai i le aso, lea na foi na avatu i aso ua mavae.

E le pei la le sui usufono lenei pei o le ula foi lea e feseetai. A fai la ua ou tauto iinei ona o le Tulafono sa o matou fauina, e tumau lava lou talitonuga, leaga ou te tepa lava i le Atua ma Lona finagalo. A lea na ou avatua se faaitaiga lau afioga i le Fofoga Fetalai, ioe o le sini autu, so o se Tulafono e faavae i le Maota lenei, o le usitai. O le finagalo lena o le Atua, a lea na faatino lava e Iesu i le vavega lea na fai i i. Alu e totogi ia ta lafoga Peteru, uma uma, lea na usitai.

Ia ae o lea la o le ala lena ua ou tulai atu ai...

Afioga Hon Fiamē Naomi Mataafa: Lau afioga i le Fofoga Fetalai...

FOFOGA FETALAI: Ia se i tulai mai lau afioga i le Palemia...

Afioga Hon Fiamē Naomi Mataafa: Pe o le faalima lea ona lauga mai ia le sui usufono i lana mau lava lea. E leai foi ia se tatou Tulafono foi lea i le Tulafono Tumau i le mea foi lea o le talanoa soo mai i le mea e tasi?

FOFOGA FETALAI: Ia, e talitonu lava o le sui usufono mamalu o Faasaleleaga Nu.5, ia o lau lava lena mau. Ae e ese foi le... ua manino le saunoaga a le Minisita i le mafuaaga lea foi e taumafai e autalatala atu ia Vaega e pei ona saunoa, ae finagalo malie Faasaleleaga Nu.5, ia o lea lava ua saunoa le Minisita, i le suiga ua i ai nei.

Tofa Lealailepule Rimoni Aiafi: Lau afioga i le Fofoga Fetalai...

Afioga Peseta Vaifou Tevagaena: Faafetai tele lau afioga i le Fofoga Fetalai, o lea ua ou malie lau afioga i le Sui Palemia, faia lou finagalo.

FOFOGA FETALAI: Faafetai...

Tofa Lealailepule Rimoni Aiafi: Lau afioga i le Fofoga Fetalai... o le mea e fia faasao...

FOFOGA FETALAI: Tulai mai le sui usufono o Faleata Nu.3.

Tofa Lealailepule Rimoni Aiafi: O le mea e fia faasao e pei o lena e sese ia faamaumauga a le Failautusi a le afioga i le Minisita, ona o la e faamaumau e le Minisita o Faatoaga. Ia se i faasao ia faamaumauga a le afioga i le Minisita lau afioga.

FOFOGA FETALAI: Ia leaga o lea ua taua ia le afioga i le Minisita o Faatoaga.

Susuga Hon Laauli Leuatea Polataivao Fosi: O le ma eseesega lena ma Leala, leaga e mua ona faasagatau ia Fonotoe ae le lagolago ia Fonotoe. O le mea tonu lena. That's why you dropped. It is my responsibility to help the Deputy Prime Minister. O lou tiute lena, ae soia ia e te ita ia Peseta ma Loau.

Tofa Hon Laufo Fonotoe Nuafesili Pierre Laufo: Lau afioga i le Fofoga Fetalai ia o lea ua tau fua lou igoa.

FOFOGA FETALAI: Ia ae malie ia...

Tofa Hon Laufo Fonotoe Nuafesili Pierre Laufo: Ia ae lau afioga i le Minisita o Faatoaga, e le o faasagatau mai... a faasagatau mai e usitai, e usitai. O le tama lea, o le usitai ia. E usitai lava i mea ou te fai atu ai.

Tofa Lealailepule Rimoni Aiafi: Lau afioga, e sao ia le afioga i le Minisita, leaga o matou e le manaomia ni failautusi. E fai lava e le tagata ia. E tasi lava le failautusi o le HRPP, o Lealailepule Rimoni Aiafi.

FOFOGA FETALAI: Ia malo faafetai, faafetai foi faasoia, ia aemaise foi faasuaga o le afaifi. Ia e talitonu lava, o faasuaga lava o totonu o le Maota ia te outou o sui usufono mamalu.

O le mea lea, ia ua maea le saunoaga a lau afioga i le Minisita. Ia faamaea maia lau saunoaga lau afioga i le Minisita.

Afioga Hon TUALA TEVAGA IOSEFO PONIFASIO: Ia ou te iloa ua taoto foi lau afioga i le Fofoga Fetalai ia se lagona ua malie foi aua foi saafiafiga o taimi faapenei.

Ia tumau pea ia tulaga mamalu o le Maota, ae e i ai lou talitonuga lau afioga i le Fofoga Fetalai, e pei ona e saunoa, e uma ona faatea atu lea o le tatou Tulafono lenei i le Komiti e latou te iloiloia. Ia o a foi nisi tulaga sa saunoa ia le Palemene, ia o le a tatou toe talia le toe lipoti mai ia aua foi le silafia a lo tatou Palemene.

O le agaga o le faafetai lau afioga i le Fofoga Fetalai e le uma. E lagona pea le agaga faafetai ia aua foi le tofa aemaise foi le mamalu o le tatou Palemene i le afaifi ia ua malie lou sui usufono. E faamalulu atu foi i tulaga sa tulai mai i lenei aso o le faaleleia o le tatou mataupu. Ia e pei ona outou silafia, o le sui usufono lenei e fou i totonu o le Palemene, ae sa taumafai atu lava i se tulaga ona o le naunautaga, ia tini lava ma sao le faamoemoe.

O le agaga lea e faatea i nuu le aina ni lafoga e le tusa ai ma lo outou faafoga. Ae momoli atu le agaga faafetai.

Faamanuia pea le Atua i le tatou Palemene, lau afioga i le Fofoga Fetalai, le afioga i le Palemia ma Minisita, ma sui usufono mamalu uma o le

Palemene, ia aemaise foi ia Sui o Ofisa Sili ma Faatonu o Pulega, ia ua o tatou auai i le malu i lenei afaifi.

Ia soifua ia.

FOFOGA FETALAI: Ia faamalo saunoa i lau afioga i le Minisita o Tiute ma Tupe Maua. Ia e talitonu foi, ia o lea ua faafofoga ma le manino ma le totoa le paia o le Maota ia e tusa ai foi ma lau talifuaitau i mataupu na laga e sui usufono mamalu o le Palemene.

Ia o lea foi ua saunoa manino le Minisita, ae o lo o maua pea avanoa, pe a see atu ia le tatou Tulafono i o i le Komiti. O le mea lea malo le saunoa i lau afioga, faafetai foi mo finagalo faaalua e tusa o lenei Tulafono.

Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua 2021 i lona faitauga faalua.

FOFOGA FETALAI: E tusa ai ma Tulafono Tumau, e 102(1) o le a tuuina atu le Tulafono Tau Faaofi i le Komiti, o le Vaega Tau Tamaoaiga mo le iloilo ina ma toe Lipoti mai i le Fono Aoa o se Fonotaga o lumanai.

E talitonu o lea ua tatou taunuu mai i le siui ma le taualuga o tatou Tualumaga e tusa o galuega sa faatulaga mo lenei aso fonu. E fia faaleo ai lava le agaga faafetai o le Fofoga Fetalai, i le paia o le Maota ona o le tofa fetalai'i sa mafai ona sologa lelei ma toafilemu ai le tatou galuega. Ua faamalo le usufono malo saunoa. E faafetai i le amanaia o se taumafai atu o le Nofoa e tau faatonu folauina o le tatou galuega, faamalo faafetai.

E faafetai atu foi i lau Afioga i le Palemia, lau Afioga i le Sui Palemia ma le Aiga Kapeneta, faamalo mo le tofa mamao e ala i Tulafono ua tuuina mai i le Palemene mo faamoemoega lelei e atinae ai lo tatou atunuu. Ua faamalo le fai o le faiva, malo tofa ma le utamamao. E faapea foi i saunoaga a lea Itu o le Maota, i lau Afioga i le Sui Taitai ma sui usufono mamalu, malo saunoa, faafetai i la outou foi tapenaga e ala i saunoaga e faufautua ai i le Malo, leaga o le tatou galuega tatou te oloolopitovaa, ina ia see lelei le sa o Samoa, malo faafetai malo tapena.

E faafetai atu foi ona o le lagolago mai o le Maota i le Nofoa, e i ai le manatu o le tatou galuega e fau faatasi. E faamoemoe atu foi le Nofoa i la outou tofa e sologa lelei ai a tatou Tualumaga, malo le usufono.

E faamalulu atu foi le Nofoa i le paia o le Palemene, a fai ua sala se gagana a le Fofoga Fetalai, ia alofa ma faamagalua.

O Samoa i ou paia sausaugata i ou tulaga faalupelupeina, e momoli atu le faafetai i lau tapuaiga, manuia le alofaiva o lau Palemene i lana Fonotaga i lenei aso, ona o lau tapuaiga, malo faafetai. Afai ua i ai se upu ua laalua a lau Palemene, ia alofa ma faamagalua.

E faafetai atu foi i le tapuaiga a Ofisa Sili o Pulega o Matagaluega, Faalapotopotoga Tumaoti a lo tatou Malo, malo le tapuai, faafetai i lo outou

onosai mo le lagolagoina o tatou Taulumaga. Ua malo faafetai, faamanuia le Atua i lo outou valaauina.

E fia momoli foi le faafetai i auaunaga eseese, o lo o faaauau pea le tautua mo le saogalemu ma le malupuipua o lana Palemene i taimi o lana Fonotaga. E aofia ai le Matagaleuega o Leoleo le Pulega o le Tinei Mu ma le Matagaluega o le Soifua Maloloina, aemaise o le Matagaluega o Fesootaiga ma Faamatalaga Tekonolosi, e ala i le galuega faifaipea a le 2AP ma le TV, malo tautua, faafetai mo le auaunaga.

Ona foi mai lea o se tala a le Nofoa, ia i ai le agalelei o le Atua i lenei Maota, pe a afifio atu, ia faamanuia foi le Atua i lo tatou atunuu o lo o tapuai mai.

Ae tatou te le i tolopo ou te tapa ma le faaaloalo lau Afioga i le sui usufono mamalu mo Aleipata Itupa i Luga e tulai mai e saunia se tatou tatalo e faaiu ai le tatou Fono.

Na tolopo Taulumaga a le Fono Aoao Faitulafono i le itula e 7:45 i le afiafi seia aulia le Aso Lua 29 o Mati 2022 i le itula 9:30 i le taeao.